

**NATIONAL ASSEMBLY OF
SEYCHELLES**

Wednesday 16th July 2025

The Assembly met at 0900am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou bann zofisye Lasanble. Bonzour nou piblik ki'n zwenn nou ozordi. E bonzour spesyal pou group viziter ki dan galeri ki en group rezidan Plaisance. Mon swet zot tou labyenveni pou partisip avek nou dan travay Lasanble ozordi.

E parey zot ekspekte nou piu kontinyen avek deba lo Mosyon ki nou'n komanse yer. Mon annan 4 Manm i'n deza lev lanmen, mon pou les zot lib pou lo kestyon letan. Me apre zot koze mon pou pran non tou Manm ki pou koze, e mon kapab fer lot desizyon lo kestyon letan aköz i mon lentansyon fini avek sa Mosyon ozordi. Donk. vwala ki manyer i pou deroule. Mersi. Ok, laparol pou komanse i pou Onorab Doyace Porice.

HON DOYACE PORICE

Mersi Mr Speaker. Mr Speaker, tou mon bann koleg

MNAs e tou dimoun a lekout bonzour. Mr Speaker, mon pran laparol lo sa Mosyon ki'n ariv dan en bon moman anmennen par Onorab Georges. Mersi pou sa Onorab Georges. Mon anvi dir ki pandan ki nou ti antre dan en pei sosyalis, i an menm tan ki SPUP/SPPF/Lepep/US ti met premye pyer pou konstri *Maison Du Peuple*.

Sa Maison pou Lepep. Mr Speaker, nou annan lespwar pou retourn ver Lepep. Mon komans koumsa aköz mon anvi dir Lepep Seselwa aköz nou pa oule parti US retourn o pouvwar sa bann move dimoun. *Maison Du Peuple* pa ti ganny konstirir avek larzan parti SPUP/SPPF/Lepep e US. Later ti pou Lepep Seselwa, batiman ti ganny konstirir avek larzan *taxpayers money*, larzan donnen par Alzeryen e lezot pei ankor.

Pa zis sa Mr Speaker, ti osi annan bokou volonter ki ti vin donn en koudmen spesyalman bokou zabitan sorti Praslin, ki ti donn lanmen savoy ros sorti lo zil pou ede aranz sa batiman *Maison Du Peuple*. Parey nou konnen ki sa kalite ros, zis Praslin ki ti annan. Sa lenformasyon se zabitan lo zil ki'n dir mwan.

Mr Speaker, in menm dir mwan ki zot ti al donn en koudmen aköz zot ti krwar ki

sa batiman ti pou vin en landrwa pou Lepep Seselwa, non pa pou en parti politik.

Mon pou dir mersi, mersi sa bann travayer sorti lo mon zil. Me i malere, apre tou zot zefor, tou zot kouraz zot pa'n zanmen zouir dan sa batiman. Gras a sa *Leader* parti *SPUP/SPPF/US* ki'n fer sa fason, ki'n fer en fason pour pan sa later e sa batiman *Maison Du peuple* pou zot. Mr Speaker, sa in montre nou Lepep Seselwa ki mannyer sa parti *SPUP/SPPF/Lepep* e *US* ti dominer voras, otoriter avek keksoz ki apartyen Lepep Seselwa.

Ankor enn fwa bann move dimoun. Pa zis *Maison Du Peuple* ki zot in pran. Zot in osi pran plis ki 42 bout later Lepep Seselwa. E ozordi zot in vann bann gro, gro ta larzan zis parey sa 2 bout ki mon konnen lo Baie Ste Anne Praslin. Premye ti annan en bout later o bore en lanmar ki ti apartyen pou en pti fanmir.

SPPF ti pran, e met sa fanmir lo en pti bout later *Marie-Jeanne Estate* e konstri en lakaz an tol e donn sa fanmir kot ti vreman mal Mr Speaker. Zot konstri en gro batiman ki apel *Horizon Complex* zis pou zot fer larzan lo sa fanmir. E osi fer larzan atraver bann Minister ki ti annan lofis ladan.

Ozordi zot menm, zot menm dir avek en fanmir ki ti napa landrwa reste, la zot pe pous li pou sa zabitan aköz politik. Kot sa fanmir ti partisip dan Konvansyon Zenn *LDS*. En lot ankor, ki pa bokou letan zot in vann se Sant Payanke Cote D'Or ki tonm Baie Ste Anne. Pous sa msye ki ti ladan avek tou son lekipman legzersis. Dapre konpran Mr Speaker, sa later in ganny vann avek en etranze.

Pralinwaz ekout mwan byen ozordi, sa apartir *SPUP/SPPF/LEPEP/US* pe fer larzan lo zot ledö milyon de milyon. Mon pa konnen aköz parti *US* ozordi pa pran sa larzan donn Pralinoise ki dan bezwen. E zot zis met blanm lo Gouvernman *LDS*. Ki problebm zabitan i pas ladan! Mr Speaker, sa ti vreman mal pou sa Parti *SPPF/Lepep/US* fer larzan lo nou prop Gouvernman.

Ozordi mon vreman fyer ki laplipar Biro Gouvernman in sorti dan sa batiman apele *Horizon Complex* ki apartyen pou *US* pa konnen kot zot ti gannyen tousala. Gran mersi Seselwa in war zot dan kler e met parti *LDS* o pouvwar dirize par Prezidan Wavel Ramkalawan ki zot ti krwar i pa pou zanmen mont *State House*. E Gouvernman *LDS* in vin sov lavi *Praslinoise* ki

SPPF/US ti'n met zot dan fernwar.

Mr Speaker, i zis parey parkour *Maison Du Peuple* ki bokou Seselwa la deor pe espere. Otoriter, vorasite, voler tousala ti pou sa parti. En parti kil toultan bat latet Seselwa dan tou sort fason pou zot reste o pouvwar.

Sa bann pov Seselwa pa ti konnen ki ti pe pase deryer rido. Sa parti politik ki menm mwan ek mon fanmir Mr Speaker pa ti konnen ki ti pe pase. Menm si mon ti ganny averti plizyer fwa ek enn mon bon zanmi. Sa bann move dimoun, in anvi vin o pouvwar ankor. Me non, Mr Speaker, apre vole detri sa pti pei Sesel zanmen Bondye pou les sa arive.

Bokou nou bann dimoun aze pe priy lo la. Zot in pran tro bokou. *Maison Du Peuple* ti kapab vin en lakaz lwazir en landrwa ki Gouvernman ti kapab annan plizyer lofis ki nou pa ti bezwen, nou pa ti bezwen lwe ozordi.

Ou war Mr Speaker, sa parti ki'n vin minoriter ozordi pa'n realize ki 100tan pou le voler e en zour pou le met. Se sa, se sa met ki'n anmenn zot kot zot ete ozordi. Ladan menm degree zot dominer, zot fer serten travayer dan *Maison Du Peuple* ki enn zot siporter pou travay zis lanmwatye zournen zis pou zot pa pey li

son trezyenm mwan saler. Apre zot vin lager trezyenm mwan, trezyenm mwan saler, zot vin lager *bonus* pou travayer *STC* kan zot in pran tou larzan lepep anver *STC*.

Me Mr Speaker, sa i zis bann politik bonmarse an krwayan ki Seselwa pa konn zot zistwar. Zistwar kriyote, zistwar touye, zistwar vole, later toudsort kalite, zistrwar ki sa parti minoriter in fer ler en pei ti dan zot lanmen. E zot ti krwar ki zis zot ki ti pou la. Avek sa detrwa mo, mon promet *LGB* ki mon pou siport son Mosyon. E mon pa pou les tonbe. Mersi.

(APPLAUSE)

MR SPEAKER

Laparol pou Onorab Romain.

HON GEORGES ROMAIN

Mersi Mr Speaker. Bonzour tou koleg Onorab, tou bann dimoun ki dan Galeri. E tou dimoun ki pe ekout nou. Mr Speaker, ozordi mon fer sa lentervansyon lo Mosyon anmenn par *LGB* Onorab Bernard Georges avek en santiman ki bokou parmi nou i partaze. E sa se en santiman lenzistis, ki fer nou poz bokou kestyon.

Mr Speaker, tou sa ki nou pe demande atraver sa Mosyon ozordi se senpleman en laverite. En laverite ki

Lepep Seselwa i merit en laverite lo ki mannyer en batiman ki sipoze pou lepep i vin propriyete en parti politike sa pa lot ki parti *US*.

Me si napa naryen pou kasyet alor nou pa vwar okenn rezon pou nou pa fer en lanket.

Mr Speaker, sa Mosyon i al dan leker nou listwar politik e pli aprofon dan la demokrasi nou pei. I pe demann en lanket aköz i annan bokou lensertitid, i annan kestyon i reste san okenn larepons. E alor sa Mosyon ozordi i pou ofer nou sa sans pou ganny sa klarite lo sa ki nou pe rode.

Premyerman annou pa oubliye kwa ki *Maison Du Peuple* ti sipoze reprezante. Mr Speaker, *Maison Du Peuple* i en sant ki ti ganny konstrir an 1981 pou Lepep Seselwa pou kapab fer plizyer aktivite ladan. Nou ti ganny led avek plizyer pei, enkli Alzeri ki ti prensipalman kontribye plis finansman ek lezot pei ankor.

Me an Fevriye 1996, sa propriyete ti ganny transfer lo non en parti politik e sa pa lot ki parti *SPUP*. E depi sa sa batiman in vin zot propriyete w kwen personnel. E ozordi i formelman lo non parti *United Seychelles*.

Mr Speaker, nou tou nou konnen zot parti fondater se pa lot ki Ansyen Prezidan Albert Rene. Tou sa ki nou'n tandé dan *TRNUC*, bann

atrosite, disparisyon, viktimizasyon ek lezot ankor. Sa nouvo parti *US* in dir plizyer fwa dan sa Lasanble ki sa napa naryen pou fer ek zot. E nou tou nou konnen lekel ki ti responsab.

Mr Speaker, me Selman tou byen sa parti i pou zot. Sa i enkli plizyer morso bout later e san bliy sa fame *Maison Du Peuple* ki nou pe koz lo la ozordi. Mr Speaker, ki ou kapab konpran avek sa parti?

Mr Speaker, annou pa bliye ki rapor Oditer Zeneral ki *FPAC* dan 6enm Lasanble ti ordonnen pou ganny fer ti demontre ki ti annan plizyer tranzaksyon later ki'n ganny fer ant Gouvernman e parti *United Seychelles*. E dan sa menm rapor i fer resorti ki peyman pou serten sa bann tranzaksyon later ti ganny *offset* kont R16.5 milyon ki Gouvernman ti drwa *SPPF* pou konstriksyon *ICCS*.

E sa se zot *Leader* li menm ki ti dir lo televizyon ler i ti pe ganny *interview* avek *SBC*. E in fer resorti ki sa ti arive 15an a 20an pase, anba zot prop Gouvernman. Mr Speaker, zis sa bout la i fer ou poz en kantite kestyon. Ki mannyer se en parti politik ki ganny peye pou fer en batiman? Eski zot ti en kontrakter a sa letan? Mon pa konnen, mon pe demann mon lekor sa kestyon Mr Speaker,

kekfwa mon a ganny en larepons pli tar.

Nou pe rod laverite Mr Speaker, akòz i paret ki i annan plis kestyon ki larepons. Si Sesel ti ganny led pou fer *Maison Du Peuple* eski sa pa ti en kado pou sa pei? Mr Speaker, ler sa menm *leader* ti dir ki sa R16.6milyon zot ti ganny later an retour akòz mon mazine Gouvernman sa letan pa ti kapab pey zot larzan. E mwan Mr Speaker, mon demande sa dil ki ozordi tou sa bout later pe vann de milyon, de milyon rounpi.

E mon mazine sa ti en keksoz ki zot ti'n prevwar pou fer, e zot pep rod plizyer kalite leskiz ozordi. E alor, pa i sipoze reste koman en propriyete *Maison Du Peuple*, ki reste koman en propriyete Leta olye vin pou en parti politik ki ti vin o pouvwar a sa letan?

Nou konnen ki parti *SPPF/ US* i annan en mantalite ki parti tip li gran ki Leta. Sa i zot latid sa, ler zot ti o pouvwar zot ti krwar ki tou keksoz ki ti dan Gouvernman ti pou zot.

Later Leta zot ti pran, Batiman Leta zot ti pran pou zot. Bann lenstitisyon zot ti kontrol tou e labi pouvwar ti en keksoz normal pou zot. Ozordi Mr Speaker, sa larogans pou zot dir ki zot pa pou rann *Maison Du Peuple*, i

pa zis en deklarasyon ki *US* pe fer. I en refleksyon vivan lo en mantalite kot pouvwar ti ganny abize san okenn respe pou lepep.

I montre ki nou menm apre tou sa bann lannen sa parti *US* i ankor parey, napa naryen ki'n sanze ek zot. E zot krwar zot ankor annan en drwa privez lo byen piblik, parey letan zot ti servi zot pozisyon dan Gouvernman pou pran propriyete Leta.

Mr Speaker, sa i pa zis en lenzistis me i en fleo moral ki nou bezwen adrese ozordi e asire ki bann keksoz koumsa pa zanmen ganny repete dan nou pei, Mr Speaker.

Pou mwan en lanket i enportan pou donn nou klarite. I enportan pou byen determine sours finansman *Maison Du Peuple*. Eski ti annan manipilasyon dan sa bann tranzaksyon? Ki dokiman ki ti ganny sinyen? Ki pri egzakt ki ti ganny peye? Eski ti annan okenn konpansasyon oubyen lenterferans par Gouvernman?

Sa Komite Lasanble ki sa Mosyon pe demande pou ganny kree, alor i pou en zouti kot tou sa bann keksoz pou kapab ganny mete o kler. En lenvestigasyon i ava ed nou konpran akòz sa batiman malgre son non i pa ankor retourn kot Lepep. E pour

mwan Mr Speaker, si Parti *United Seychelles* i krwar dan bonn gouvernans latransparans e merit demokrasi parey zot dir i merit montre ki vremen zot parol i annan valer.

E alor rann lepep sa ki pou Lepep. En demokrasi solid i baze lo responsabilite. E responsabilite i rekonnet ler ou fot in ganny fer. Nou Lasanble i annan en drwa moral pou asire ki keksoz ki ti ganny pran anba pouvwar pa reste lanmenm parey bann ki ti abiz sa pouvwar.

Finalman Mr Speaker, mon pou siport sa Mosyon san okenn ezitasyon parske se Lepep Seselwa ki'n met nou dan sa Lasanble pa pou nou gard nou silans. Me pou protez zot drwa, zot byen e asire ki okenn parti politik. La mon dir klerman Mr Speaker, okenn parti politik ozordi oubyen demen pa kapab pran byen Leta. Nou devwar se pou fer sir ki lazistis i ganny fer, eki laverite i ganny met o kler. Mersi Mr Speaker.

(APPLAUSE)

MR SPEAKER

Laparol i pou Onorab Anne Bistoquet.

HON ANNE BISTOQUET

Mersi Mr Speaker. Bonzour Mr Speaker, tou Manm koleg

Onorab. En bonzour spesyal pou zabitan Roche Caiman ki anler dan Galeri, parm i annan mon *clerk* Doris Philoe e son asistan June Bamboche. Mon swete ki zot pas en bon moman avek nou.

Mr Speaker, i fer mwan loner pou entervenir lo Mosyon anmennen par Onorab Georges. Mosyon pe demann sa Lasanble pou fer en Komite Lasanble, pou antreprann en lanket dan rezon aköz *Maison du Peuple* in vin propriyete Parti *United Seychelles*. Sa Komite i a regard sours finansman pou aste sa later e konstri sa batiman.

Lanrezistremman sa later e sa batiman lo non predeseser parti *United Seychelles*. E pou donn rezon aköz sa batiman pa devret retourn pou Lepep Seselwa.

Mr Speaker, sa Mosyon i enn ki ekstrememan enportan. Enn fwa pou tou Lepep Seselwa i a vremen konpran aköz ki nou pa merit zanmen e zanmen met konfyans ankor dan sa parti *SPPF*, Parti Lepep e *US* ki'n pas zot letan zis vol sa pep.

Zot in pas letan zis abiz lo sa pep. Ler pei ti pe anmas R100.00, R10.00 ti donn Lepep. e R90 ti al dan zot pos. Mr Speaker, se dan sa fason ki resours sa pep in ganny abimen e vole.

Bann sef dan sa parti i konnen ki mannyer pou okip zot lekò, me negliz son bann siporter. Sef i pran 10 arpan later pou R65 mil. Tandis ki pep i ganny kas ros pou menm pri. Sa i zot sa, bann swadizan bann bon sosyalis ki krwar dan egalite.

Pli fer lapenn Mr Speaker, se ki zot ti pas zot letan anbet sa pep sirtou bann zenn parey mwan. E letan mon lizye ti komans ouver, e mon ti komans kestyonnen mon ti ganny dir pa bezwen vin kestyonn zot prensip. En prensip vol sa pep, anbet sa pep senm mansonz ek kalonmni e revanz se sa zot prensip bann mov dimoun.

Mr Speaker, in plis ki ler ki vre listwar *Maison du Peuple* i ganny rekonte avek bann zenn. Bann zenn zenerasyon par anba 45an pa ti la an 1999. E se sa zenerasyon ki'n ganny plis anbete. Me listwar e dokiman i prouv laverite.

Dan en lartik *Zournal Nasyon* date le 5 Zanvye 2004. Parti *SPPF* ti fer en fo deklarasyon konmkwa sa batiman *Maison du Peuple* ti ganny konstri avek larzan sorti dan fon parti *SPPF* an 1979 par Mr Jumeau dan son kapasite koman trezorye nasyonal.

Sa i enn bann pli gro mansonz ki zot in bat latet sa pep avek Mr Speaker. Resers

in montre ki sa batiman ti ganny desinen par en arsitek lokal Mr John Dunlop. E bann desen teknikal ti ganny fer pou nou pou naryen par en lakonpannyen *apele Associated Consulting Engineer (ASCON)* ki son kontribisyon ti tonm apepre R150 mil.

Resers i osi montre ki Gouvernman *Algérien* ti kontribye R7 milyon. *Soviet Union* ti kontribye 13mil 50 tonn siman. Nor Kore ti kontribye 2mil tonn siman. *Belgium* ti fer donasyon 59 tonn feray. E en Komite *Fundraising* dirize par Minis Philibert Loizeau sa letan ti ganny kree pou kolekte en sonm R3milyon avek Lepep Seselwa.

Pli enteresan ankò Mr Speaker, se ki Mr Rene ti servi *State House*, resours Leta, e organiz bann pti *cocktail* kot i ti fer sa ki vini pe yen son R250 pou al dan fon konstriksyon sa proze. Sa zoli granit rouz ti ganny donnen par bann *Praslinois*. Koman en *Praslinois*, mon ankòler ler mon mazin nou resours sorti Praslin kouraz e lasyer mon gran pye ki ti ganny fer tou an bonn fwa pou benefis sa pep in al dan lanmen en parti kriminel e voler.

Mr Speaker, Mr Rene dan son prop mo, ti dir ki sa batiman i en tredinyon ant

Gouvernman e lepep. Eski Mr Rene tou pe konsider Lepep koman sa parti *SPPF* e Seselwa pa ti pe ganny en konpran son mesaz? Eski kouraz nasyon Seselwa an antye depi biznesmenn ziska zanfan lekòl pou fer sa batiman in ganny pran koman bann foubet?

Eski Albert Rene ti annan son plan depi lo komansman in zwe tranpe ek sa pep pou zot vol sa pep? Sanmenm sa bann prensip malin, e ki ozordi i ankor pe ganny propaze par dirizan *US* ki anvi fer nou retourn an aryer “*Put up and shut up*” “perdi sa ki nou’n gannnen” e “menm fini dan en rigol anba be pon”, “oubyen mor vit” ouswa “mor dousman” sa pa son problem.

Me Seselwa i dir “*No Turning Back*” savedir nou pou kit *LDS* lanmenm anba direksyon Prezidan Ramkalawan.

Mr Speaker, sa sityasyon *Maison du Peuple* i fer menm larout avek zistwar en fame lakonpannyen telekominikasyon ek televizyon. Pou bann ki pa konnen, sa lakonpannyen ti en proze *Cable TV* pou Lepep Seselwa par Gouvernman *Kuwait*.

Albert Rene ansanm avek son akonplis ti resevwar sa bann lekipman lo lapar Lepep

Seselwa par Gouvernman *Kuwait* reprezante par Mr Abdallah. Deswit koman bann tranzaksyon ti konplete, Mr Rene ti donn Mr Abdallah en *PI* kot i pa ti kapab antre Sesel ankor. E la kot ti annan en seri lensidan kab ki sa moman ti ganny sezi par *Customs*, akòz zot ti pe fer mannev sal pou pa pey taks.

Deswit Mr Rene ti ordonnen ki sa bann ka bi ganny mete kot *PUC*. E deswit son akonplis ti ganny apwente koman *Executive Chairman PUC* e la kot sa proze ti komanse. Menm sa zenerater ki ozordi sa lakonpannyen pe servi i pou Lepep Seselwa. Pa bokou letan apre an 2006, ler nou ti ti’n an plas nou ti antann demisyon sa akonplis.

E dapre resers Mr Speaker, *shares* dan sa lakonpannyen sete parti *SPPF*. En keksoz ki ti ganny donnen pou naryen pou pep Seselwa, ti ganny vole e fer biznes avek kot Seselwa i bezwen pey gro, gro sonm pou akse sa menm servis ki ti pou li pou naryen kot finalman larzan in al dan pos en endividi, e dan fon en parti politik *SPPF*.

Mr Speaker, an 1982 *Maison du Peuple* koni koman Lakaz Lepep, ti’n eksperyans en kou konstruksyon plis ki R10 milyon. En kontribisyon par lasyer Lepep Seselwa. E en don pou Lepep Seselwa kot

bann Alibaba dan kitenge ti'n fer zot plan vol sa pep, me zot ti pe zis tranpe.

Mr Speaker, nou demande ki sirkonstans otour sa lavant propriyete V8013 sinyen par Mr Joseph Nourice e Mr Danny Faure date le 29 Fevriye 1996 i ganny fer vin piblik par sa Komite ankore enn fwa demaske sa bann Alibaba piblikman. Nou konn tre byen sa bann zistwar. Met en sonm me napa okenn tranzaksyon larzan. Ou menm parey zistwar later *Flamboyant* ki zot ti deklare pe vann R74milyon, kan sa ler zot ti demann sa endividi ki ti enterese en sonm plis ki 120milyon.

Parey zot in fer avek bann lezot propriyete ki zot in vann resaman, zot deklare en son pli ba pou pey mwens *duty*. E sa larestan zot pran an dolar e kit dan kof *Maison du Peuple* e donn bal ladan, la kot nou war *tiket first class Emirates* i ganny peye \$8 mil *cash* pou al aranz nennen aletranze.

Mr Speaker, lentansyon *LDS* i kler e senp. Nou pe demann Parti *United Seychelles* pou senpleman retourn kot *César* sa ki pou *César*. Parey zot dir dan tou zot bann *video* e diskour i zot kontan sa pep zot met sa pep premye. Zot anvi le meyer pou sa pep eksetera. Me la i en

loportinite pou prouv zot lekor e *walk the talk*.

Si vreman zot kontan sa pep parey zot proklanmen, rann sa pep son propriyete. Parey lo plak i dir,

“Don du peuple Algérien au Peuple Seychellois” ki vedit *“A gift from the people of Algeria to the People of Seychelles.”*

E an Kreol,

“En kado sorti kot pep Alzeryen pou Lepep Seselwa”.

Nou demann zot par zot prop volonte e lanmour prop pou retourn sa batiman kot Lepep Seselwa. Sa batiman pa pou okenn endividi, ni okenn parti politik, ni pou *US*, ni *LDS*, me pou Lepep Seselwa. Nou dan *LDS*, nou reprezant lavwa Lepep Seselwa. E nou pe fer sa demann lo lapar Lepep Seselwa. Nou pe senpleman lager pou sa pep Seselwa, parey *father* ek son lekip in fer pandan sa dernyen 32an.

Alors Mr Speaker, mon siport sa Mosyon antyerman. E mon demande ki o pli vit posib sa travay i ganny fer. Sel konsey ki mon donn *US*, se pou ekout parol Mr Rene ki ti dir avek Mr Simon Gill avan i ti mor e ki ti ganny repete dan sa Lasanble menm. I ti dir ki pli gro fot ki son parti in fer se pran swen avek zot lekor olye avek Lepep Seselwa. Alor, ozordi sa loportinite pou fer sa.

Rann sa pep sa ki pou sa pep.
Mersi Mr Speaker.

(APPLAUSE)

MR SPEAKER

Laparol pou Onorab Sebastien Pillay.

HON SEBASTIEN PILLAY

Mersi Mr Speaker. E bonzour Mr Speaker. Bonzour tou koleg Onorab. E bonzour tou dimoun ki dan Galeri. Byenveni dan Lasanble Nasyonal. E mon swete parey in ganny dir zot pas en bon lazournen oubyen sa morso lazournen ki zot pou pase isi kot Lasanble Nasyonal.

Mon osi swet en bonzour spesyal tou siporter, aktivis *United Seychelles* ki pe swiv sa deba. E mon oule reasir zot ki *Maison du Peuple* pou reste kot i ete i pa pe al okenn par.

(APPLAUSE)

HON SEBASTIEN PILLAY

Ou ava realize Mr Speaker, ki pandan bann Manm lot kote latab on koze, mon'n reste trankil nou'n ekout zot, nou pa'n *disturb* zot. E mon ti a kontan ganny menm loportinite pou fer mon diskour, mon lopinyon lo sa Mosyon ki devan Lasanble malgre ki in annan en kantite keksoz ki'n ganny dir an deor sa Mosyon ki'n ganny les dir.

Mon ti a kontan ki menm kourtwazi i ganny donner avek nou kote latab isi pou nou osi dir sa ki nou annan pou nou dir. Apre tou Lasanble i landrwa kot nou kapab fer deba lib parey Konstitisyon i prevwar. Mr Speaker, ozordi bomaten mon pou koz lo 3 premiz an relasyon avek sa Mosyon.

Premyerman, i pou en premiz si oule Lezislatif oubyen legal an sa ki konsern sa Mosyon li menm. Dezyenmman, nou pou koz lo bann fe otour konstriksyon *Maison du Peuple* parey zot in apel li bomaten. E osi trwazyenmman nou pou koz lo lopinyon, e sa ki pe arive.

Mon ti a kontan komanse par dir Mr Speaker, sa bann mo swivan. E la mon pa ti a kontan person i ofanse par sa ki mon pe al dir. Eski *LDS* in sitan fay ki i napa largiman politik pou li avanse apre ki in *fail* pou li delivre koman en Gouvernman, e retourn lo menm baz konpanyi ki ti anmenn li dan eleksyon 2020 pou vin o pouvwar?

Eski in sitan fay ki ozordi *SBC* pa kapab kouver zot *rally* aköz i ti montre Prezidan pe dormi dan en sesyon kot bann *teachers NIE*? E eski in sitan fay ki zot pa kapab ranpli en *court* Grand Anse Mr Speaker?

(APPLAUSE)

HON SEBASTIEN PILLAY

Eski ozordi nou pe viv dan en pei kot en Gouvernman i zistifye vann lalkol avek zanfan lekòl. E ki en Prezidan li menm i ganny vwar avek en portre ek en *guinness* dan son lanmen Mr Speaker? Eski sa ki zot pe dir nou, “*No Turning Back*, Kit li Lanmenm”?

Mr Speaker, nou annan en problem. Prezan Mr Speaker si nou oule koz lo laverite, mon a dir Seselwa i annan en laverite senp. An 2020, zot in komans vann nou e an 2025 si nou retourn zot, zot pou legaliz sa lavant. Se sa ki pe arive avek nou pei. E zot pa oule nou koz lo larealite ki nou pei pe fer fas avek. I se ki *LDS* pe vann nou ek etranze. *LDS* pa enterese ek Seselwa. E *LDS* i fay e napa largiman, e sel keksoz ki i fer se vin rod *Maison du Peuple*.

Alors, mon dir ek zot mesa mis, vini, vin la konmela. I laba nou tou nou konnen kot i ete ale al pran li. Me i pa sa ki son Mosyon pe dir. In menm dir nou ki son Mosyon pa enterese pou pran *Maison du Peuple* dan sa Lasanble ki la li. Me akfer ou’n anmennen? Ou sitan boug pli kalifye legalman dan sa pei ki tou dimoun i met ou lo en pedestral, me selman ou pa konnen akòz ou’n anmenn en Mosyon.

Li menm li in *preface* dan son Mosyon poudir latak personnel pou vini. Me Mr Speaker, pa eski se latak personnel ler ou apel nou voler dan kitenge? Eski i pa latak personnel ler ou apel nou voler e kriminel? E eski i pa latak personnel ler ou tret nou pli ba ki later? E eski nou, nou bezwen asize reste trankil e les zot dir nou tou sa ki zot anvi dir nou? Mr Speaker, sa letan kot *US* ti zis reste e sibir in fini.

(APPLAUSE)

HON SEBASTIEN PILLAY

E mwan napa okenn voler e kriminel dan palto ki pou vin dir ek mwan e pou vin donn mwan lesan lo moralite Mr Speaker, akòz mwan mon pa’n fer person pann akòz son later. Mon pa’n zanmen pran later Chamery Chetty. E sertenman pa mwan ki madanm Embridge pe rod mwan pou son larzan later Mr Speaker.

Annou met sa bann fe lo latap, akòz ler nou get karakter nou tret nou kanmarad voler fodre nou tou nou osi nou get nou lekor. Pal rod lapay dan lizye nou kanmarad me apre nou war sa blok ki dan nou lizye nou pa oule tire. Nou oule vin kot Labib Mr Speaker, si i annan en dimoun ki pa kalifye e pa devret pe kot Labib se Onorab

Georges Mr Speaker. Akoz si i met son lanmen lo en Labib i riske ganny brile Mr Speaker.

(APPLAUSE)

HON SEBASTIEN PILLAY

Nou pe koz lo rann tou keksoz...

MR SPEAKER

Onorab, ou menm ou'n dir pa enteronp ou. Mon bezwen enteronp ou. Mon pe dir mon'n ekout deba ziska konmela, e in annan lakizasyon ki'n fer lo parti, lo group. Mon pa'n tann okenn lakizasyon lo Manm personnelman. Alor, nou bezwen omwen respekte sa. Silvouple, ou kapab kontinyen ou soz. Ou kapab fer kritik, lakizasyon si i merite. Me Selman i bezwen annan respe Manm pou Manm. Sa i *minimum* ki nou kapab aksepte. Mersi.

HON SEBASTIEN PILLAY

Mersi Mr Speaker. Mr Speaker, ou'n dir annan respe pou Manm pou Manm. Eski mon pou pe fer alegasyon oubyen latak lo Manm ler mon koz lo larzan La Misère e aparaman ki'n ganny donner avek serten avoka ki mon pa pou nonm non? Eski sa mon ganny drwa dir?

Eski mon ganny drwa koz lo lefe ki ozordi nou annan bann voler dan palto ki *State*

House e ki pe rpan tou sa ki pou zot? Eski mon ganny drwa dir sa mwan? Eski mon osi ganny drwa dir ki ozordi nou annan en Gouvernman ki pa enterese avek sor Seselwa e ki en Gouvernman pli arogan malgre in tret nou arogan?

Eski mon ganny drwa dir ki i pa normal pou en Prezidan Larepiblik denigre son oponan politik e dir ki mannyer sa dimoun i riy parey en lisyen dan en *rally* politik kot tou dimoun pe tandé, pe ekoute. E apre tret tou son oponan koman arogan? Eski mon kapab dir ki i pa normal pou ou dir avek en lot oponan politik ki son manman in mor ki si i oule war son manman vin dan sa laplenn la. Eski i normal pou mwan kapab dir sa Mr Speaker? Kan eski mon kapab dir sa bann keksoz mwan?

MR SPEAKER

Kondwit Prezidan ofisyel, nenport dimoun ki *State House*, Manm Lasanble i kapab anmenn dan Lasanble lo en Mosyon.

HON SEBASTIEN PILLAY

Ou konnen Mr Speaker, ou ek ou parti in fini koumsa ki karakteristik...

MR SPEAKER

Onorab, pa komans akiz mwan. Pa komans akiz mwan.

Si ou oule fer ou *speech*. Mersi. Onorab, les mwan dir ou... les mwan dir ou sa size i en size serye, enportan. I en size ki tou le de kote parti politik i devret annan zot keksoz pou dir lo la. I en size ki zot bezwen pran zot responsabilite pou met kler devan Lepep Seselwa.

Alor, si ou anvi en loportinite pou kapab fer e pran sa responsabilite lo lapar ou parti, silvouple swiv large deba ki nou pou bezwen swiv dan Lasanble. Se tou ki mon kapab dir ou. Mersi. Mon krwar Onorab i konn byen Lasanble i konnen ki si sa ki i pa devret dir. E mon pa krwar i annan okenn dout lo la. So, mon pe demann ou silvouple, gard sa antet.

HON SEBASTIEN PILLAY

Mersi Mr Speaker. Mr Speaker, ler mon ti komans mon lentervansyon mon ti koz lo 3 premiz. Premye premiz se premiz Lezislativ e legal ki nou pe fer ozordi bomaten. Mr Speaker, in deza annan en Komite ka Zidisyer parey sa enn ki pe ganny konstitye aköz sa Komite ki pe ganny konstitye i dir ki i pou fer okenn rekomandasyon nesese avek Gouvernman lo fitir sa later, sa batiman.

Bon, si nou pran li lo en pwennvi legal lezitimman parti *United Seychelles* i ganny

proteze son drwa pou annan en propriyete i ganny proteze anba Lartik 26 nou Konstitisyon. E Lartik 26 nou Konstitisyon i prevwar ki sa proteksyon i *extend to* tou sa ki konsern son propriyete. Me sa lartik i dir ou poudir i ava annan en Lalwa oubyen en derogasyon dan en pei demokratik ki fer ki ou bezwen respekte. Konpran derogasyon.

Me tyonbo en kou Mr Speaker, sa ki nou pe fer i pa en Lalwa. Sa ki nou pe fer se kre en Komite Lasanble pou nou al dil avek en later ki swadizan ki *belong to* en lot dimoun. Me eski sa ki nou pe fer i legal? Premye keştyon.

Dezyenm keştyon Mr Speaker, an sa ki konsern Komite ka Zidisyer, mon ti a krwar Mr Speaker, pa bon fer lakizasyon ki ou ti ava'n konsider *ruling* lakour. An sa ki konsern Komite Anti-Viktimizasyon ki ti ganny kree dan sa Lasanble. E ki lakour ti rule ki sa Komite pa legal an relasyon ek Konstitisyon aköz i pa kapab pran pouvwar par Zidisyer.

Sa ki Onorab pe demande, e sa i enteresan Mr Speaker, in dir li menm li nou pou pas sa Mosyon. E si i pa ganny letan konstitye sa Komite, i a konstitye dan lot Lasanble. Me Mr Speaker, eski Onorab in bliye ki sa Mosyon

ki'n ganny pase la pa pou relevan dan lot Lasanble? Eski i pe zis anbet Seselwa?

Me sa Mosyon ki'n pase la, pa i pou tonbe ler lot Lasanble i vini? Konmsi aköz ki ou bezwen vin anbet Seselwa sa degree zis pou ou kapab sey *score* en pwen politik lo en keksoz ki en *non-event*. Get ki in dir dan son Mosyon. Al etabli sours finansman sa later, anrezistremman sa later. Be Mr Speaker, be ler mon'n ekout zot koze e la mon war i enteresan aköz i paret poudir *LDS* swa son gir in grennen, swa son gir in kase, oubyen son gir napa delwil ladan i bezwen annan kek problem ek zot Mr Speaker.

E mon krwar seryezman zot bezwen aranz zot parti. Onorab Arissol yer dan son entervansyon, mon ekout zot byen mwan - in dir koumsa poudir - in eksplik nou tou bann landrwa kot sa larzan in sorti. Be pa in dir in etabli sours finansman li? In menm dir poudir ti annan en *fundraising* Komite *chair* par ansyen defen Minis Philibert Loizeau ki ti *raise* R3milyon sa letan.

Me sa R3milyon ti *raise* atraver kwa? Kontribisyon bann Manm parti *SPUP*. *SPUP*, pa kontan *SPUP* ki zot oule me Selman *SPUP* in la dan listwar Sesel ou pa pou kapab efas li.

Sey re envant listwar ki mannyer zot anvi. E la a sa pwen Mr Speaker, mon oule dir ek zot. E mon oule dir ek tou Seselwa. Mon fyer mon en siporter *United Seychelles*. Mon fyer mon en Manm *United Seychelles*!

E person pa pou fer mwan per mon lidantite politik. Zot pas Lalwa lo protez 8 karakteristik politik apre zot vini zot menm zot ensilte mwan ek mon karakteristik politik? Me zot en bann move dimoun.

(APPLAUSE)

HON SEBASTIEN PILLAY

Zot pa zis move, zot fer lapenn. Zot fer lapenn aköz zot menm zot koz en parol, apre fer en lot keksoz Mr Speaker. Se sa ki apel larogans pouvwar. Prezan annou vin lo son lot pwen dan sa Mosyon. Aköz sa batiman pa devret retourn parey son non in dir pou Lepep Seselwa?

Mr Speaker, ou konnen ki mon kontan mwan dan sa Mosyon? Mon kontan ki mannyer en dimoun ki drwa son lavi, son kontinyasyon son karyer a Mr Rene i sot lo Mr Rene, i maltrete. I dir ou dan nou lizaz Kreol i dir ou pa zanmen koz mal lo en defen. Pa zanmen koz mal lo en defen Mr Speaker, ler en dimoun i mor ou pa koz mal lo li. I senp sa, se pou sa rezon ki dan en

lanterman ou pa war dimoun koz koumsa. Ou konnen akòz ou kapab koz koumsa ozordi Mr Speaker?

(comments off-mic)

MR SPEAKER

Order!

HON SEBASTIEN PILLAY

Ou kapab koz koumsa, akòz sa msys pe al pou defann son lekor. Ler nou ti retounnen sorti deor nou ti travay dan ... ou konnen sa ki enteresan Mr Speaker, nou'n vin miltimilyonner sa i enteresan sa. Zot in vin miltimilyonner enkli Onorab Georges ek tou son klik, zot in vin miltimilyonner anba en Gouvernman Mr Rene, me Selman zot in ganny viktimize. Zot Vis-Prezidan ti yer la dan Lasanble pou ilistre mon pwen. I dir i ti'n ganny ase, in ganny akse apepre pres 40 an dan Gouvernman apre ki in ganny plizyer bout later, plizyer keksoz, anmas plizyer larises apre sa in ganny ase, in ganny viktimize.

Mr Speaker, si viktimizasyon ti koumsa, viktimiz mwan en kou. Akòz lo en premiz legal sa Mosyon e sa *ruling* Lakour sa Mosyon i pa legal. I al kontrè ek sa ki lakour in deside an relasyon ek nou Konstitisyon. Me ki manner in pas tes

admissibility e sa i return mwan lo premye pwen ki mon'n fer se ki *LDS* i sitan fay i napa lot largiman pou sey fer bat son masin alors ala vin avek en Mosyon lo *Masion du Peuple*, e nou a fer politik lo *Maison du Peuple*.

Be eski zot in tann koz lo *Maison du Peuple*, nou'n tann koz lo *global*, nou'n tann koz lo lot, nou'n tann koz lo lot. Be Mr Speaker, atraver ou mon oule dir ek Onorab Bistoquet me tou sa larzan ki ou'n pran pou al lo *Facebook* pou maltret Mr Ramkalawan ki Parti Lepep ti pe ou, sa osi ou a bezwen rann.

(APPLAUSE)

HON SEBASTIEN PILLAY

Tou sa bann larzan ki ou'n gannnen aparaman so ou ava rann. Onorab William atraver ou Mr Speaker, i a rann sa later lagrikiltir ki li i pe lwe. Konmsi mon pa gannnen en konpran mwan. Tou salte pou ganny depose devan nou laport. Me sa ki devan zot laport nou sipoze met en bando lo nou lize pa war e pa dir, pa koz lo la.

Mr Speaker, i annan en realite devan nou ki nou bezwen serye about. Ou'n dir mwan pa atak bann Manm Mr Speaker, mon pa ava atak Manm. Ler Onorab Porice i tret mwan koman voler e kriminel,

in tret mwan in dir nou dan sa Lasanble. In dir zot dan sa Lasanble zot bann voler e kriminel.

Petet mon pa devret dir, me eski i normal? Mon ap ep dir Onorab Porice ki'n fer. Ki en dimoun i pran larzan bann vye dimoun kot kontribisyon pou anmenn zot lo zil, apre i pran pou li i pa rann zot. Eski sa i normal? Eski nou pa devret koz lo la? Eski nou pa devret dir? Tou dimoun ler in ariv en lo kot in sot lot kote, sa kote kot zot ti ete i sitan pa bon - zot sitan bann move dimoun.

Me Selman ler zot ti pe pran tou sa benefis, tou sa ki ti pou zot zot ti pe pran ti *ok* a sa moman, ti napa problem. Sanmenm sa ki apel Mr Speaker, pou *quote* Onorab Georges pran gato, pran lakrenm lo gato, pran labouzi e menm pran plak ki gato in vin lo Mr Speaker. Sa zot sa.

E i enteresan Mr Speaker, zot sitan konfize. Lo en kote Onorab Porice i dir nou se *taxpayers money*. Lo lot kote Onorab Philip Arissol i eksplik tou sa bann proze volonter ki'n ganny fer pou konstrir *Maison du Peuple*. E se sa labaz nou largirman. *Maison du Peuple* ti ganny fer atraver travay volonter bann aktivis *SPUP*.

E sa letan ti annan travay volonter ki pe pase dan

tou distrik. E sa ki enteresan Mr Speaker, Onorab Porice i konn sa tre byen li. I konn sa laverite li. E Labib i dir ou, ler ou konn laverite ou koz mansonz Mr Speaker, ou pou al drwat dan lanfer. Zot kontan *quote* Labib. Me ki mannyer ou kapab annan en politisyen koumsa ki pe aspire pou reprezant zabitan Baie Ste Anne ler menm i konn laverite i pare pou li koz lalang. Akoz mon krwar lalang nou kapab servi ozordi dan Lasanble vi ki voler ek kriminel in ganny servi.

Mr Speaker, i enportan pou nou regard sa ki'n ganny dir otour sa Mosyon e etabli byen bann fe. Sa Komite ki ti *raise* fon i ti *raise* fon atraver en kantite travay ki ti ganny fer par bann Komite Distrik, ki ti anmenn zot bann groupman ansanm pou zot kapab kontribye pou fer *Maison du Peuple*.

Ozordi bokou sa bann veteran mon krwar zot pou premye pou debout devan *Maison du Peuple* si Mr Georges ek son klik i vini pou sey pran *Maison du Peuple* ki zanmen pou arive Mr Speaker!

(APPLAUSE)

HON SEBASTIEN PILLAY

Dezyenmmman, e sa i enteresan Mr Speaker. Zot ti tret Larisi ko minis. Zot in tret *North*

Korea ko-Minis. Zot in tret Alzeri sa letan koman sosyalis ko-minis. Me Selman tou sa bann parti sosyalis, ti asosye zot avek Parti *SPUP*. E si parti *SPUP* pa ti en parti sosyalis, sa bann kontribisyon pa ti pou'n ouver Parti *SPUP*.

Be la mon annan en pti lenformasyon pou donn Lepep Seselwa pa konnen. E ki petet Onorab Georges i konnen, me i pa oule dir nou. Gouvernman *LDS* in ekrir Gouvernman Alzeryen in ekrir. Pou demann Gouvernman Alzeryen zisteman sa kestyon. Ou konnen ki Gouvernman Alzeryen in dir li, in dir li sa ki'n pase sa letan ti bann relasyon ant sa bann parti. Zot napa sa bann lenformasyon prenan kont sa kantite letan ki sa in pase.

Alors, i napa levidans li, i napa naryen. I napa naryen pou li vin fer largiman avek e sel keksoz ki i kapab vin fer ozordi se sey vin anbet Seselwa e fer krwar poudir li i dan zot kote e li i vin reprezant zot e i pe vin rod *Maison du Peuple* pou zot. Mr Speaker, sanmenm sa ki apel lalang dan palto.

(APPLAUSE)

HON SEBASTIEN PILLAY

En lot pwen fondamantal Mr Speaker, otour sa. Nou pe koz lo *Maison du Peuple* i zis sa

annex. In dekrir sa *whole building* in donn valer Mr Speaker, e sa i enteresan i pa ni realize lo son Mosyon in donn valer depi *ICCS* avek *Maison du Peuple* ansanm ki nou'n swadizan vole.

Me si ou pa en move dimoun, sanmenm sa ki dir Mr Speaker parey sa pti garson ti pase ek son papa o bor sa latonm kot lo sa latonm in ekrir la in anter en avoka i en bon dimoun. E i demann son papa be eski i annan 2 dimoun dan sa latonm? Akoz napa *such thing* en avoka ek en bon dimoun Mr Speaker. I koz mansonz e lalang pou li zistifye son pwen.

E sa mansonz ki'n ganny rakonte ozordi, yer dan sa Lasanble i montre ou ki mannyer - ki zistans zot pou ale pou zot sey anbet sa pep pou zot re ganny pouvwar an 2025. Be annou etabli en baz Mr Speaker, annou desin en laliny. Tou sa bann keksoz ki'n ganny fer ki'n swadizan ganny fer ti ganny met devan Lepep Seselwa an 2020.

E Seselwa ti ekout zot *TRNUC*. Seselwa ti ekout tou keksoz. Seselwa ti dir *ok*, *US* nou pa oule donn *LDS* Legzekitiv, donn li mazorite dan Lasanble. Se sa ki ti arive. Menm baz ki zot in konpany lo la 2020, i retournen ankor 2025. Mon ti ava ekspekte koman en parti ki'n ganny

pouvwar avek en sitan mazorite. E ki sitan pouvwar ti ava pe koz lo son lakonplisman, lo son travay, lo son delivre pou pep Seselwa me i pa kapab.

Akoz i pa'n delivre pou pep Seselwa. Malerezman pou Onorab Bistoquet Mr Speaker, ler i dir nou ti fer R100 nou ti pran R10.00 omwen nou'n donner. Be zot, zot fer R100.00 zot pran sa R100 apre zot vol ankor R10.00. Sa ki apel en Gouvernman serye dapre zot Mr Speaker. Me i fer lapenn sa Mr Speaker, pou vwar war sa. Zot pa kapab koz lo zot rikord travay alor zot vin koz lo lepase. E fer krwar ki lepase ki pou anmenn zot o pouvwar.

Sa Mr Speaker, ti mon morso lo sa premiz legal sa Mosyon. Prezan mon pran sa lot bout. Prezan mon pran sa lot bout Mr Speaker. *Ok*, lo zot koman en Gouvernman ki ozordi se sa ki zot pe dir. Zot pe vin avek latransparans zot annan en tors 15 batri eksetera.

I byen, zot koz ek pasyon lo Maison du Peuple. Osi sa menm pasyon ler nou ti anmenn Mosyon pou kre en Komite Endepandan pou investigate leksplozyon le 7 Desanm? Kot zot ti ete? Zot pa ti la? Zot pa ti tande. Ler zabitan Cascade zot lakaz in ganny detri. Ler zot in ganny

blese, sa ki'n ganny koupe dan ledò, sa ki'n ganny koupe dan lizye, sa ki'n ganny pike dan lizye. Oli zot, zot pa ti la?

Zot napa menm pasyon pou kozl o Seselwa, lo dimoun? Zot bi se zis sey fer politik bon marse pou zot sey fer bate zot masin ki'n deregle? Zot menm zot ki'n vid disik dan zot prop masin Mr Speaker. Oli zot letan nou ti pe koz lo Komite pou investigate sa ki'n pase dan prizon?

Mannyer dimoun ti ganny bate anba zot *watch*. Larme in antre in bat en boug ziska parey en zourit sa msye in dir. Finalman sa boug in perdi son lavi. Oli zot, zot pa ti *investigates* sa, zot pa rode? Oli zot pou *investigate* ler zot Minis ti tap sa gard? Ni *breathalyser test* pa ganny fer lo li, zot pa *investigates*?

Oli zot pou koz ek pasyon ler nou ti pe koz yer lo *bonus* travayer *STC* koz ek pasyon ler nou ti ep koz yer lo *bonus* travayer *STC* kot zot Vis-Prezidan pe dir zot pa konnen kan *AGM* pou fer pou travayer *STC*? E mwan mon ganny met deor aköz mon pe demande kan *AGM* pou ganny fer.

Oli zot pouk oz ek pasyon ler zot Minis in *mislead* Lasanble yer an sa ki konsern *Dental Technician*. Pa ni konnen konbyen *Dental Surgery Assistance* i annan, aköz zot pa'n regard

lenformasyon ki lo zot *website* lo zot rikord. E bomaten tou sa bann *Dental Surgery Assistance*, sa bann *Dental Technician* pe *call* nou.

Oli zot? Non, ou konnen kot zot ete zot? Zot *Qatar* pe vann *Lasonpsyon* ek *Qatari*. Zot *Abu Dhabi* pe vann en lot bout avek laba. Zot laba pe vann en lot bout ek laba. E i annan ankor pou vann parey mon'n dir. 2020 zot in komans vann nou. 2025 zot pou lezitim sa lavant ki zot in fer Mr Speaker.

Tousala i bann keksoz ki Seselwa i bezwen tande. Seselwa i bezwen konpran kwa ki pe pase avek nou. Zot oule *distract* nou lo nou misyon Mr Speaker. E nou misyon se fer sir ki sa Gouvernman *LDS* le 27 Septanm 2025 i ale dan sa pei Mr Speaker!

(APPLAUSE)

HON SEBASTIEN PILLAY

Zot pa'n kapab alaoter sa ki Seselwa in donn zot. Ozordi Mr Speaker, mon demande oli zot ler Beau Vallon en kote *Aquaculture* pe ganny fer lot kote zot pe dril pou disab. Oli zot, zot pa koz lo la ankor? Zot in perdi zot lavwa? Selman avan sa, avan 2020 get zot pe fer protestasyon lo Grand Police. Oli protestasyon in fini? 2020, zot in vann nou, 2025 zot in legaliz sa lavant.

Se sa ki ep arive avek nou Mr Speaker. E nou, nou pou koze lo sa bann keksoz, aköz menm si *LDS* pa oule nou koze nou pou koze aköz sa Lasanble in fer pou koze. E yer nou'n war e zot pa pou kapab ozordi anpes nou dir sa ki bezwen ganny dir ek sa pep lo larealite sa ki pe pase dan nou pei. E larealite i senp Mr Speaker, larealite se ki ou lavi ozordi i pa pli byen anba *LDS* ki i ti ete oparavan.

Larealite ozordi se ki ou annan mwens larzan dan ou pos pou sonny ou fanmir. Larealite se ki *youth unemployment* in monte menm ler zot Minis i vin koz lalang dan Lasanble dir nou sa pa'n arive. *Youth unemployment* in monte par 13poursan Selman zot Minis i dir nou napa *youth unemployment* dan pei. Ki mannyer ou kapab konpran?

Zot pa pe viv Sesel. Zot pe koz travel? Me lekel ki'n travel plis fwa? Se sa nou problemn, nou problemn Mr Speaker, se ki sa Mosyon i oule *distract* nou...

MR SPEAKER

Ou ankor lo Mosyon Onorab?

HON SEBASTIEN PILLAY

Lo travay ki nou annan pou fer. Mr Speaker, ou bann dimoun in koz lo tou keksoz ou pa'n aret zot. Ler mwan

mon pe koze mon pe koze mon
pe koz lo larealite.

MR SPEAKER

Non. Non, non.

HON SEBASTIEN PILLAY

Be donn mwan sans.
Egzakteman parey sa bann
dimoun ki ou dir ti met ou dan
pou al dan kaso. Ou pe anpes
mwan, ou pe anpes mwan
donn mwan mon dwa. Les
mwan mon dwa koze. Ki
mon'n fer ou bomaten ki mon
pa ganny drwa koze? Tou sa ki
mon pe dir i aköz i grens ou,
pa oule mon koze. Be les
mwan koze.

Pa mwan ki'n dir sa bann
keksoz. Mon bezwen reponn,
eski mon pou asize trankil pa
reponn zot? Ou ti reponn byen
dan *Regar*. Zot ti reponn byen
dan *zournal* zot. Oli zot ozordi?
Zot in nepli anvi reponn? Les
mwan reponn. Mr Speaker,
larealite devan nou i senp.
Larealite se ki zot envant
laverite lo en lalang. Par
egzanp Mr Speaker, zot dir
poudir zot fer sorti en sirkiler
parey 2016 kot tou dimoun i
devret *resign* si ou travay dan
Gouvernman pran *unpaid*
leave.

Wi 2016 ti napa en
Lasanble ki ti *on going* ler en
sirkiler ti sorti. Tou Manm
Lasanble ti se zot. La Lasanble
i ankor pe sit pe ganny peye
Selman dimoun dan

Gouvernman i bezwen *resign*.
Sanmenm sa ki apel
proteksyon egal anba
Konstitisyon anba *LDS* Mr
Speaker. E i osi senp ki sa Mr
Speaker sel keksoz ki zot
kapab dir ozordi se ki zot, zot
reprezant Lepep Seselwa.

Ou war ki nou annan,
ou, ou pare pou les zot dir sa
ki zot anvi. E nou pa kapab dir
naryen aköz zot annan drwa
koze, zot annan drwa dir tou.
Alors, Mr Speaker, nou pou
koze nou pou dir. Mon pa
ankor fini dir Mr Speaker.
Akoz apre tou laverite i toultan
ofans son met Mr Speaker.

Prezan nou vin lo
trwazyenm premiz Mr
Speaker. Lopinyon otour
Maison du Peuple. Onorab
Romain i dir nou napa rezon
me demann en lanket. Tou sa
ki nou'n tande dan *TRNUC*, *ok*
li ki'n dir Mr Speaker. Ou
konnen ki mon krwar zot
devret fer zot? Zot devret onte
zot kontinyen Mr Gerard
Hoareau koman enn zot seval
batay pou fer politik lo la, zot
devret onte.

Akoz zot menm zot pa'n
onor, zot pa'n onor zot
lobligasyon ki zot ti donn zot
viktim *TRNUC*. Zot Prezidan in
tap koudpye sa Komite Viktim.
In tap koudpye sa bann viktim
a plizyer repriz, san ki in dakor
pou li zwenn zot. E nou, nou
ganny dir pou dir pa nonm

non dimoun akòz zot pa *perpetrators*.

Be mwan mon kapab konfirm ek ou ki serten msye ki ti ansarz lo *TRNUC* in *call* bann *staff* pou demande akòz zot pe donn Lopozisyon lenformasyon lo *TRNUC*. *Challenge* mwan mon ava vin dan ou lofis mon a montre ou mesaz. Mon pa pou dir la Onorab Henrie, akòz parey ou ti viktimiz sa madanm Mont Buxton ki ou pa ti oule aranz son tol akòz i siport *US* nou pa pou fer li parey la.

Mr Speaker, i enportan akòz ler nou dir nou kanmarad move dimoun annou get nou lekor dan laglas, menm si Onorab Porice son laglas i latet anba me amwen i en laglas. Akòz nou bezwen balanse sa ki nou dir avan nou dir, akòz nou kanmarad pou reponn. Mon pou ganny reponn taler, *so be it* Mr Speaker. Mon fyer mon en *US Fearless in Dignity*.

Prezan Mr Speaker, mon tann Onorab Woodcock pe rezenbe atraver ou Mr Speaker, Mr Marie i li Praslin be wi ou ti fer li promet promes later apre ou'n abandon li net. Ou'n abandon li net ou gran siporter. E prezan ki arive ou'n ae ou'n pran later ou'n ou donn en lot dimoun san dir sa msye Mr Speaker. Mon a dir taler, si i oule mon eksplik li, mon a eksplik li pli byen taler.

Zot pa konnen. Ou konnen ki arive Mr Speaker, annou pa met sa bann laverite deor, annou pa koz sa bann keksoz ki'n pase. Akòz? Akòz *LDS* i o pouvwar i an mazorite e person pa kapab dir li naryen. I enteresan Mr Speaker, ler nou'n koz lo *Maison du Peuple* nou'n koz lo koudeta. Nou'n koz lo atosite. Nou'n koz lo bann keksoz ki'n arive e ou'n les sa deba ganny fer.

So, permet mwan Mr Speaker pou koz lo klima politik ozordi. Klima politik ozordi i enn ki senp. Ler ou en *PS* ou al dan *rally* i *ok*. Meler ou direkter oubyen ou *staff* i ale ou ekrir li en let oubyen ou anvoy li en *email* oubyen ou anvoy li en mesaz ou dir li "ou pa ganny drwa ale" pa bezwen fer.

Ler ou dan lapolis e ou en sef dan lapolis ou ganny drwa ale, me lezot gard pa ganny drwa ale. Si zot ale i vin en problenm. Se sa larealite politik. Zot, zot fer li in style. Zot fer sa ki ou apel manipilasyon e vyolasyon drwa in *style*. Me tou dimoun i ekspekte lezot fer napa problenm. Akòz? Akòz dan lepase sa enn ti ganny mete dan prizon, sa enn ti isi, sa enn ti laba.

Zot be Seselwa lazenes Seselwa pe rode kot zot pou ale, ki annan pou nou fer. E

zot pas zot letan *dwell* lo lepace Mr Speaker, mon pa konnen pou ki rezon aköz zot krwar poudir i anmenn zot serten gratifikasyon. Onorab Georges in fer referans avek li Mr Michel ki ti *endorse*. E in dir i pa'n koz lo sa enn. Be aköz i pa koz lo sa enn ki i ti *endorse* e sa ki i ti dir sa zour?

Mr Mancham ti rikorde dan son liv. E sa zour ki Onorab Georges ti dir ki, lepace i bezwen reste kot i ete. Me pou li enform lefitir. Ler i ti pe donn ponnyendmen Mr Mancham se sa ki i ti dir. Prezan sa ki enteresan Mr Speaker, Onorab Georges i vini i dir nou koumsa non, non, non lepace i bezwen retourn le prezan aköz nou pa kapab viv dan lefitir.

Be dan lefitir sa ki pe arive se ki 2020, zot in komans vann nou. E 2025 zot pou komans legaliz zot lavant. Se sa ki pe arive dan nou pei. Mr Speaker, mon kontan ler zot koz lo Prezidan Michel e zot dir ozordi nou pa kontan Prezidan Michel. I pa nou, si i annan problemm avek Prezidan Michel, se zot. Zot in virifye sa msye, maltret li napa naryen pou fer. Apre ou al debout o bor sa msye ou tap li son zepol ou pe get *Formula 1* ek li. Ozordi i ou *best friend*.

Mon napa problemm ek sa mwan Mr Speaker. Be koz laverite ek sa pep. Ler sa msye

ti annan Espace ou ti dir tou dimoun sorti *Espace*. Tou biznes Gouvernman sorti *Espace*. Be kote bann Minister Gouvernman i ete ozordi? Pa i *Espace*? Zot aret fer nou krwar lizour pou aswar. Ki mannyer i ti dir sa? Zot a fer ou krwar lizour pou aswar. Sel parti ki oule fer dimoun krwar lizour pou aswar dan sa pei ozordi se *LDS* Mr Speaker.

E zot pwen se vin dir ek nou koumsa etabli bann fe lo ki mannyer *Maison du Peuple* in ganny fer, kwa ki'n arive ek *Maison du Peuple*. Be bann fe zot menm zot in etabli. Nou'n menm fer zot konpran pou dir sa volontarya ki ti ganny fer ti en mouvman ki nou ti met an plas. Atraver volontarya Mr Speaker, mon fyer pou dir mon manman ti partisip ladan mon'n al ek li. Nou'n konstri *court* dan distrik, nou'n konstri klinik dan distrik.

I annan menm landrwa kot nou ede pou konstrir partou bann lekol Mr Speaker. Nou'n konstrir miray pou dimoun. Zot a koz nou volontarya? Sel lenstans kot lespri volontarya in mor Mr Speaker, se ler *SNP* in antre lo lasenn politik. Ler *SNP* in antre lo lasenn politik, i ti oule efas tou keksoz lo map Sesel.

I ti oule efas konblaz. I ti oule efas tou konstriksyon. Ozordi lo sa menm konblaz se zot bann aktiv ki'n ganny pli

gro bout later ki pe fer larzan pe kontribye pou donn zot sipor. Ki mannyer nou kapab konpran ek sa bann dimoun? Zot en bann move dimoun Mr Speaker.

MR SPEAKER

Ou'n depas 30 minit Onorab.

HON SEBASTIEN PILLAY

Mr Speaker, nou, nou krwar poudir i annan en sel keksoz ki pe arive dan sa Lasanble. E sa ki pe arive dan sa Lasanble se en *attempt*, en lesey pou derout nou lo sa travay ki nou'n komans fer. Pou derout sa pei lo sa direksyon ki i bezwen ale Mr Speaker. Zot pe koz lo en Gouvernman ki pe delivre. Ou konnen ki enteresan Mr Speaker zot al pran en paz dan sa liv ki zot in dir zot pa kontan zisteman zot komans met pyer fondasyon partou e dir realiz pyer fondasyon partou.

E yer mon'n prouv avek Minis, i dir nou ki konstriksyon in komans. Apre son *CEO* i dir li be non konstriksyon pa ankore komanse kontrakter mobilize. Zot pa kapab koz laverite ek sa pep a okenn moman Mr Speaker. Lalang dan palto nou bezwen dir Mr Speaker. Se sa larealite.

MR SPEAKER

Konklir silvouple.

HON SEBASTIEN PILLAY

I enteresan Mr speaker, ki okenn kourtwazi ou pa pare pou afront mwan koman en lot *leader* dan Lasanble apre ki ou'n afront mon koleg plis kantite letan ki i anvi pou move son Mosyon. I byen. I byen Mr Speaker. La diktatir i vin avek pouvwar, e la nou war vre kouler dimoun, e mon napa problem ek sa.

Me Selman Mr Speaker, mwan mon'n koz lo non tou siporter *United Seychelles*. Mon'n koz lo non sa milye Seselwa ki'n dir an 2025, le 27 Septanm ki zot pa oule LDS ankore. Ki *LDS* in *fail* koman en Gouvernman. E *LDS* pa pe delivre koman en Gouvernman. E lo non sa bann siporter *United Seychelles*, lo zot non mon dir ek zot koumsa. Sa ki krwar i kapab pran *Maison du Peuple* kontinyen koz lo la zot a koz lo la, zot a koz lo la e zot a koz lo la.

Me zot pa pou kapab fer naryen. Mon a dir ou akore Mr Speaker, akore tou sa ki pe ganny dir se bann mansonz e bann lalang. Sa ki nou annan dan sa pei Mr Speaker, se en Gouvernman mansonzer, bann dimoun ki koz lalang dan palto e pe ganny siporte e ede par en Lasanble Nasyonal

an mazorite ek zot Speaker.
Mersi Mr Speaker.

(APPLAUSE)

MR SPEAKER

Bon, parey mon dir mon a pran non bann dimoun ki oule entervenir lo sa Mosyon. *Order!* En moman, en moman. Non bann dimoun ki oule entervenir lo sa Mosyon silvouple lev lanmen. Bon, mon kont 15 Manm ki pou koze. *Ok*, mon pou bezwen mon napa swa on bezwen limit letan. Mon pou demann bann Manm obzerv 15 minit par lentervansyon. E fotespere i a a kapab menm mwens, aköz sansan nou pa pou fini. Onorab Henrie, ki ou *point of order?*

HON GERVAIS HENRIE

Mersi. Bonzour Mr Speaker. Anba *Order 59(7)(d)* Onorab ki'n entervenir zis avan la in fer en *personnel charge* kont mwan. Kot in aköz mwan mon'n promet se pa ki madanm dan Mont Buxton sepaman kwa. I en *statement* ki i pa kapab *substantiate*. Mon *challenge* li pou met laprev levidans devan Lasanble lekel sa madanm, kot i reste, ki zour ki i ti dir li kwa. Aköz si i pa kapab fer sa, i pe senpleman ki i malere pou en dimoun ki pe aspire pou vin Vis-Prezidan nou pei ki koz

mansonz e ki zis fer propagann dan Lasanble Nasyonal! Mersi Mr Speaker.

MR SPEAKER

Bon. Mon pa kapab...

HON SEBASTIEN PILLAY

Mr Speaker, sel boug ki koz mansonz se Onorab Henrie ki pa oule aksepte...

MR SPEAKER

Onorab, ou remarke poudir mon pe koze? E ler Speaker, pe koze ou sipoze ekoute. Mersi. Mon pa kapab zis laverite lo la, me selman troun lo baz. Manm evite, evite fer lakizasyon personnel kont lezot Manm e osi kont lezot zofisye. Silvouple s a i en lareg.

(comments off-mic)

MR SPEAKER

Onorab Pillay, ou'n ekout mwan silvouple? Bann Manm mon repet ankor.

Evit bann lakizasyon. Evit bann lakizasyon personnel aköz sa Mosyon i pa lo kondwit bann Manm personnelman. Silvouple i annan en Mosyon devan zot, mon'n dir i en size serye ki zot devret pran zot responsabilite pou adres li mannyer i ete. Mersi. Mersi. Ki ou *point of order* Onorab Pillay?

HON SEBASTIEN PILLAY

Mr Speaker, mon *point of order* i anba *Order 8* e i en *Order* ki mon ganny drwa demann en *point of order* anba la, *ok?* Mon bezwen ganny en konpran. Ler tou sa dimoun in koze - ler tou sa dimoun in koze person isi pa'n lev *point of order*. Eski i pou ariv en staz kot en mazorite son lapo i sitan fen, ki sak fwa en keksoz ki zot pa kontan zot pou *raise point of order?*

E menm i annan latak ki'n ganny fer ek mwan la *off-mic*, ou'n tande? As *if* mon sipoze per Mr Speaker. Me mon pa per personn. Me Selman mon ti a kontan demann ou zot koze, nou koze donn lepep i ava deside. Ki zot pe per? Zot an mazorite i annan zot tou la i annan 25 sez vid zot pa kapab - zot per. *Come on.*

MR SPEAKER

Mersi. Mon komanter lo *point of order* i reste parey. Evite fer lakizasyon personnel kont lezot Manm. Onorab Gill, ou annan en laparol.

HON CHURCHILL GILL

Mersi Mr Speaker. Bonzour tou dimoun dan Galeri. Bonzour tou Manm e tou dimoun ki pe ekout nou. Mr Speaker, I tre enportan ki Seselwa i konpran vre rezon ki sa Mosyon in vin dvan Lasanble. Premyerman se pou

kre distraksyon dan pei pou maske *fiasco* Lasonpsyon kot profesyonnel in ganny tire dan zot *job* zis aköz zot pe protez Zil Lasonpsyon.

Par move desizyon Gouvernman *LDS* ki'n potansyelman met Aldabra dan en gran risk. Dezyenmman, aköz gran panik dan kan *LDS* vi ki zot konnen ki Seselwa pe al vot zot deor le 27 Septanm 2025.

(APPLAUSE)

HON CHURCHILL GILL

Mon a ilistre Mr Speaker. Tou sa landrwa pou fer *rally* anvil, in al fer *rally* dan bwa. Apre ler *rally* pa plen, nou kriye bous trou. Be tou i vid. Sa Mosyon pa pou al okenn par Mr Speaker. Sanmenm ki nou apel politik bon marse.

Mr Speaker, tou Seselwa i a mazine ki an 2020 stratezi *LDS* sete pou zwe lo lemosyon tou bann fanmir e voter Seselwa.

Atraver bann temyayaz *TRNUC*, nou'n pase sa letap. Komisyon *TRNUC* ti konplet rapor e soumet avek Prezidan Larepiblik le 31 Mars 2023, 9er bomaten. Avek tou bann rekomandasyon ki ti'n tonm dakor lo la. Ki nou'n vwar Mr Speaker? Ozordi Zilyet 2025, 2an 4 mwan apre naryen pa'n ganny fer.

I kler ki lobzektif *LDS* ti'n fini ganny realize. Prezan zot napa okenn lentere pou enplimant rekomandasyon *TRNUC* pou etabli closure, reparasyon, reabilitasyon e konpansasyon kot i neseler pou bann viktim. Sa loter Mosyon pa koz lo la? Eski zot krwar ki Seselwa in bliye? Loter Mosyon pe zis kre distraksyon.

Ladministrasyon *LDS*, in *fail* mizerableman pou delivre pou sa bann dimoun ki ankor pe espere apre tou sa letan. Zot ti lev lekspektasyon sa bann dimoun, zot ti promet konpansasyon gro, gro sonm, fer *meeting* apre *meeting* ki pa'n abouti dan naryen. Tousala ti zis en bat latet. Eski zot krwar zot in vreman bat latet sa bann dimoun? Pou annan konsekans dan bwat vote le 27 Septanm 2025.

Mr Speaker, Ladministrasyon *LDS* in *fail*. Prezan zot sey rod en lot seval batay pou zot sey anbet Seselwa pou ganny popilarite pou sey ganny vot avan eleksyon. Ki zot in fer pandan sa dernyen 4an edmi? Zot pa'n vin ek okenn plan e program pou fer marse pei.

Mr Speaker, la ki zot in preski fini koup tou riban bann proze ki ti lo program Gouvernman *United Seychelles* zot in realize ki sa

bann politik premye pyer pa pe donn okenn *mileage* politik.

Pou Seselwa sa zafer premier pyer pa fer okenn sans zis en gaspiyaz letan par en Gouvernman enkonpetan. Pas partou dan tou kwen pei, met premye pyer Seselwa pou senpleman vot zot deor. Mr Speaker, dan politik ler ou war serten aksyon ki manifeste son lekor tel parey pratik otokrasi. Pouwar i reste e egzekite par en sel dimoun.

E i apre pou fer nenport kwa pou retenir sa pouwar. En Lasanble ki fonksyonnn dan en fason otoriter e diktater, ki zis swiv lenstriksyon pou sey silans bann Manm nou kote latab pou sey elimin *checks and balances* ki malerezman i ganny fer zis par bann Manm dan lopoziyon. Lot kote latab zis zot praise zot *praise* zot Gouvernman pou fer sa pep soufer.

Mr Speaker, sa i manifeste son lekor tou le semen dan nou Lasanble. Dan lot brans Gouvernman, en Zidisyer konpromize atraver bokou sityasyon ki pe arive dan pei. En sekter piblik kot profesyonnel byen konsekan e kalifye pa neselerman lib pou delivre lo zot responsabilite, dapre zot profesyonnalizm. Ler zot pran desizyon dan lentere pei, pou sov nou patrimwann zot ganny met deor.

En mannev senm lafreyer parmi nou bann profesyonnel. Apre nou vwar zis bann *loyalist* dan bann pozisyon kle, bann dimoun ki pou fer tou sa ki zot ganny dir koz zot pa kapab demann kestyon. Loter Mosyon pa koz lo la? Zis anmenn Mosyon pou distraksyon? Laliberte medya i ganny konpromize.

Apre ou vwar logmantasyon *blame game* pou zistifye sa bann promes kase, ki pa'n zanmen delivre pou pep Seselwa. Blanm tou dimoun pou lenkonpetans sa ladministrasyon. E la zot anmenn Mosyon lo Masion du Peuple. Ki zot ekspekte gannyen avek sa Mosyon Mr Speaker?

Zot in fini perdi tou kredibilite ki sa pep ti'n met dan zot. Mr Speaker, sa ladministrasyon in kas tou bann bon pratik ek striktir ki ti'n ganny met an plas ki ti pe garanti sipor pou tou kous Seselwa kot ti neser. Me zot in detri tou ek koup tou.

Mr Speaker, apre ki nou vwar? En ladministrasyon ki pe kre panik zis aköz zot santi ki sipor in kit zot par voter Seselwa. Kot serten endividi in perdi zot lavi oubyen ganny gravman blese, tel parey nou ti vwar kot prizon Montagne Posee.

Ziska ozordi naryen konkret pa ankor ganny

eksplike. Loter Mosyon pa koz lo la? Montagne Posee Seselwa i oule laverite, ankor distraksyon Mr Speaker.

Mr Speaker, Seselwa dan son gran mazorite pou al vot sa ladministrasyon deor le 27 Septanm. Zot pe al perdi sa eleksyon. Wi Mr Speaker, zot pe al perdi sa eleksyon, menm si Onorab Georges pe sey kit lespwar vivan dan son kan lo Mosyon *Maison du Peuple* i zis ankor distraksyon pou sey anbet Seselwa.

Mr Speaker, loter Mosyon i konn tre byen ki *Maison du Peuple* ti ganny fer dan linite par sa gran fanmir siporter sa parti atraver travay volonter pou met debout sa batiman. Fodre note ki zabitan Praslin osi ti kontribye e zot ti fer sir ki zot ti fer desann ros rouz kot ozordi nou vwar in dekore otour sa *building*.

Mr Speaker, s ai loter sa Mosyon pa dir Seselwa se ki i normal pou en pei zanmi donn sipor enn son pei zanmi atraver siman, feray. Sa i tre senp. Me en kestyon ki loter Mosyon pa'n klersi se ler 2 pei i zanmi i komans atraver sa mouvman sa letan dan sa pei ki ti an plas. E sa 2 mouvman ti tonm dakor ki zot pou sipor kanmarad, zot pou akote kanmarad.

Se sa ki sa donasyon pou *Maison du Peuple* ti ganny fer ant 2 mouvman, me non pa

antre 2 pei. Mr Speaker, si zot obsede avek *Maison du Peuple*, apel zot *building Arpent Vert* *Maison Arpent Vert*. Seselwa, *LDS* i dan problemm zot dezespere. Zot seval batay 2020, in fini mor. Viktim *TRNUC* in perdi konfyans dan zot. Apre tou sa bann promes zabitan *Cascade* in ganny kit ater.

Fanmir bann dimoun blese, afekte e mor dan lensidan *Montagne Posee* zot osi zot pe esper larepons. Mr Speaker, eski i pa devret annan en lot *TRNUC* lo sa lensidan *Montagne Posee*? Pou nou konnen lekel ki'n donn lord. Lekel viktim, lekel *perpetrators* aköz sa bann fanmir sa bann dimoun ziska ozordi zot ankor pe espere pou konnen ki egzakteman in arive, ki'n koz lanmor e blesir.

Mr Speaker, zis dan 4an 9 mwan Sesel in retourn pli deryer ki i ti ete. *LDS* pa'n delivre naryen pou sa pep. Pep Seselwa in fini vwar kantite anbete ki parti *LDS* in anbet zot. *LDS* nepli konnen ki zot pou fer, zot nepli annan stratezi politik. I pa drol prezan zot pe tay partou dan tou direksyon deryer *building Maison du Peuple*.

Mr Speaker, mon oule met lo rikord ki sa lafoli e dife ble ki *LDS* i annan ek sa batiman *Maison du Peuple* pou tennyen e zot pou kit sa

building Maison du Peuple kot i ete! Mersi Mr Speaker.

(APPLAUSE)

MR SPEAKER

Laparol pou Onorab Woodcock.

HON WAVEL WOODCOCK

Mersi Mr Speaker. Mr Speaker, ler ou war en Manm Onorab dan son lentervansyon i vini i fer zis bann latak personnel, enterven an ki'n koz avan mwan i osi zot *Leader* Lopozisyon in fer bann latak personnel. I montre klerman ki zot napa okenn largiman valid. Mon konnen poudir *rally* Dimans pase in fatig zot, zot latet i vreman fatige Mr Speaker. Sanmenm ou tann zot pe gele, zot pe sote Mr Speaker.

E mon pa bliye ler son sorti Grand Anse pe desann par Anse La Mouche mon ti war 4 zot o bor semen pe sey fer tapaz Mr Speaker. Apre zot in kanmi zot in taye Mr Speaker aköz zot vreman for Mr Speaker. Me selman nou konnen poudir byento zot pou dan bin listwar. Mr Speaker, Onorab *Leader* Lopozisyon i dir i get dan *camera* i dir, i pa'n koz avek Lepep Seselwa li en. In koz avek son bann siporter.

E i dir zot koumsa, i dir zot koumsa ki nou pa pou large *Maison du Peuple*. Olye

koz avek Lepep Seselwa i koz ek son bann siporter avek en larogansite. E klerman i montre ki *Maison du Peuple* i zot aki, i pou zot e zot pa enterese avek Lepep Seselwa. Zot pa enterese ek en *assets* ek en later ki ti pou Lepep Seselwa. E plizyer bann *assets* ek bann later ki zot in akimile pandan zot letan ki zot in la Mr Speaker.

Mr Speaker, *Maison du Peuple* fodre i ganny rann avek Lepep Seselwa. Parey nou dir ou bezwen rann *César* sa ki pou *César*. E levidans i la Mr Speaker. Levidans i kler dan labi bann labi lepase e ki zot ankor pe fer e profite ozordi avek sa bann *asset* ek later ki zot in akimile pandan zot letan Mr Speaker, ki zot ti o pouvwar.

Nou fek war Mr Speaker, en Mosyon devan nou Lasanble Nasyonal. Klerman kategorikman tou dimoun in war, tou dimoun in tandé, levidans i la *NISA* Mr Speaker. En propriyete, en popoyote ki zot in gannyen pou R50mil Mr Speaker, apre ki zot in lwe pou R700mil Mr Speaker, ankor lo lasyer Lepep Seselwa.

Nou antann listwar pa bokou letan pase, ase resan dan 6enm Lasanble *STC Bois de Rose* ankor en lot labi bann later ki zot in gannyen pou naryen annefe pou R6 mil. R6 mil Mr Speaker, ki zot in lease

pou plis ki R800 mil par mwan avek en antite Gouvernman Mr Speaker, ki zot in revann. Ki zot in vann apre avek *STC* pou 17 milyon. E ki *over the years* zot in akimil milyon e milyon e milyon.

Parmi plizyer bann propriyete Mr Speaker, ki zot in akimile, nou'n tann koz lo la resaman, dan lepase. Ozordi nou ankor pe tann koz lo la. Nou tann zot Prezidan ki'n akimil 10 arpan later pou R 40mil. Nou tann son madanm ki'n akimil later li osi bann plis ki 10 laplenn foutbol Mr Speaker. Bann ptipti bout parey i ti apele Mr Speaker kot li ek son bann zanfán in donn bal lo la Mr Speaker.

Nou'n tandé resaman kot zot ti pe sey vann *Flamboyant* pou plis ki R70 milyon ki nou'n bloke Mr Speaker. English River zot fek vann Mr Speaker, pa tro bokou letan. Tousala se bann later, bann *Asset* Leta ki zot in profite letan zot in la, akóz se zot parti sa letan e letan pti parti Mr Speaker.

St Lousi Mr Speaker, en landrwa ki ti pou deserve bann zabitan St Louis zot in vann. *Horizon Complex* ankor Mr Speaker, zot in vann si mon pa tronpe ek Ramoo zot kapab koriz mwan zot menm pou si mon pa tronpe R100ekek milyon Mr Speaker. Moulinie nou'n tandé en landrwa kot ti

annan en *gym* pou zannan bann alter ki Onorab Churchill Gill li menm ti vini ti dir koumsa aköz Gouvernman pa aste.

Be aköz *US* pa ti rann sa later Gouvernman Mr Speaker pou deserve bann zenn? Nou bann zabitan dan *Cote D'Or*, Dan Moulinie partou Mr Speaker.

I montre zot larogans Mr Speaker, parey *Maison du Peuple* ki zot *Leader LOTO* in dir avek son sipòter s ai pou nou, nou pa pou rann i pa pou Lepep Seselwa aköz zot vorasite Mr Speaker. *SUPP/SPPF/US* zot in pran, pran e pran later, larzan e zot in menm Mr Speaker, pran Laliberte nou frer ek ser Seselwa ki nou ti ganny libere Mr Speaker, ler *LDS* ti win eleksyon an 2020.

E zanmen in annan sa kalite Laliberte, Laliberte lekspresyon e vre Laliberte dan nou pei ziska ler an 2020 ki *LDS* ti vin o pouvwar Mr Speaker. *SPPF* ozordi i en parti ki'n ne dan mansonz. *SPPF* ozordi Mr Speaker, i en parti ki'n ne dan mansonz. I en parti ki'n viv dan mansonz, e zot en parti ki pou mor dan mansonz.

Ozordi *United Seychelles* i enn bann aparti pli fay ki annan Sesel Mr Speaker. E dan nou *rally* zot bann ex kandida, detrwa zot bann ex

kandida 2020 ti dan nou *rally* Mr Speaker. Zot bann dimoun, en dizenn zot bann dimoun ki ti koz dan *PBB* dan son *PBB* an 2020. Me zot ex kandida e Mr Speaker, mon a dir zot en keksoz ankör.

Zot bann aktivis ki ti koz dan zot *PBB* ti dan nou *rally* Dimans. En kantite, get devan dan nou *rally* Mr Speaker. Zot pou konnen byento lekel. Mr Speaker, *US* son nesans ti enn ki dan mansonz kot far ti dir ki en group dimoun in fer koudeta apre zot in dir li vin Prezidan. Sa in ganny denounce dan liv ki Onorab *LGB* in koz lo la, kot dan son liv i ti fer *statements* ki sete Rene *was the architect of a coup and was always in charge*.

Annefe i annan levidans devan *TRNUC* Mr Speaker, kot ti annan dimoun ki ti pe ganny torture. E France Albert Rene ti la avek son sigar pe fimen pe gete kot sa tortir pe deroule. Dan *TRNUC* e i ti pran plezir dan tortir dimoun Mr Speaker. E la ozordi *US* pe repet tou bann vye retorik lepase.

Mon a dir ki Albert Rene ti dir, si zot pa kontan ale. Bato i pase, avyon i pase. Zot *current* Prezidan Mr Speaker parti Herminie *US* i dir zot si zot pa kontan,

"Put up or shut up!"

"Bous zot labous!"

France Albert Rene ti dir,

“Si zot mor dousman, pa li lafot pa mwan lafot”,

Si zot mor vit - pa li lafot osi.

E nou’n vwar ki’n arive resaman Mr Speaker. E nou ti war apre ki’n arive sa ki mor vitman in mor vitman. Sa ki’n mor dousman, in mor dousman. E la ozordi ou annan en leader en parti ki li i vini son bann retorik ki i pe repete dan sa kastrol resofe Mr Speaker, i pe dir zot pou *end up* dan en rigol anba en pon.

E *Leader* Lopoziyon i dir ou koumsa pa koz mal lo en defen Mr Speaker. Me Selman se zot ki pe sey resisit en defen Mr Speaker. Atraver son bann retorik, atraver sak fwa zot mont anler lo stage zot glorifye tou sa ki sa defen in fer Mr Speaker. E ozordi dan bann liv zistwar, nou annan bann dimoun parey *Mussolini*. I annan bann dimoun parey *Hitler*, nou annan bann dimoun parey *Idi Amin Dada* i dan liv listwar aköz nou bezwen konn listwar bann atosite ki bann keksoz ki’n pase pou nou pa zanmen repet sa bann keksoz ankor dan nou pei Mr Speaker.

Sa vye sabrouye pa pou zanmen koup ankor Mr Speaker. E Seselwa pa pou zanmen pas dan sa soufrans ankor Mr Speaker. *LGB* in eksplik byen avek levidans lo Konstitisyon Sesel ki ti ganny

forse dan lagorz Seselwa le 5 Zen 1977, menm zour ki zot ti met premye pyer *Maison du Peuple*.

En Konstitisyon ki ti marye parti *SPPF* ansanm ek Gouvernman kot Leta ti parti e parti ti Leta. Mr Speaker, zot ti *one and the same*. Me apre sa Mr Speaker, levidans i la tro bokou levidans ziska ozordi nou ankor pe donn levidans zot bann labi Mr Speaker.

Nou vwar ki mannyer sa parti *US* in ganny bokou plis ki Seselwa, se zot ki’n profite, se zot ki’n benefisye. Sa bann Minis ki’n pran sepa konbyen kare later, sa bann ki’n fer atosite Mr Speaker, ki Mr Speaker, zanmen zot in ganny pini.

Mr Speaker, nou’n war levidans nou’n vwar sa ki zot in fer. Dan nou Konstitisyon dan Lartik 5 parey *Leader* Gouvernman Biznes in eksplike ti annan en alokasyon ki *Central Government* ti fer avek zot parti Mr Speaker.

E se sa bann menm larzan Mr Speaker, ki zot in pran Mr Speaker, enkli bann *asset* Gouvernman pou met dan Konstitisyon bann batiman ki zot pe rezouir ladan ozordi enkli dan konstriksyon *Maison du Peuple*.

Larzan *Central Government* in al ladan Mr

Speaker. Larzan Lepep Seselwa in al ladan Mr Speaker. E ozordi Mr Speaker, ler mon tann Onorab Churchill Gill koze, i dir bann dimoun volonter ti vini pou ede travay. Mr Speaker, sa bann letan ki volonter? Volonter ou bezwen desann, si ou pa desann i konsern lanmor, prizon, ouswa legzil.

Pa desann? I dir ou desann vin konstri ou pa desann? Pa desann? Si ou pa desann ou pou war ou dan en rigol anba en pon, ouswa in met 2 blok avek ou i zet dan kannal an deor Ste Anne Mr Speaker. Pa desann sa bann lepok? Ou a vin koz ou volonter? Ozordi ki annan volonter. Volonter Mr Speaker, 2 Sanmdi mon a dir ou kote Mr Speaker. 2 Sanmdi Grand Anse Praslin bann volonter in desann Mr Speaker, ti annan US ek LDS ki ti prezan pou nou fer en *gym* pou nou met an plas en *gym* Mr Speaker, o bor *building* NSC o bor *Water Sport Center*.

Ti annan US, ti annan LDS. Volonter person pa ti ganny bate, person pa ti per zot ti desann a zot prop volonte Mr Speaker, pou zot vin fer travay. Sa ki volonter Mr Speaker. Pa sa bann lepok, sa bann lepok pa ti egziste volonter. Si i dir ou desann, desann Mr Speaker. Akoz sa

letan lepep sete Gouvernman, e Gouvernman sete lepep.

E zot in donn bal dan larzan Gouvernman, pran later Leta pou naryen pou en R1 parey *Maison du Peuple* ki later ti ganny transfer lo zot bokou pli tar an 1996 Mr Speaker. Servi Later Gouvernman pou fer *building* pou zot pou *SPPF/US*. Pran sa bann menm later ki zot in gannnen avek Gouvernman pou naryen.

Pran Larzan Gouvernman ki zot in gannnen avek *Central Government*, fer *building* lo Later Gouvernman ek Larzan Gouvernman apre parey nou'n war ek *NISA* ek *STC* Mr Speaker, *Horizon Complex* Praslin e lezot plizyer lezot landrwa ankor Mr Speaker. Apre pran tou sa bann larzan ki sa bann *building* in fer atraver *rent* i vin pou zot, pou parti me pa pou Gouvernman Mr Speaker. Akoz leta sete zot e zot, zot ti Leta Mr Speaker.

Mr Speaker, *LGB* in dir klorman, in dir en keksoz vreman enportan Mr Speaker, pandan sa 5an nou'n donn zot letan vin devan. Nou'n esper zot pou fer premye pa pou zot rann sa bann later. E dayer avan Gouvernman ti sanze an 2020, ti annan langazman ki Mr Faure e Mr Meriton *VP* Meriton ti fer pou rann serten later.

Me koman Herminie i vin dan parti, zot kennsel tou sa bann laranzman ki Danny Faure ek Meriton ti'n fer. E zot taye zot vann tou sa bann later partou kote Mr Speaker. Bann move dimoun Mr Speaker. Nou'n esper zot Mr Speaker. Zot pa fer li, nou'n esper zot Mr Speaker, vin fer en *statement* e demann pardon pou bann atosite ki zot in fer.

Me ki nou'n war? *Leader* Lopozisyon i vini i dir mon fyer mon parti, mon fyer nou bann aki, mon fyer tou sa ki nou parti in fer, *ok*. Mon krwar dan vizyon mon parti, i *ok* tou sa bann keksoz ki'n deroule Mr Speaker. Zanmen li koman *Leader* Lopozisyon in deza demann en pardon Lepep Seselwa. La li kandida Vis-Prezidansyel pou tou sa bann atosite ki son parti in fer e son Gouvernman in fer, aköz Gouvernman sete parti e parti sete Gouvernman Mr Speaker.

Mr Speaker, nou bezwen konn laverite lo sa ki'n arive ek *Maison du Peuple*. Lepep Seselwa i anvi konn laverite. E nou bezwen annan en tel Komite Mr Speaker. Pa ozordi, pa demen laverite pou sorti Mr Speaker. E fodre ki en Komite i ganny *set up* pou *investigate*, nou ava *investigate*.

Anba nou *Standing Orders* Mr Speaker, anba nou Konstitisyon Lasanble i kapab kre bann Komite pou

investigate Mr Speaker. Nou annan sa lotorite pou fer li. *US* i pa en labitid i pa en laverite. Eski zot kontinyen koumsa par sey kasyet bann laverite Mr Speaker, apre le 27 Septanm 2025 si zot ganny en sez dan Lasanble Nasyonal zot byen gannnen Mr Speaker.

Atraver nou ladministrasyon, ki tors in ganny klere. E ozordi nou ladministrasyon pe tir tou sa bann salte ki *US* in kit deryer. Nou pe met lord partou dan later, dan bann koripsyon lo bann fasilite ki zot in kit anrin. E nou pe met an plas bann fasilite ki pou bokou lannen nou pep i deserve Mr Speaker.

MR SPEAKER

15 minit Onorab.

HON WAVEL WOODCOCK

Mr Speaker, nou koman en ladministrasyon. Nou koman *LDS*, nou pou kontinyen travay pou nou elimin tou labi, vol ek tou form koripsyon dan nou pei. Nou bezwen konn laverite, sa Komite kontan pa kontan *US* pou ganny *set up* nou pou fer sa *investigation*. E mwan mon dir ozordi, en zour ki apel en zour *Maison du Peuple* pou retournen pou Lepep Seselwa. Mersi bokou Mr Speaker.

(APPLAUSE)

MR SPEAKER

Bon, nou a pran poz la. Nou a kontinyen deba nou a rebran 11er 05. Mersi.

(BREAK)

MR SPEAKER

Nou a rebran lo deba. Mon a donn laparol Onorab Gabriel.

HON CONRAD GABRIEL

Mersi Mr Speaker. Mon a dir bonzour tou dimoun, espesyalman bann zabitan Point Larue ki a lekout. Mr Speaker, atraver ou i annan en Onorab ki'n dir Onorab ki'n koz avan mwan. In dir ki nou bann aktivis ti vin dan zot *rally* Dimans.

Onorab, si nou pa dir nou bann siporter vini, pati pou bouse sa bann trou spesyalman bann trou deryer, *ok*. Mr Speaker, ler mon Analiz sa Mosyon. Ler mon analiz sa Mosyon sorti kot *Leader* Gouvernman i fer mwan demann mon lekore si Onorab Georges in fer byen son resers lo sa zafer *Maison du Peuple*. Mwan mon panse akòz in war *US* i pli for ki zanmen, e i oule vin kouyon sa pep!

MR SPEAKER

Onorab! Onorab! *Language, language*. Annou pa al pli lwen ki kot nou'n arive deza silvouple. Langaz. Mersi.

HON CONRAD GABRIEL

Mersi Mr Speaker. Be Selman nou bezwen met lo rikord ki lot kote latab osi in servi sa Mosyon "kouyou" la. So, ...

MR SPEAKER

Onorab, ou tann mwan? Sot sa fraz e kontinyen avek ou diskour.

HON CONRAD GABRIEL

Mon a ekout ou gidans Mr Speaker. Onorab loter Mosyon, ase sey vin anbet sa pep. Nou vwar ou dan gran kler. Oule dir mwan *LDS* in sitan dan mod panik, ki prezan akòz zot annan en mazorite zot pou fer sa ki zot anvi dan sa pei e osi byen ki dan sa Lasanble. *Motorcade* big problem. *Rally* zis trou partou, kot Ras Ricky in bezwen konpoz en sanson deswit lo *stage* bous tou trou deryer partou.

Nou ti warn zot, nou ti *warn* zot, zot pa ti pran nou serye. Nou ti *warn* zot, zot pa ti pran nou serye. Mr Speaker, dapre mon resers - dapre mon resers an Avril 1981 Prezidan Alzeri Kolonel *Chadli Bendjedid* ti vin Sesel pou en vizit ofisyel 2 zour. I ti al reste *Mahe Beach Hotel*. Annefe i ti pe fer en tournen dan bann pei Lafrik tel ki *Mali, Angola, Congo, Zanzi, Zimbabwe, Mozambique, Tanzania*,

Madagascar e finalman i ti ariv Sesel.

Dabor i ti'n fek ganny elekte Sekreter Zeneral parti inik *FML*, pou ranplas Ansyen Prezidan Houari ki ti mor en pe letan avan. Dan sa pozisyon i ti otomatikman vin Prezidan Alzeri. Isi Sesel i ti ganny resevwar par Prezidan Parti *SPPF* ki ti osi Sef Deta Sesel, e sa se pa lot ki Mr France Albert Rene ki sak fwa zot tann nonm son non en keksoz *somewhere* i grate ek zot.

Relasyon ek sa 2... relasyon ant sa 2 pei ti pros. Zot ti annan menm vizyon pou develop zot pei. Ti annan en kantite etidyan Seselwa ki ti fer letid Alzeri. Bann ki pe ekout mwan i konn sa zistwar tre byen. E la lo sa note Mr Speaker, i fer mwan mazin defen Joe Samy par egzanp e osi Mr Pat Mathiot ki ti travay kot SBC e en dizenn ankore ki ti ganny *full scholarship*.

Alzeri ti osi anvoy plizyer dizenn ansennyan isi e tousala ti ganny peye par zot prop Gouvènmman. Pou vin lo sa deba *Maison du Peuple* prezan. Pandan son vizit Prezidan Chadli ti fer en don finansyel pou nou konstri en batiman dan Victoria. Sa ti ganny donnen avek Prezidan Rene dan son kapasite koman Prezidan Parti *SPPF*.

Se la kot tou ti komanse. E sa zoli batiman, ti ganny

batize *Maison du Peuple*. E kot *SPPF* ti fer son *headquarters*. Pandan 44 lannen nou'n kontinyen servi sa *building*, san ki in annan okenn kankan lo la ziska la ozordi Gouvènmman *LDS* i deside fer lanket lo kote e ki mannyer nou ti ganny nou kado.

Mr Speaker, sa se larogans politik en *witch hunting* ki pa pou ariv ankore okenn par. Parfwa mon demann mon lekor ki nou'n fer loter Mosyon sa 10 nou ki la. Sa i bezwen en keksoz personnel Onorab. Ou'n dan zidisyer pou plizyer lannen. Ki ou vre lentansyon atraver sa Mosyon? Vin fran eski John Charles Wavel Ramkalawan ki'n don nou sa kalite Mosyon pou anmennen lavey en eleksyon?

I montre ou ki father i vreman per. Tou fason i per menm, sansan i pa ti pou denigre son bann oponan politik dan sa swadizan *rally* ki i ti fer Dimans pase. Mr Speaker, atraver ou *LDS* is anti ki sel fason pou met nou ater lo nou zenou apre zot lesey pou sey fer nou disparet pa'n marse. E la stratezi se sey met nou dan en serzwen. E sa i demontre klèman atraver sa Mosyon. Onorab Georges, eski ou'n fer bye nou resers?

Ou pe senpleman fer pep Seselwa ankoler, mon pa pou servi sa lot mo. Mon krwar nou

bezwen rode mannyer ou'n ganny *Maison du Peuple* pandan tou sa 4an trwa kar lannen nou'n sibir maltrete dan sa Lasanble zis aköz nou t i pe *fight*, nou ti pe lager pou tou Seselwa zour en meyer lavi.

E ou, ou en dimoun ki'n maltret nou a plizyer repriz. Dan mon Distrik Point Larue, bann zabitan in vwar sa klerman ki napa lavi ek sa kalite Gouvernman ki o pouvwar. Bann ki pa ti krwar dan mwan, la i zot sans pou met sa konfyans dan mwan. Mwan mon pa pou dezapwent zot travay dir i pa vedir i fer tapaz. Parey en dikton Kreol i dir barik vid i fer bokou tapaz.

Sa Mosyon li menm i demontre klerman lentansyon sa parti ki o pouvwar. Zot abilite pou diriz pei pa lo nivo e nivo i ba. Zot ankor feb marmay! Pou konklir mon a demann tou solda pou met pare pou sa gran *rally* Dimans aköz senpleman sa Gouvernman pa'n delivre. Zot pa'n gard sa promes ki zot ti fer ek sa pep. Zot pe diviz sa pep dousman, dousman atraver zot bann aksyon. Nepli tan pou fer Seselwa dormi boner.

Mwan mon pe dir ek Gouvernman *LDS* les nou *maison* trankil lanmenm, get ek zot lizye, fini ek zot leker!

Kit li lanmenm, konmdir zot menm! Mersi - mersi.

(APPLAUSE)

MR SPEAKER

Laparol pou Onorab Labonte.

HON ANDY LABONTE

Mersi Mr Speaker. Bonzour Mr Speaker. Bonzour tou koleg Onorab. Espesyalman bonzour tou zabitan Larivyer Anglez. Bon Mr Speaker, ozordi mon pran laparol lo sa Mosyon. Ou konnen, ler nou pe koz lo batiman *Maison du Peuple* li menm li, i annan bokou listwar, i annan bokou keksoz ki'n ganny dir.

E ler mon'n tann Leader Lopoizyon koze pou plis ki 30 minit, i klerman ki zot pa pe kapab koz avek Lepep Seselwa pou fer Seselwa konnen poudir wi sa Mosyon sel keksoz ki i pe dir se i en batiman ki ti ganny donner pou Lepep Seselwa. E wi i annan en kantite Seselwa ki'n partisipe pou kapab met sa batiman debout.

E enn parmi se en msye ki fek anvoy mwan en mesaz in dir ek mwan dir avek Onorab Pillay atraver ou Mr Speaker, son non i apel Gonsalves Maxime Harry koni koman Kadril. E i ti partisipe li osi dan konstriksyon.

(technical break due to power outage)

MR SPEAKER

Nou regre pou sa lenteripsyon. Zis nou a dir nou piblik ki sa ki'n arive elektrisite in koupe dan nou rezyon. In pran 30 segonn pou nou zenerater rebran. E nou'n ganny lalimyer e *power* anndan. Me selman nou kominikasyon avek SBC in koupe. E se pou sa ki nou'n bezwen pran sa *technical break*. Nou a kontinyen, Onorab Labonte i pe fer son diskour.

Avan mon kontinyen mon oule *remind* bann Manm pou evite mansyonn bann non dimoun an deor, aköz sa touzour dan mon leksperyans touzour ou annan en pe dimoun ki kontan me ou annan dimoun ki pa kontan aköz fanmir i gran.

So, mon pou dir dimoun pou evit ankor okenn *misunderstanding*, evite servi bann non dimoun an deor. Onorab Labonte silvouple, mon pou zi demann ou pou kontinyen kot ou ti'n arive pou rezon letan. Mersi. Onorab Labonte ou annan laparol.

HON ANDY LABONTE

Mersi Mr Speaker. Mr Speaker, parey Mosyon ki nou pe koz lo la. I en lenzistis rezilta koudeta le 5 Zen 1977. Le 29 Zen nou ti *unveil* en

moniman dan Union Vale, e lapli ti tonbe. I montre ou ki mannyer Sesel i gele apre ki sa bann levennman ki *US* in fer Parti Lepep *SPPF/SPUP*.

Mr Speaker, rezon mon dir sa se ki mwan koman sa Manm Elekte pou distrik Larivyer Anglez. E zabitan Larivyer Anglez i dir ek zot poudir silvouple les zot *MNA* trankil les li fer son louvraz dapre ki mannyer i merite aköz se zot ki'n vot li la. E zot pou kit li lanmenm.

E Mr Speaker, en lot keksoz ankor ki zabitan pe dir ek zot vi ki nou pe koz lo *Maison du Peuple* mon pou kontinyen fer sa pledwari. I annan V8336 avek V8337 Mr Speaker, ti 2 kare later separe baze dan English River. En kote zot built en sel *building*, zot fer li netway enn. Zot koupe li a 2 lanmwatye i *community center*. Lot bout zot fer li vin biro Parti *US*.

Apre Mr Speaker, ki nou'n war zot kandida Prezidansyel ki sorti dan distrik Larivyer Anglez parey in ganny fer resorti. Ti annan en negosyasyon avan ki li i vin la avek ansyen VP Meriton avek ansyen Prezidan Danny Faure kot ti'n deside pou return sa propriyete pou retourn sa propriyete avek Leta, zis parey nou pe sey demande pou *Maison du*

Peuple la ankòr enn fwa ki li i ti deside.

Se non, i pou fer gro lebra i pou pran sa propriyete i pou vann avek en etranze. Apre nou demande lekel ki pe vann nou propriyete. Se zot e lafreyer zabitan Larivyer Anglez se ki i pe dir koman i ankòr boner silvouple annou retourn *Maison du Peuple* pou Lepep Seselwa, akòz zot osi zot annan par ladan. Pa selman pou en pti group minoriter ki'n fatigue abiz sa pep dan nenport ki fason. Em zot krwar ki poudir zot ankòr annan sa pouvwar e zot ankòr kapab.

Parey en msye ti'n fer sorti, i annan en vye sab rouye ki zot pe sey refit li. Be nou, nou pe dir ek zot *no way* nou pa oule sa. Akòz parey nou'n menm ganny dir Mr Speaker, ki si ou pa aksepte zot prensip ou pou ganny war anba en pon. E mwan mon dir ek zot zabitan Larivyer Anglez pa pou ganny war anba en pon. Non, nou pa aksepte parey in menm ganny dir "*either you put up or you shut up.*"

Bann lartik koumsa la Mr Speaker, se sa ki nou pa anvi tande. Ler ou pe dir pou dir ou en lafors danzere. Ki kalite danzere, ler ou pe fer nou krwar poudir tou sa ki nou'n travay dir pou nou gannyen nou kapab perdi li akòz i pou sap nou. Ou pe fer nou per, be nou pa anvi viv

dan lafreyer. E se pou sela rezon ki nou e dir avek zot, zot ankòr annan loportinite silvouple.

Rann sa ki apel pa pou zot *Maison du Peuple*, zot pa kontan ler nou servi sa term vole, me pou mwan sa i en gro vol ki'n deroule. Sa i en lenzistis ki nou bezwen rod en solisyon.

Mr Speaker, lenformasyon i kler. Mon osi mon'n fer en ta resers me si on pou al lo tou sa resers ankòr i annan bokou keksoz ki'n ganny dir. Wi, donasyon ler ti ganny donneren eski i ti dir ek zot direkteman poudir ok i pa ti pou lir koumsa lo sa plak "*Don du peuple Algérien au Peuple Seychellois.*"

I ti a dir en don parti *SPUP* ki'n ganny donn non pa koumsa ki in dir Mr Speaker. Me prezan lekel ki zot pe sey fer krwar? Zot pe fer krwar Mr Speaker, konmela nou konnen ki ler soley i leve, ki ler soley i kouse. Nou gran paran lontan serten pa ti endike pa ti konn lir. Ozordi sa bann menm dimoun i pe dir ek zot i pa pou vot pou zot.

Prezan ki zot pe sey fer zot, zot pe sey fer krwar sa bann marmay ki fek ne ki pa konn vre zot politik Sesel sey fer sa bann dimoun krwar. Konmsi sa bann zenn a dir koumsa konmsi i a dir non i

annan bann lanz ki'n vini. Sa bann dimoun pa lanz sa.

Mr Speaker, akòz petet mon pa konnen kekfwà sa lenz rouz ki fer zot krwar non. Be lenz rouz la, eki i afilye Mr Speaker? Avek disan. E s ai disan lepep nou bezwen aksepté i larealite. Mon pa pe kritik person direkteman.

Me Selman i nou listwar. E nou bezwen konnen Mr Speaker. E mwan mon pou dir ki sa Mosyon ki'n vini la i pa'n vin ni tro tar, ni tro boner. In donn zot letan pou dir zot rann li a lepep. Non, zot pe fer gro lebra i zis parey ler ti donn larmistis konsernan zarm. Serten ki ti deside ozordi ki nou'n war?

Mr Speaker, mon pa oule al dan sa bann detay. Me Selman i enportan...

MR SPEAKER

Wi i annan case Ankour lo sa size Onorab.

HON ANDY LABONTE

Egzakteman Mr Speaker. So, vi ki Mosyon pe koz lo *Maison du Peuple*, ler mon'n tann Onorab Sebastien Pillay bomaten vin la avek larm dan son lizye pou li sey fer Seselwa krwar poudir sa landrwa i pou zot e i dir nou pou kit li lanmenm. Wi, nou pou kit sa batiman lanmenm nou. Me selman i pou retourn pou Lepep Seselwa i pa pou reste

pou zot, sa ki zot bezwen met dan zot lespri.

Konmsi i so *simple* mon pa pe konpran akòz nou pa oule aksepté larealite pou dir sa keksoz pa pou zot, i pa apel pou zot. E mwan koman en dimoun ki mon zabitan i fer mwan konfyans. Mr Speaker, taler ler mon ti pe koze kouran in koupe, *ok*. Sanmenm sa ki ep montre zot lekel mon lafors zot, savedir les mwan trankil silvouple.

Les mwan travay pou mon distrik, *ok*? Alors, Mr Speaker, mwan mon poudir avek pep Seselwa *Maison du Peuple* pa apel pou *SPUP*, pou *SPPF* pou Parti Lepep. E la konmela zot in azout en pti bout ki fer pli gou ankor. Mr Speaker, sa bann dimoun i menm parey zot sey sanz zot, sey sanz zot me selman menm latitid.

E ler en dimoun i ouzel relev lanmor li ki in dir li? Lekel son per fondater? Ki i pe swiv? Me selman ki i dir ou? I en nouvo parti. Mr Speaker, mwan ler sa bann dimoun i koze nou ekout zot akòz pou en sel rezon. Akòz tou sa ki zot pe dir ou la, i annan keksoz zot pe kasyet. Me selman zot anvi ou krwar, sa ki ou tande la pa krwar sa ki ou pe tande ou. Akòz sa i zot fason fer.

Me nou dan Larivyer Anglez, nou pe dir nou pou kit li lanmenm. E *no turning back*!

E *Maison du Peuple* pou reste kot i ete wi, me i pou retourn pou Lepep Seselwa. Ler nou ranport sa laviktwar Mr Speaker, zot pou war vre lafors Seselwa. E Seselwa, i konnen kwa ki i anvi. E nou pou dir ek zot fran dan zot figir, *enough is enough*, zot pa pou fer nou krwar ankor dan sa bann keksoz.

Avek sa 2 mo Mr Speaker, mon pou dir mon pou siport sa Mosyon. E nou pou fer sir ki *Maison du Peuple* i pou retournen pou Lepep Seselwa. E petet atraver sa Mr Speaker, pou azoute nou a kapab ganny larzan pou rann sa bann dimoun TRNUC zot konpansasyon. Akoz zot, zot kontinyen vann. La parey nou retourn *back* lo batiman Larivyer Anglez Mr Speaker. Ler in ganny vann si mon pou dir konsernan sa larzan mon pou dan problem ankor.

Mr Speaker, i annan tro bokou keksoz pou koze. E menm la nou fek tann en alegasyon mon pa konnen si i vre Mr Speaker, konsernan en gro sofa. I vre, i pa vre? Nou pa konnen si i vre Mr Speaker tousala. Ou konpran? So, i annan bokou keksoz ki nou pou kontinyen dekouver Mr Speaker.

E nou dan Larivyer Anglez mon pou dir nou pa per zot. Vin ki mannyer zot anvi, e nou pou montre zot, zot semen

ler sa eleksyon rezilta i sorti Andy Labonte la li ki pou anler. E Prezidan Wavel pou kontinyen reste anler *State House*.

Avek sa 2 mo Mr Speaker, mon pou dir mon pou donn mon *full* sipor sa Mosyon, akoz se sa ki nou pe dir rann Seselwa sa ki pou li. Mersi Mr Speaker.

(APPLAUSE)

MR SPEAKER

Avek letan ki nou'n perdi, petet bann Manm a kapab fer nouvo zefor pou swiv *Order 59 "confine his or her observations to the subject under discussion"*. Fotespere bann Manm ki pe al koze. Ki ou *point of order* Onorab Loze?

HON JOHAN LOZE

Mersi Mr Speaker. Mr Speaker, mon oule koriz en *misapprehension*. Letan bann negosyasyon later ti pe deroule Prezidan Danny Roland Faure, ti'n fini *resign* lontan dan *leadership* Parti *United Seychelles*. I enposib ki Prezidan Faure in *involve* dan okenn negosyasyon later avek ki se swa. Mr Speaker, fodre ou bann Manm i arete koz lalang dan Lasanble.

MR SPEAKER

Mon aksepte ki ou'n met ou pwennvi. Mon pa kapab *rule* lo

la aköz mon pa konn egzakteman laverite ki dat ki keksoz i arive. Nou a kontinyen avek deba. Silvouple annou sey reste annord. Onorab Larsen ou annan laparol.

HON CECILE LARSEN

Mersi Mr Speaker. Bonzour a tous. Spesyalman zabitan Au Cap ki a lekout. Mr Speaker, alors zot problemn i ek *Maison du Peuple*. Mwan personnelman mon krwar ki sa pa pe ganny fer dan en lespri zistifikasyon oubyen lazistis. Me plito pou servi sa Lasanble an krwayan i a vin zot zouti pou tir benefis politik.

Par lefe ki *Maison du Peuple* i pou *United Seychelles* ki Seselwa pe soufer. Seselwa pe soufer aköz sa Gouvernman *wishful thinking* ki in *fail* sa pep e pa'n kapab *practice* sa ki zot ti preach. Get CCCL, Travizory, Lasonpsyon, TRNUC, zot kontan fer sa Mr Speaker. Nou tou nou konnen ki *Maison du Peuple* ti ganny konstrir dan en letan kot parti ti pe zwe en rol dirizan dan tou laspe devlopman pei, enkli lenfrastriktir.

Sa batiman ti ganny *finance*, par bann kontribisyon militant ki ti ganny organize atraver parti. Se pa Gouvernman ki ti konstri sa batiman ti ganny

finanse par bann kontribisyon militan ki ti ganny organize atraver parti. Se pa Gouvernman ki ti konstri sa batiman lo fon piblik. Me plito parti. Alor pou vin met sa propriyete an kestyon apre plizyer lannen i zis malonnet.

Seselwa i bezwen met antet ki si Sesel in ariv kot i ete ozordi i pa aköz LDS. Me plito aköz SPUP ki'n zwe en gran rol dan konstriksyon nou pei. Mon anvi met lanfaz lo bann priyorite sa Lasanble. Nou dan en moman kot dimoun pe lager pou pey zot *bill*, manze in ser, bann zenn pe rod lanplwa, zanfana pe tonm dan move lenfliyans. E sa Lasanble pe gat letan e resours e fer lanket lo en batiman.

Ki profi popilasyon pou gannyen avek sa? Sa lanket pa pou ed Seselwa. I pa pou met dipen lo latap, i ap pou fer pri komodite desann. I pa pou ed en etidyan pas son legzanmen, i pa pou fer en zenn ganny en lanplwa. E alors ankor mon poudir, sa pa en lanket pou ganny laverite. Sa i zis en mannev rod *political mileage* e distrer sa pep lo vre lenkonpetans sa Gouvernman.

Lasanble Nasyonal pa sipoze ganny servi koman tribinal politik letan Lepep Seselwa pe soufer. Lepep Seselwa i devret reflesir byen le 27 Septanm, e fer konfyans

Dokter Herminie ek son lekip devoue e konpetan ki annan tou Seselwa a ker.

(APPLAUSE)

HON CECILE LARSEN

Pa parey sa Gouvernman ki zis get en pti group dimoun avek ki zot ganny benefis. E pou mwan dir sa ki sa group dimoun pa zis Seselwa me osi etranze. Nou Lasanble i devret reste lo en nivo ki respekte drwa tou sitwayen, e pa vin en zouti pou persekit bann oponan politik.

LDS pe rod fason pou met lanfaz lo lepase e divizyon olye lavenir e linite. Eski sa ki ti zot manda? Annou aret servi listwar koman en batay, ed Seselwa pou en meyer lavenir e rann Seselwa sa *joie de vivre*. Mersi Mr Speaker.

(APPLAUSE)

MR SPEAKER

Laparol pou Onorab Adelaide.

HON FRANCOIS ADELAIDE

Mersi Mr Speaker. Bonzour Mr Speaker, Bonzour tou bann Manm Onorab. Etou dimoun ki a lekout. Mr Speaker, sa Mosyon pou en lenvestigasyon ki konsern *Maison du Peuple* mon krwar ki i en Mosyon ki annan son merit. E mon krwar nou devret get li ek en lapros en pe pli ouver, pa get li

koman en zafer politik. M annou get li dan tou nou grander lespri.

Bi sa Mosyon se ou konnen ler nou fer en keksoz, *LDS* i fer en keksoz tou kou i annan bann rezon pou krwar nou pa devret fer. E ozordi atraver sa Mosyon nou pe ed Lepep Seselwa pou reflesir, *ok?* Donn zot tou bann lenformasyon ki nou'n kapab gather, fer zot konpran aköz ki nou pe fer sa kalite. Aöz nou'n anmenn sa kalite Mosyon. E ki zot rol ladan pou zot kapab konn le vre sityasyon par deryer kwa ki atas avek *Maison du Peuple*.

E pou ki son bi *Maison du Peuple* e aköz mon krwar ki nou devret retourn li pou Lepep Seselwa. Mr Speaker, parey tou mon bann koleg Onorab in dir oparavan, sa ti en don donn donner par Gouvernman Algerie pou Lepep Seselwa. E mon'n ganny sans demann enn de bann dimoun ki'n dan sa parkour espesyalman bann ki ti ede, vreman zot dir ti annan bann travay volonter ki ti ganny fer. Parey mon zanmi ti dir si ti volonter, si ti forse petet mon pa'n demann zot sa kestyon.

Me selman ti annan travayer volonter ki tie de dan zot kapabilite pou zot kapab raport zot soutyen pou batir sa *Maison* parey i dir ki ti pou Lepep Seselwa. E parey nou'n

tann dir ti annan bokou bann pei ki ti ede avek bann donasyon, tel parey siman. Nou'n tann dir ti donn feray. Praslin ti donn ros rouz, e Seselwa an zeneral ti ede.

Ti annan bann osi ki ti fer bann *fundraising activities* zis pou anmas larzan. Me apre ti annan en konponan osi ki ti sorti dan Bidze dan *taxpayers money*. So, savedir sa larzan i pa ti pou vreman en parti politik. Me i ti pou Lepep Seselwa ki ti ede, akòz ki manner zot ti'n ganny dir poudir sa lakaz i pou en landrwa kot zot pou kapab vini detann, *relax*.

E petet fer bann keksoz tou kou nou koz fer desann pri lavi, petet osi ti ava en batiman kot ti ava annan bann keksoz ki ti pou ed Seselwa epanouir. E byensir le ren nasyon i epanouir, byensir zot konsyan lo zot bann depans. E sa ti pou ede dan fer desann pri lavi Mr Speaker. Mr Speaker, nou'n tann largiman se pa sa ti pou *SPPF* si nou oule vini vin prana koz sa i pou zot.

Mr Speaker, plen sa bann dimoun sa lepok wi petet zot ti siport sa parti. Me ozordi zot nepli siport sa parti. So, savedir oli zot kouraz? Zot kouraz zot pou kit laba kot sa bann dimoun ki zot in dezerte avek? Non, be zot kouraz zot pou kit avek zot. So, si nou

bezwen anvoy lazistis nou bezwen get tou Seselwa ki'n ede. petet i annan enn de ki ankor kot Parti *US*, sa i *ok*.

Me i annan en ta ki'n vin kot *LDS*. Me zot osi zot annan par ladan. So, savedir mon krwar poudir si nou pe dir donn Lepep Seselwa zot valer, retourn byen Lepep Seselwa. E mon vwar sa i devret en lokazyon i devret en loportinite pou Parti *US* sezi e montre poudir vreman zot ankor anvi travay pou Lepep Seselwa. E *why not* i pa en keksoz ki pe vin pou en dimoun. I pe retourn pou Lepep Seselwa.

E kot Lepep Seselwa ava kapab zouir manner zot kapab. Mr Speaker, parey nou'n toultan dir *US* in fer tou kalite mannev zis pou zot kapab retard progre dan Sesel. Mr Speaker, *US* in fer tou kalite mannev zis pou zot kapab retar progre dan Sesel.

Mr Speaker, *US* in fer tou kalite keksoz pou sezi byen en dimoun zis pou zot ganny lavantaz lo la. Zot in rann bokou keksoz, la zot in rann later en pe bout later. Pa bliye ot ti pran lakaz en dimoun, zot ti pran propriete en dimoun anvil e zot ti fer zot mize avek. E malgre bann presyon ki bann dimoun in mete zot ti rann sa mize.

E parey ki pou arive avek *Maison du Peuple* byensir zot pou bezwen rann byen lepep.

Zot pa kapab zwe gro lebra konmsi sa pou zot.

Mr Speaker, si pou Lepep nou bezwen retourn li avek lepep. Nou pa kapab fer bay en keksoz ki pa pou nou. Mr Speaker, pli gro problem ozordi ki nou pe gannnen avek sa Lasanble sirtou avek bann Manm Lopoziyon se akòz mon pran zot koman bann pti baba politisyen. Zot pa zanmen konnen ki'n pase dan zot listwar. E zot pe defann bann keksoz ki zot napa ni *ground* akòz ki zot pe defann Mr Speaker.

Mr Speaker, nou tann tout sort kalite lakizasyon. Nou tann tou kalite demagozi Mr Speaker. Les mwan dir zot poudir sa Maison du Peuple ki zot pe dir la, ti annan son premye bout avan sa en dimoun ki'n eksplik mwan. Ti annan sa premye bout avan apre ek ICCS zot ti fer ti sipoze ti pou vin en *extension*. E kot ti pou annan en mize tou ki Mr Rene ti met premye pyer fondasyon.

Mon tann zot pe dir ki nou pe swiv dan zot lepa pou met pyer fondasyon. Me eski zot konnen poudir apre ki zot ti'n met sa plak pou zot kapab konstri en mize laba an *extension* sa bout *Maison du Peuple*, sa pa'n zanmen konstri. Be nou, nou legzanp i pa koumsa nou. Nou, nou met pyer fondasyon apre nou *built*

zis parey nou ti met pyer fondasyon pou Klinik Baie Lazare e ozordi nou'n delivre klinik Baie Lazare byento pe al ouver.

Mr Speaker, ler ou pa konnen ki ou pe debout pou ou pa konnen ki ou pe debout ou pa pou zanmen kapab konn ou konviksyon ki ou pou fer Mr Speaker. Le problem parey mon pe dir avek nou bann *MNA* laba, se zot ankor tro zenn pou zot konpran listwar Sesel. Zot pa konnen ki zot pe lager, zot pa konnen Mr Speaker.

Zis en dimoun i vini i dir zot la, e zot les zot ganny servi pou zot defann en keksoz ki napa merit. E sa mon krwar ki zot pou bezwen sanz zot mantalite mwan mon'n tann bokou latak anvoye lo nou. Byensir mwan mon en Manm *LDS* mon ekout zot mon respekte, me Selman i pa vedir ki i byen. Me Selman vi ki nou dir nou annan tolerans politik parfwa ou bezwen asize ou bezwen ekoute me Selman i ap fer nou dibyen.

Me Selman akòz nou, nou la nou dir nou respekte lopinyon dimoun. Byensir deor Seselwa i ava kapab asize analize e zot ava konnen lekel sa parti ki pe koz laverite ouswa lekel sa parti ki pe koz mansonz. Mr Speaker, nou'n tann dir Parti Lepep in fer

bokou, bokou atosite ki mon pa pou al ladan.

E byensir in vol bokou loportinite pou lezot Seselwa kapab evolye. Zis nou pe mazin nou bann later Baie Lazare Mr Speaker. Nou pe lager pou en pe letan. E menm nou met restriksyon. Nou oule met restriksyon lo en bout later ki ti belong to zabitan Baie Lazare. Me zot ki zot in fer? Zot in pran sa bout later e byento mon tande zot pe fer prosedir pou vann.

E nou pou bezwen fer lobzeksyon. Si keksoz i ale drwat e nou vwar poudir vreman i annan merit, e sa zot in *acquire* avek tout si zot in *acquire* sa later dan bon fason byensir zot ava gannnen. Nou napa okenn *witch hunt* pou nou fer avek person. Si en keksoz i pou ou, ou merite byensir ou ava gannnen. Be si en keksoz i pa pou ou, ou pa merite ou pa kapab pran byen Leta apre fer krwar poudir byen Leta i pou ou Mr Speaker.

Mr Speaker, nou bezwen arete avek sa bann dimoun ki zot mazin zis zot lekor. Zis zot oportinis zot mazin tou bann bon keksoz pou zot e tou bann move keksoz pou Lepep Seselwa Mr Speaker. Nou pa pou kapab kontinyen avek sa kalite mantalite. Nou koman en parti nou'n koze nou'n dir

LDS nou pe vin defann nou drwa nou sitwayen.

E byensir s ai en lot ka *LDS* pe montre poudir nou, nou pe vreman swiv nou manifesto. Nou pe vreman kit nou prensip e nou pe defann keksoz ki apartyen pou Lepep Seselwa, byen Lepep Seselwa. E *Maison du Peuple* i enn. E mon byen kontan ki Onorab Georges in kapab anmenn sa Mosyon.

Byensir zot pe demande, zot pe dir pou dir nou pe zis gat letan aköz Lasanble pe al ariv lo son lafen. Son term pe al ariv lo son lafen e byensir zis nou vin gat letan. Mr Speaker, parey Onorab Georges in dir, nou, nou konnen ki kalite travay nou pe fer deor laba nou. E laba deor dimoun i kontan nou. E dimoun i pou byensir re elekte nou 2025 an Septanm pou nou retourn ankor dan Lasanble.

E Mr Speaker, nou, nou en parti ki konsistan nou konnen poudir ler nou komans en travay nou pou bezwen fin isa travay. E nou, nou pe trounen avek en mazorite pou nou vin kontinyen fer sa travay. E byensir nou pa pou vin zwe gro lebra avek zot, aköz nou, nou ti kapab Gouvernman dizour i ti kapab anmenn en *case* ankour e sezi *Maison du Peuple*.

Be nou, nou p anvi fer li koumsa, akòz mon konnen zot pou dir politik nou en viktimiz zot. Non, nou pa pou fer koumsa nou. Nou pou anvoy sa ek Lepep Seselwa pou Lepep Seselwa kapab analize. Nou pe sey donn zot parey monn dir tou lenformasyon pou zot analize, reflesir. E si nou trouve poudir i annan son merit, byensir Lepep Seselwa pou apiy nou e zot pou demann nou pou nou repran sa ki pou zot.

E zot ava trouve ki zot tou zot ava annan par ladan. E Mr Speaker, mwan tou kou mon pou dan Lasanble, mon pou touzour siport *LDS*, akòz *LDS* i en parti ki nou annan en bon pe keksoz ki nou'n montre. Nou annan sa lonnekte, nou annan sa lanvi travay e nou pe travay byen pou nou pei. E se pou sa rezon ki ou war dan nou bann *rally* nou kontinyen ganny plis dimoun ki vin *attend* nou bann *rally*.

E zot pa zis vin asize, vin bwar Mr Speaker. Si ou get tou nou bann dimoun ler i vin *rally*, zot port latansyon avek bann mesaz ki nou bann *leaders* i anvoye, akòz zot anvi konnen ki pe pase dan Sesel. E zot anvi ede zot osi pou kontribye pou nou pei bouz devan. E se sa rezon ki ou war Mr Speaker, menm bann *leaders*, menm bann *leaders*

dan parti *US* ki ti *leaders* ozordi zot nepli laba.

E se sa ki ou war tou bann dimoun ki annan moral ki annan etik zanmen ou pou war zot asosye zot avek parti *US*. Mr Speaker, sa bann dimoun in fini met *US* dekote e zot pe siport nou. Kantmenm zot siport nou trankilman, me Selman zot trouve ki Seselwa i lo bon semen, Sesel i lo bon semen. Nou bann *leaders* i bann dimoun ki ase onnet.

E byensir nou pe pans a lavenir Sesel, e nou pou fer tou sa ki byen pou nou pei Sesel Mr Speaker. E *Maison du Peuple* parey mon'n dir i en topik ki nou pou bezwen pran li *a main* definitivman parey nou pe dir la nou pou *set up* sa Komite pou nou rod tou bann rezon valab *and then* ler nou vini dan 8enm Lasanble byensir pou annan travay ki pou kontinyen.

E byensir sa *Maison du Peuple*, mwan mon konnen akòz tou dimoun pe dir e tou remark i montre poudir sa se en byen pou Lepep Seselwa. E sa byen pou trounen pou Lepep Seselwa, dakor pa dakor, fer dominer mannyer zot oule sa batiman la menm son lespas pou trounen pou Seselwa.

E sa lespri kot Seselwa pou kapab viv ansanm pou servi en landrwa kot zot pou kapab zwenn ansanm, zot pa

pou kapab detri sa nide sa ideoloji Mr Speaker. E mon bezwen dir avek Onorab Georges pa ezite, ou Mosyon i annan bokou, bokou sans.

Ou pe donn valer ankore en kou lo bann patrimwann parey nou ti dir, bann patrimwann Seselwa.

E mon konnen poudir mazorite, mazorite nou, nou pou donn ou nou sipor. Annefe pa mazorite nou tou lo sa kote nou pou donn nou sipor, esperon nou ganny en pe sipor laba lot kote latab, pou nou vreman dir pou nou vreman pres sa ki nou prese retoun pou Seselwa sa ki *belong to* Seselwa, rann César sa ki pou César e rann Seselwa sa ki pou Seselwa.

Mr Speaker, avek sa de mo mon remerci ou, e mon dir Onorab Georges, kont lo mwan ou annan mon sipor lo fer pase sa Mosyon. Mersi bokou Mr Speaker.

(APPLAUSE)

MR SPEAKER

Laparol pou Onorab Vidot.

HON AUDREY VIDOT

Mersi Mr Speaker. Bonn apre midi Mr Speaker, *staff* Lasanble, tou Manm Onorab, tou manm piblik ki a lekout, en bonn apre midi spesyal pou bann zabitan Roche Caiman. Mr Speaker, mon pou

entervenir lo sa Mosyon dan sa fason.

Entervenans ki'n koze avan mwan, in servi sa mo lonnekte. Lonnekte koz laverite, atraver ou Mr Speaker, mon le dir avek sa Onorab, koz lo laverite, e met an pratik ou parti politik depi latet ou dirizan ziska kot zot met an pratik sa ki zot prese avek pep Seselwa.

La Seselwa a donn zot respe lo sa lonnekte ki ou pe koz lo la Mr Speaker, atraver ou mon le dir avek Onorab. Mr Speaker, depi yer mon'n swiv bann deba, byensir avek prezantasyon loter Mosyon, mon'n fer serten lobzervasyon ki mon'n vwar pou dir byensir *LDS* in byen prepare.

In byen prepare pou son Mosyon, akòz i kler evidan laliny direksyon ki loter Mosyon in donn zot pou al ladan, zot bann repetisyon i parey napa gran sanzman avek, mon'n fer sa lobzervasyon.

Mon felisite zot pou sa bout travay, me mon oule osi dir ki sa Mosyon ki devan nou Lasanble ozordi espesyalman pou bann sitwayen ki pe swiv deba depi yer, konnen fransman mwan koman en Manm Elekte dan en distrik koman en dirizan dan sa Lasanble mon ti annan en pe ezitasyon pou mwan entervenir lo sa Mosyon.

Mon pou dir zot akòz, premyerman mon ti pe regarde konmsi ler mon'n regard son Mosyon *wording* avek son lentansyon ki'n ganny prezante par loter Mosyon, eski i merite donn li en sans valer pou sa Lasanble par koz lo la?

Akòz dan sa pei Mr Speaker, i annan en pake lokipasyon pou sa ladministrasyon, e servi son mazorite pou adrese dan sa pei, e nou'n vwar en kantite komantr lo medya sosyal, e mon asir ou i annan Manm espesyalman lo nou kote ki'n ganny call.

Poudir konmsi, zot be i annan keksoz dan sa pei pou nou koz lo la kot Seselwa pe pas dan difikilte, si zot in bliye Mr Speaker, i enportan ki LDS i rapel akòz in ganny sa mazorite Oktob 2020, pou li koz pou Lepep Seselwa.

Regard sa bann travayer, zot i annan travayer ki pe pas dan difikilte. Resaman la apre kestyonn yer bann travay servis dantr i annan zot i fristre avek repons ki'n ganny donner dan Lasanble yer, dimoun pe konplent.

Bann Minis letan i vin dan Lasanble bann repons ki donn nou, sa bann travayer i war li kontrerman avek zot kondisyon travay. Nou pa koz lo la? Nou vin rod *Maison du Peuple*? I annan travayer la

deor, i annan zenn ki anvai travay i ankor pe rod louvraz i monte desann.

Dan mon distrik sa leksepsyon, i pe rod louvraz ki swa ou donn li ou anvoy li kot bann lazans lanplwa pou li al rod en louvraz, oubyen i al kot Minister li menm pou al sey rod en louvraz kot ou kapab sey tap laport ou rod dimoun ki pe bezwen dimoun pou travay ou sey anvoy sa bann zenn.

I annan zenn i monte desann, i annan ki pe sey men kontakte zot kot LDS, zot fer konmsi zot pa tann zot telefonn. Ou konpran? Be pa pou kapab kontinyen koumsa, sa bann dimoun in met konfyans dan zot.

E zot pe *let down* sa bann dimoun. Mr Speaker, i annan paran ki dan en dilenm, i dan en dilenm la deor akòz? I war li pe ganny difikilte pou li kapab pey son det ki swa son *loan*, ki swa son elektrik ek son delo, apre pou li balanse pou li kapab fer sir ki son zanfàn i annan manze dan lakaz.

Les kot lekol, nou'n lager pou fer sir ki goute i ganny donner, kantmenm zot ti dir nou goute pa bon, zot ti kennsel goute apre a lafen dizour zot in war pou dir ti annan lenportans zot in donner.

Be dan sa lakour? Dan sa lakour? Zot pa mazin? Zot negliz sa bann paran, i annan plen zot sa bann dimoun in donn zot en mazorite ozordi pou koz pou zot.

Non. Ki nou pou fer? vin rod *Maison du Peuple* lager pou nou rod *Maison du Peuple*, *Maison du Peuple* pa pou ed sa bann dimoun pey zot det pa pou ed sa bann dimoun ranpli en kastrol manze pou donn zot zanfan dan lakaz, sa ki zot bezwen realize.

Mr Speaker, *LDS* in perdi direksyon zot dezespere, zot per, zot fay, Seselwa in war poudir zot fay. Zot lake lele *motorcade* ki zot in fer dernyen fwa la, pa'n abouti zot dan nanryen aköz in koupe kontrerman avek dernyen fwa ki zot ti fer avan sa enn ki la.

Zot *rally* ki zot pe sey dir bous trou deryer la ki zot pa ankor kapab bous trou ki zot santer in sante dan zot *rally* in dir zot la zot pa'n kapab bouze la.

(Interruptions)

HON AUDREY VIDOT

Zot annan problem, *LDS* i dan problem. Mr Speaker, avan ler *LDS* i vin rode ki trou lo zot laplenn Grande Anse deryer ki pa ankor bouse la, avan ler zot rod zot bann lake lele *motorcade* la fer mannyer

al regard sa bann dimoun ki ti met zot la, koz pou sa bann dimoun.

I kler, i kler ki le 27 Septanm, sa lannen la kreol pou fer zot *remind* zot poudir sa mazorite ki ti donn zot, zot pou rebran avek zot. Aköz lager *Maison du Peuple* la en lager perdi sa ki zot pe lager.

Zot in pas zot letan, e zot ganny soutire dan sa Lasanble zot pou zot maltret nou, e mon le met ankor lo rikord mon Mr Speaker, atraver ou mon le dir tou Manm komansman kot loter Mosyon sa 10 Manm ki la anndan napa enn ant nou ki annan disan dimoun lo nou lanmen.

Napa enn ant nou, napa enn ant nou ki'n vol later nou kanmarad, napa enn ant nou-

(comments off-mic)

MR SPEAKER

Order!

HON AUDREY VIDOT

I enportan zot met sa dan zot lespri en, avan ler zot vin dir nou i annan leskelet dan nou lanrmwar al regard dan pou zot, al regard dan pou zot. e dan plas ale rod leskelet lo zot kanmarad al fer mannyer travay pou sa pep pou sa pti git letan ki'n donn i reste zot la, la avan ler pep Seselwa i met zot deor.

Mr Speaker, i enportan pou mwan fer sorti en keksoz, en keksoz ki mon kapab dir loter Mosyon in koz laverite lo la, sa se si annan en Gouvernman ki'n fer sitan pou pep Seselwa wi, *SPUP*, *SPPF* Parti Lepep, e ozordi *United Seychelles*!

(APPLAUSE)

HON AUDREY VIDOT

Sa *Maison du Peuple* ki zot pe lager pou rode mon pa konnen si aköz sa biro Gouvernman, ki donn zot pa ase pou fer zot bann ensinifyan ladan prezan zot pe rod *Maison du Peuple*, oubyen later propriyete *US* osi pou zot fer ankor la non, non, non, non pa pou tolere sa nou en.

Nou dan *United Seychelles*, sa *Maison du Peuple* la nou'n servi li tre byen nou, nou'n fer sir ki en zenerasyon ki'n vin dan sa landrwa bann manm ki'n kontribye, ki zot in volonterman, volonterman mon'n ganny *call* i annan dimoun in dir mon volonterman.

Mon annan manm fanmir ki'n kontribye vini pou donn en koudmen pou sa landrwa, e sa landrwa in servi par en zenerasyon Seselwa kot zot in kontribye zot in zwenn atraver bann dirizan dan sa parti pou fer sir ki ler sa

Gouvernman *United Seychelles*, in la diran sa bann lannen, in fer sir ki'n travay pou sa pep, in travay pou sa pei.

Si zot lot kote i anna zot ki'n pli byen benefisye ki mwan Audrey Vidot, ki zot in bliye aköz zot in tro engra mwan mon le dir avek zot poudir nou la nou pa bliye.

Nou pa bliye zefor avek langazman ki en zenerasyon avan mwan in kontribye pou fer sir ki sa pei i ariv kot i ete, ki zot in pli byen zourir dan sa 5 an zot kan zot in kit mazorite pep Seselwa ater.

Apre la vini avek sa pti Mosyon ki mon asir ou Onorab Gabriel, in pli byen dekrir li ozordi dan sa Lasanble pou zot vini pou vin rod en pti morso *milage* politik, pou sey, sey krwar i pou sov zot pou sa eleksyon ki pe vini.

Sa enn eleksyon ki pe vini la *Maison du Peuple* pa pou fer zot gannnen, maltret nou *United Seychelles*, pa pou fer zot gannnen. Aköz tou sa ki zot pe fer la pa pe ranpli kastrol Seselwa, pa pe ede sa Seselwa war, konnen ki bor i pou kapab fer de bout zwenn pou li arive ganny en meyer standar lavi, en standar lavi ki pa bliye Oktob 2020 zot ti fer en lalis promes pou fer zot pa'n kapab fer li.

Mr Speaker, mwan mon annan sa de pti mesaz pou

mon dir avan ler mon konklir. Tou sa ki *LDS* ler zot bann Minis ek zot bann dirizan in vin la, la in vin dir nou, oubyen in dir avek bann Seselwa la deor pa fer zot pa fer, selman zot, zot fer zot.

Ou sa solda, ou sa zofisye lapolis, ou ti ganny dir pa ale okenn *rally*, pa desann okenn *rally* selman ou'n war ou sef ale ou. Le 20 la Zilyet Dimans *United Seychelles* pe fer son *rally* dan *mini stadium* desann, nou fer dan kler nou pa pou fer dan bwa nou. Nou pa pou fer dan bwa ni dan kasyet, nou pou fer li la dan kler.

Desann zot osi, si i pous zot, vini vin kot Onorab Vidot, i a donn zot portre zot bann dimoun ki zot bann dirizan ki zot dan lapolis ek larme ki ti la, nou a montre zot, nou a gete si pou pous zot, nou a gete si pou met zot deor.

Ou sa Seselwa ki ozordi pe swiv nou deba depi yer, ou ki pe ganny dir poudir *United Seychelles* i voler, i en kriminel, selman dan sa 5 an ki la sel parti dan son minorite ki'n lager pou ou, ki'n koz pou ou se pa lot ki *United Seychelles* la ou sans desann!

(APPLAUSE)

HON AUDREY VIDOT

Desann, finalman mon pou dir atraver ou Mr Speaker, mon'n dir pli boner poudir *LDS* i

maltret nou dan sa Lasanble, zot ganny peye zot aköz loter Mosyon ti deza dir li, ganny peye pou maltret nou li, pa ganny peye pou li koz pou lepep li ganny peye pou maltret nou.

Nou, nou annan sa pou nou dir zot, nou dan *United Seychelles*, la espesyalman sa bann Manm ki la nou en Manm sa parti nou peye pou en Manm sa parti aköz nou langazman nou komitman.

Dan nou distrik osi nou annan dimoun ki *care* pou parti *United Seychelles*, aköz son prensip nou en prensip, en parti sosyalis ki krwar dan lazistis sosyal. Nou, nou pa pou asize dan enport ki bor, oubyen nenport ki landrwa nou pou les *LDS* pou vin asize maltret nou, akiz nou voler, akiz nou en parti kriminel kan zot menm zot, zot pa ni kapab anmenn nou devan Lakour pou ziz nou pou zot kapab vini pou klarifye zot bann alegasyon.

Mon pe dir zot byen kler nou pa pou asize, oubyen reste lebra kraze pou nou les nou maltret nou, non. Sa nou pa pou fer. Me sa ki nou pou kontinyelman fer nou isi, nou pou kontinyelman defann e siport pep Seselwa ki'n pas dan sitan difikilte.

Nou pou kontinyen akonpany zot ziska le 27, e apre le 27 nou pou kontinyen

la akote zot sa mon donn zot en garanti aköz *United Seychelles*, i sel opsyon pou Sesel ozordi. Mersi.

(APPLAUSE)

MR SPEAKER

Nou a pran pause, mon pou remind Manm *Assembly Business Committee meeting* 1 er 15, silvouple annou a ler. Pou nou kapab rebran apre, e nou a rebran deba 2 er. Mersi.

(BREAK)

MR SPEAKER

Bonn apre midi toulmonn. Bann Manm, nou bann zofisye, bon nou a rebran lo deba, mon pe donn laparol Onorab Naidu.

HON SATHYA NAIDU

Mersi Mr Speaker. Bonn apre midi tou mon koleg Onorab, ek tou dimoun ki a lekout. Mosyon anmennen par Onorab Georges, wi, kestyon in ganny poze lo, aköz eski nou pe anmenn sa Mosyon la? Aköz nou pa ti'n anmenn pli boner?

Me lepep Seselwa i konnen pou dir ler nou ti'n antre o pouvwar nou'n annan defi *COVID*, sityasyon ekonomi, e ki mannyer eski nou pou zer sa ladministrasyon ki nou, nou ti'n erite pou nou kapab

anmenn prosperite pou nou pep.

Alors koman en Gouvernman, koman en ladministrasyon nou ti'n annan en kantite travay pour nou fer. E wi, par legzanp i annan en ka ki mon pa pou al pli lwen ki sa 50,000,000, mon pa pou dir plis ki sa.

Kot ACCS atraver nou Gouvernman, atraver Bidze ki Lepep Seselwa in donner i pe fer le neser vizavi travay, e i annan bann lezot ka koripsyon ki sa antite ozordi zour atraver nou ladministrasyon in ganny pouvwar pou li kapab adrese.

Sa i osi aplik pou sityasyon drol par legzanp, kot nou ladministrasyon in investir resours, e in annan en lavolonte politik pour nou kapab adres sa sityasyon kot ozordi i annan pa mal Escobar ki zanmen, zanmen nou ti pou war zot dan prizon.

Me selman dimoun ki krwar zanmen zot ti pou'n antre dan prison, me ozordi atraver bon travay ki ladministrasyon anba *leadership* Wavel Ramkalawan, in kapab anmennen pou nou kapab adres en defi kot ladministrasyon lepase in napa sa lavolonte pou fer.

Sa i zis 2 legzanp kot mon'n ilistre, kot nou koman en ladministrasyon nou konn

nou priyorite ver bann demars ki nou, nou'n bezwen fer a sa ki konsern sityasyon ki nou, nou ti'n erite pou nou fer fas avek.

Zisteman size ki devan nou i konsern *Maison du Peuple*, e Onorab Georges, koman loter Mosyon in pran son letan pou fer en prezantasyon byen striktire, byen kler nou'n annan en *leader* minoriter dan lepase ler in annan Mosyon ki'n vin devan sa Lasanble in mank striktir, in mank direksyon.

E zisteman dan son repons kot byensir i bezwen dir bann keksoz ki pou dan faver son parti, me menm si pozisyon i enn ki fay, zot pou lager menm. Me nou tou nou konnen poudir ozordi si nou dir zot lo lot kote latab zot en parti minoriter, se aköz Lepep Seselwa in pronons zot atraver bwat vote.

E zisteman, avek sa gran mazorite ki nou, nou'n annan dan Lasanble Nasyonal pandan sa peryod letan ki zot in met nou pou premye manda aköz en bon pe nou, nou pe vin pou nou dezyenm manda, e nou bann kandida ki'n ganny selekte osi pou rantre isi dan sa Lasanble aköz Lepep Seselwa pe dir “nou pou kit li lanmenm” aköz nou, nou pe anmenn sa pei kot fodre ale.

E si lopozisyon lot kote latab ti'n sanz zot fason fer, e

Prezidan Faure, a son moman ler i ti Prezidan i ti'n bezwen etabli en bon relasyon avek *Leader* Lopozisyon sa letan ti pa lot ki Prezidan Wavel.

E dan sa prosesis koabitasyon in annan konprenezon, kot zot in bouz Zonm Lib. Me mwan mon pa oule war Zonm Lib kot i ete, e kekfw a en moman apropiye nou pa fer en moman le nesese osi.

Nou ti'n aboli, ti'n aboli le 5 Zen, savedir in rekonnet poudir le 5 Zen pa ti lazournen liberasyon parey lo lot kote zot, zot ti fer serten dimoun krwar baze lo lafason ki zot ti'n en doktrin lespri bann dimoun ki zot lespri ti feb.

E zot, zot ti krwar Albert Rene, ti en Bondye. Non, i pa ti Bondye. I ti servi pouvwar dan bann fason ki okenn dirizan ki pou ariv lo son nivo pa devret pe itiliz pouvwar, i ti'n abiz pouvwar.

E zisteman, sa parti sa letan baze lo prezantasyon *LGB* in fer resorti poudir Konstitisyon premye repiblik ti zis en *carbon copy* of Konstitisyon zot parti politik, ki ti'n ganny entegre ladan.

E alors, dan letan Parti Inik zot ti'n servi tou pouvwar ki ti a zot dispozisyon pou kapab pran *Maison du Peuple*, angiz ki i ti en kado pour lepep Seselwa pou zot menm zot lekor.

E ozordi, si zot ti'n vin devan pou admet poudir sa ki'n arive dan lepase i pa nou lafot, me selman zot kontinyen repet ideoloji Mr Rene, ki dapre Onorab Pillay, zot ti'n fer resorti poudir in kit nou alors pa nonm li.

Be zot ki pe donn li prominans dan tou zot diskour, zot ki a pe reviv ouswa pe fer bann fanmir ki'n pas dan matir anba zot sistenm reviv bann moman ki zot, zot pa oule viv *and they want to turn another page and move forward*.

E se sa ki nou'n fer atraver sa 2 moniman ki ti'n ganny devwale, kot bann fanmir ki ti'n asiste sa bann ceremony zot ti'n zot santiman ti ankor fre, e zot ti pe eksprim zot douler ler zot ti'n war non zot manm fanmir.

E i regretab ki a en moman nou pei in fer fas avek en tel sityasyon, me byensir se atraver lepase ki nou kapab fer sir ki ozordi nou pa repet menm fot, e nou etabli pli meyer standar posib.

I pa devret zanmen dan listwar Sesel ankor okenn parti ki ganny pouvwar pou diriz sa pei i abiz resours leta, i abiz resours ki Bondye in donn Sesel pour zot kapab abize, pou zot kapab manipile pou zis fer zot avek zot fanmir prospere.

Se sa ki'n arive pandan tou sa lannen anba Ladministrasyon US, e se sa ki lepep Seselwa pa le war ankor, e zot pou dir sa byen for atraver bwat vote.

Dir sa ki zot oule dan nou rally selman nou, nou konnen nou, nou vwar bann dimoun ki ti siport zot ozordi zot in vire zot pe vin lo nou kote, aköz zot in vwar kler, ozordi lo sa kote latap get nou parti i en parti ki reprezant LDS in pran en pe Manm ki ti dan Lalyans, ti annan en pe Manm ki ti dan US.

Diferan parti in vin ansanm aköz zot vwar poudir sa filozofi, sa vizyon ki Prezidan Larepublik in annan depi komansman son lalit in enn ki'n nob, in enn ki'n toultan santre ver la demokrasi bann etik ki byen, e se sa ki zot osi zot krwar ladan.

Alors mon demann zot, kote eski zot sitye dan sa sityasyon politik? Zot in bouz en pwen kot zot in koz Lasonpsyon Onorab Gill, in fer masyon avek Assumption.

Be kot i ti ete ler Lasonpsyon ti pou al pou Lenn, pou zot fer en baz militer? Ler ti en Manm Lasanble 6enm *cohort* kot i ti ete li? Kot i ti ete ler ti annan en Onorab, lo sa kote latap ki apel Wavel John Charles Ramkalawan, ki ti pe anmenn

en lalit pou konpansasyon dimoun Baie Ste Anne ki ti [e ganny afekte avek sa stasyon sityasyon *PUC*?

Se sa ladministrasyon ki'n pey sa konpansasyon, se sa ladministrasyon ki'n bezwen pey konpansasyon pou Mr St Ange, kan zot ladministrasyon ki ti annan tor, zot ki ti'n bezwen pey konpansasyon Mr Hubert Hoareau, ki ti zot ti'n *dismiss* dan en fason ki mal.

Nou ozordi se ladministrasyon dizour ki'n bezwen pey konpansasyon pou plizyer lezot ka, kot zot lo lot kote latab la fason ki zot in zer sa pei in mal, e legalman in annan laprev tanzib sa landrwa kot ti annan mize *SPUP*, *SPPF*.

Eski pa la fanmir Hassan Ally, in re ganny zot propriyete atraver prosedir legal? Zot pe koz lo prosedir legal? Onorab Pillay, pe koz lo prosedir legal? Si Komite i determinen poudir *the legal root is what we have to take*, nou ava fer le neser, e nou ava fer sir ki *Maison du Peuple* i retourn pou lepep Seselwa.

Dir sa ki zot oule dir, sa i pou ganny fer atraver bann prosedir an plas pour nou kapab fer sir ki sa batiman i ava ganny itilize kot lepep Seselwa i ava ganny en benefis an retour.

Eski nou pou vann bann propriyete ki *SPPF*, *SPUP* ozordi zot "*A New United Seychelles*" zot baze lo menm filozofi selman, si nou kapab ganny bann *proceeds* atraver bann prosedir legal fodre ki nou met dan en kont pou re pey bann viktim *TRNUC* ki ozordi Dokter Herminie, i annan lodas pou koz lo la, mon pa ni ganny en konpran.

Ki kalite stratezi, eski vreman sa parti i annan ozordi? Zot nepli relevan, e alors zot pou servi bann moman isi dan Lasanble pou *mislead* *LEPEP* Seselwa atraver bann *statement* vag.

E atraver bann *statement* kot zot pa pe kapab menm *substantiate* zot fer referans avek en let, selman zot pa soumet en let devan *secretariat* pou ganny sirkile pou nou tou war ki zot pe fer referans avek.

Zot pou dir tou sort kalite keksoz, zot pou dir tou sort kalite keksoz an relasyon avek bann pwen ki zot, zot annan pou fer selman aköz zot napa nanryen pou dir zot pou vin dir nenport e kwa.

Onorab, ti'n koz lo *CCCL* lo lot kote latab sa ladministrasyon ler sa lensidan personn pa ti oule sa leksplozyon i arive in arive, e nou'n bezwen reakte pou fer sir a tan pou fer sir ki dir

zabitan i ganny sa lasistans nesaser.

Mon salye Onorab Philip Monthy, pou sa travay enkrwayab ki ti'n fer pou debout a kote zabitan Cascade, kan lo lot kote zot ti pe servi *plywood* zot pe fer politik avek lekel pou gannyen, lekel pa pou gannyen.

Nou lo sa kote latab nou pa regarde lekel pou gannyen, lekel pa pou gannyen nou la pou travay pour tou dimoun ganny en keksoz o tan ki zot pe zwenn kriter atraver bann prosedir apropiye.

Nou pa krwar dan sistenm ek nou pa ek nou, sa i bann keksoz ki lepep Seselwa an 2020, zot ti'n dir "*we have had enough of it.*" Sa bann lezot keksoz ki zot a pe fer lo lot kote latab, semenn pase mon ti'n dir la kantite larzan ki Onorab Pillay, i gannyen koman en *Leader* Lopozisyon plis ki en Minis i gannyen li.

Selman sa travay i a pe fer *I'm sorry*, i a pe fer en dezoner pou sa pozisyon ki apel *Leader* Lopozisyon, dan nou demokrasi ozordi. Fodre ki nou ganny en dirizan ki serye, en dirizan byensir zot in met devan bann pwen lalkol par legzanp.

Wi, lalkol i en pwen konsern. Be ki mannyer eski nou pou adres sa sityasyon problem lalkol dan pei? Par

legzanp o bor bann lenstitisyon edikasyonnel, eski en laboutik i dwatet annan en *license* kot i a pe vann lalkol? Eski nou pa devret pe revwar? Sa i en solisyon.

Zot a pe koz lo sityasyon ki konsern *unemployment* pour bann zenn, aköz zot pa profite zot servi zot lavwa dan Lasanble pou dir sa zenn pa bezwen perdi kouraz si ou'n tap trwa laport pa ankor ouver kontinyen tape ziska ler ou'n ganny ou travay.

E pa swazir louveraz kwa ki ou devret fer dan ou premye pa ki ou pe sey pran, annavans. Wi, sa sityasyon eksperyans i en size ki nou bezwen adrese gete en fwa pour tou pou nou kapab fer sir ki sa zenn i ganny sa lavansman nesaser.

Me selman dan lavi si ou persiste ou pou kapab *attend* ou lobzektif, se sa kalite mesaz ki nou dwatet pe anvoye. An relasyon avek *Travizory*, zot ti'n fer tou sort kalite politik avek sa size.

Me pa'n marse. Wi, kantmenm par Mr Derjacques, pa ti pe ganny okenn en sou ver sa lagreman ti plito son *partner* ki ti pe resevwar sa sonm finalman *Travizory* tin deside, *Travizory* ti'n deside pou koup sa kontra.

Alors sityasyon in kontinyen avek en lot dimoun koman en konsey legal, *there's*

nothing wrong with that selman zot, zot manipile zot dir tou sort kalite keksoz.

Ozordi wi a en serten pwèn *Travizory* dimoun ti pe konplent pou dir, “arr nou bezwen peye ensidswit” ozordi Seselwa pa pe peye ler zot pe antre.

Selman *Travizory* in ede dan nou *border security* in fer sir ki ozordi nou annan en *seamless* ler dimoun pe antre, an term *paperwork*, napa nanryen napa nanryen *electronic*.

Nou enn bann premye pei ki'n etabli bann standar, e ozordi Sesel pe ganny koze dan en fason ki byen lo en baz mondyal Mr Speaker.

Ou konnen mon pa konnen ki lo kote latab ankor zot pou vin dir, selman lepep Seselwa avan mon terminen lepep Seselwa i konnen pou dir ki par legzanp nou tou ki la anndan la ler ti annan 5enm Lasanble Nasyonal an konparezon avek sa enn ki la kot i annan en mazorite absolè lo kote parti o pouvwar sa enn ki la i diferan.

Nou tou nou donn nou kouraz dan sa travay ki nou, nou annan, nou tou nou pran nou responsabilite ver lepep Seselwa baze lo konfyans ki zot in met nou.

Wi, travay pa fasil. Wi, nou pa pou kapab zwenn lekspektasyon tou dimoun

100poursan toultan, me selman sa group sa 7enm Lasanble lo kote *LDS*, i bann debouryer ki pe donn zot kouraz pou avans nou bann distrik devan.

Antre St Louis wi, zot ti'n fer en *PPB* lot fwa en nespes *PPB* 2 minit, selman tou sa ki zot pe montre dan zot *video* Naidu, ansanm avek son bann *DAs*, ansanm avek bann *civil servants* ki vwar sa vizyon ki zot krwar ladan osi egalman ki'n bouz mon distrik.

Kontinyen, kontinyen vini e zot a war dan bwat vote manner i pou rezonnen ler zot pou dir Ramkalawan, avek Naidu St Louis, e tou nou bann kandida *LDS* nou pou “re kit li lanmenm” e *Maison du Peuple* pou retourn pou Lepep Seselwa! Mersi Mr Speaker.

(APPLAUSE)

MR SPEAKER

Mon a donn laparol Onorab Lemiel.

HON SYLVANNE LEMIEL

Mersi Mr Speaker. Bonn apre midi mon bann koleg Manm Onorab, tou dimoun ki a lekout. Mr Speaker, Onorab, ki'n koz avan mwan mon ti a kontan petet atraver ou demann li en keston.

Lekel sa dimoun ki ti al war son fanmir *Behar* dan

Lenn? Ki ti met kouronn pisanli otour likou tou, e i ti al koz ek bann dimoun dan lotorite Lenn, e ki ti dir zot i pou fer sir zot ganny Lasonpsyon pou zot fer zot proze. Eski ti Prezidan Faure, oubyen si Mr Ramkalawan?

Mr Speaker, mon'n ekout zot tou ler zot in koze mwan. Mr Speaker, ozordi, yer ti 17 zour letan sa Mosyon ti anmennen ozordi i reste 16 zour avan *recess* ok.

E Onorab Georges, i vin avek en Mosyon isi dan sa Lasanble kot i pe demann Lasanble li menm pou konstitye en Komite, pou antreprann en lanket dan rezon, mon dir ankor rezon aköz *Maison du Peuple*, in vin propriyete parti *United Seychelles*.

Mr Speaker, eski Onorab Georges, e LDS i serye? 17 zour ozordi mon redir 16 zour, yer ti 17 zour, ozordi 16 zour ok avan *recess* zot ganny lanvi vin fer Komite dan sa Lasanble.

Isi parey Onorab Vidot, fek dir i annan sitan travay, e Mosyon ki nou ti kapab anmenn dan sa Lasanble pour nou demann Gouvernman pou li amelyor lavi Seselwa, tel ki Mosyon kot nou ti kapab propoz avek Gouvernman lo bann diferan fason pou amelyor sityasyon bann pti

biznes Seselwa ki pe fermen par grap.

Mosyon parey mon menm mwan mon'n table mon ti poze pou anmennen dan sa Lasanble kot nou pou demann Gouvernman pou re entrodwi *long service allowance* pou bann travayer servis piblik, ki ti *freeze* an 2021.

Mr Speaker, an 2020, LDS ti anmenn en lager asarnen lo bann ka *TRNUC*, ti zot seval batay sa sirtou Onorab Georges, menm. E zot ti gannnen eleksyon aköz sa, i pa zis sa ki ti fer zot ganny eleksyon.

En keksoz ki mon pou dir ki zot pa kontan toultan, zot ti osi ganny eleksyon lo zot kantite mansonz, e apre ki zot pa'n kapab delivre lo mazorite zot bann program dan zot manifesto.

Sa bann zoli promes pou met larzan plis dan pos Seselwa, me ki nou'n war? Napa sa larzan an plis dan pos Seselwa, en pti ogmantasyon ki Seselwa in gannnen koman i gannnen pri komisyon i monte, larzan i fini *it's nothing* pansyoner pe konplent i dir ou sa pti R450 ki'n donn zot i pa ase.

Zot ti pe ekspekte sa 10,000 ki zot pa kontan nou nonmen, me zot ti promet. Mr Speaker, ki nou vwar ankor? Bijoux, pa pou kapab fer mwan nanryen li, ou'n mal

swazir ou kandida Onorab Wavel.

(laughter)

HON SYLVANNE LEMIEL

Ki koz lo *rule of law*? Zot koz lo *rule of law*, me ki nou war? En bon pe zot dan LDS zot par lao Lalwa i paret zot. In anmenn Lalwa lo *hate speech* pou protez lekel? Prezidan, e politisyen mwan mon ganny maltrete lo Facebook toultan mwan, la *fake profile anonymous* pou al maltrete la mwan mon tanpi.

Me bann lezot dimoun pa gannyen proteze Mr Speaker, anba sa Lalwa *hate speech*, Seselwa in kapab tande Dimans lo *stage* Grande Anse Mahe. Ki ti arive? Lekel ki ti pe fer *hate speech* lo *stage* Dimans? Pa sa gran Msye.

Ou konnen parfwa Mr Speaker, ler nou santi defet pe vini la nou pran rekour dan bann diferan fason kot nou komans maltrete, nou komans donn non nou kanmarad, nou komans vey en boug mannier i pennyen, konbyen bag i mete dan son ledwa?

Napa kalite parol konmsi ki ou pa tande ki pou mwan i denigre nivo en dimoun ki swadizan pe *rule* nou pei. Mwan koman en dimoun mon MNA mon'n ganny elekte 2 manda, e mon pe al ganny sa 3enm manda!

Mr Speaker, mwan mon en fanm travayer mwan, mon pa vin gete ki dimoun i ete ki pa ete mon ed tou dimoun dan sa distrik Anse Royale mwan.

Be ki ou tande? En Prezidan i vin dir mwan poudir mwan mon en bay, mon koz gran labous, i pe al pran Anse Royale mon pou arete mon arogans. Be ant mwan ek li, lekel ki pli arogan? En, lekel isi dan sa pei la nou'n kre Lalwa *hate speech*, me selman *hate speech* nou menm nou ki fer, li menm li ki fer li menm ki *bully* dimoun pli, ki maltret dimoun plis?

Selman apre i dir konmsi la i annan dikton ki dir ou, pa fer sa ki mon fer, ou pa fer a ki mon fer ou, me mwan mon fer sa ki mwan mon anvi fer, sa i aplik pou li lo son kote sa.

Me Mr Prezidan mwan mon pou kontinyen travay, mon pou kontinyen travay pou sa pep ou kontan pa kontan. Mr Speaker, atraver ou mon pou kontinyen travay, e pep Anse Royale pe met Sylvanne Lemiel, ankor dan sa Lasanble!

(APPLAUSE)

HON SYLVANNE LEMIEL

Mr Speaker, letan nou pou vin lo Mosyon pran *Maison du Peuple*, yer swar mon'n ganny *call* avek detrwa dimoun ki zot, zot ti partisip koman volonter

parey bokou mon bann koleg la in dir.

Zot ti partisip dan travay volonter ki ti ganny fer pou konstri *Maison du Peuple*, Onorab Georges, i annan en madanm in dir mwan pas en mesaz ek ou i dir mwan i ti vreman ankoler yer.

Mon pa bezwen donn ou son non mwan,

(Interruptions)

HON SYLVANNE LEMIEL

I annan- Mr Speaker,

MR SPEAKER

Onorab Woodcock, silvouple ou'n koze pa ti enteronp ou, les bann Manm koze. Onorab, silvouple koz ek Speaker, adres Speaker.

HON SYLVANNE LEMIEL

Mr Speaker, wi, mon pe adres ou. Mon pa pe vin nonm non dimoun la aköz i annan en Onorab, son fanmir fek *call*, in dir poudir i pa'n kontan en Onorab, in nonm non son papa sepa lekel dan Lasanble.

So, mon pa pou vin nonm non dimoun ankor la mwan, aköz pa tou dimoun ki kontan ou nonm son non. Me selman i ti dir mon i ti ekout lentervansyon Onorab Georges, byen yer.

I dir mwan poudir i pa'n kontan, in vreman kontan mon ti bezwen yer swar dir li

“be *relax* mon ser, pa tro fatig ou ek tousala.” So, zot, zot tou zot in koze nou'n ekoute.

Mr Speaker, si ou pou dormi, dormi ou. Ler mon pe regarde ki pwen mon pe fer Onorab Georges? Ou war en ler sa bann kalite larogans *LDS* ki annan Mr Speaker, prezan i war larogans i sorti kot nou, e mwan mon arogan parey Prezidan in dir.

Me Onorab Georges, nou tou nou ti pasyante pou ekout ou letan ou ti fer ou *speech* kot ou ti pe tir bal diferan landrwa ou ti'n anmenn *speech* lo pou pran *Maison du Peuple*, selman ou ti pe tir bal ziska lo tron koko ou ti tape.

Ok, so ou bezwen kapab annan pasyans pou ou ekout nou Mr Speaker, i bezwen kapab annan pasyans pou ekoute, i annan laba kantmenm pe dir mon koze zot in rabase zot in zis maltrete pe maltret dimoun voler kan zot menm zot ki voler.

Ou konpran? Tousala i pa normal sa, ler ou kanmarad i fer lo ou la ou ankoler, me selman ou kapab fer lo ou kanmarad. Mr Speaker, i annan diferan, i annan diferan pwennvi deor lo sa zafer *Maison du Peuple*.

Par egzanp, mon annan enn la ki'n anvoy en pwen kot mwan, sa dimoun pe dir mwan poudir li osi in lir Lalwa lo *property rights*, so dapre Lalwa

in dir ou li sa propriyete i lo non *United Seychelles*, sa *building* i lo non *United Seychelles* sanmenm sa ki Onorab, in dir pe al konstitye en Komite pou li war ki mannyer sa in vin lo non *United Seychelles*.

I pou war li, i pou gannyen son laprev. Me meton poudir in vin ek sa Mosyon ki nou tou nou konnen Mosyon pa *bidding* i pe form son Komite, ki pa neseserman, me selman *LDS* ozordi zot dominer zot an mazorite zot ki la pe *rule border*.

Definitivman zot pe mazine zot kapab vin pran *Maison du Peuple*, me mwan mon pou dir pran ou pa zis dir ou pe vin pran Komite i pa pou kapab zis dir al pran, i annan en prosedir ki sa pou pas ladan.

Ler mwan mon pe gete si nou get sa Mosyon mannyer i ete avan ou pou pran en propriyete ou pou bezwen pey konpansasyon, so Gouvernman i a pey konpansasyon *United Seychelles*.

Me sa Mosyon ler nou get li koumsa Mr Speaker, eski sa Mosyon prezan i legal sa? Eski sa Mosyon i legal? Mr Speaker, i annan en fwa ki ti annan en let ki ti pe sirkile mon krwar Madanm Vivienne Soundy, sa letan ki ti pe sirkil sa let.

Kot ti pe dir rann larzan ki ti'n ganny *sponsor*, mon krwar aparaman i ti pe demann atraver ou Mr speaker, Mr Ramkalawan, pou rann sa larzan.

Be ki i ti ganny dir? ozordi pe dir rann *Maison du Peuple*, aköz i pou lepep. Me li osi ti dir li rann sa larzan i ti dir sa larzan pa ti donn parti donn parti ti donn li.

So, ou war letan, wi tousala ou balanse, letan nou pe balanse nou pe dir rann *Maison du Peuple*, rann *Maison du Peuple* i pa pou rann koumsa sa.

Rann *Maison du Peuple*, i pou annan en prosedir ki si oule *Maison du Peuple*, i ganny rann Mr Speaker, atraver ou, ou bezwen pas dan tou sa prosedir legal ki konsernen, e la, e la Lalwa li menm Lakour i a pran en desizyon si Parti Lepep, *United Seychelles* ozordi *SPPF*, sa letan *SPUP* depi sa bann letan.

Si vremen Lakour a balanse a gete, eski ti vremen legal pou nou ganny sa? Eski i pou *United Seychelles* menm sa? Les al anmenn en- mwan mon pou dir Mr Speaker, nou pe zis balbise la anndan, nou pe fer politik maltret kanmarad.

Me selman le vre pwen i se ki mwan ler mon gete sa i devret en ka legal, anmenn en *case* Ankour lo *United*

Seychelles, e demann Lakour pou *investigate* e war si *Maison du Peuple*, i merit ganny rann a Gouvernman, e ki zot prezan zot a vin fer li pou Lepep, i annan i le fer nenport ki kalite ladan.

Sa ki'n dir en arshiv, sa ki'n dir *whatever* zot in dir i kapab fer avek. So ou ava, Lakour i ava pran en desizyon dan sa ka, me non pa en Komite Lasanble ki pou ganny formen ki le 7 Out, sa Lasanble i al *recess* i frenmen.

Kan pou ganny letan fer sa Komite? Mon'n ganny dir, mon'n tann dir poudir letan 8enm Lasanble i antre i ava kontinyen, pou napa kontinyasyon sa.

Wi, Onorab Porice, aköz en bon pe zot pa pe antre dan sa Lasanble. pou napa kontinyasyon sa Mosyon, sa Mosyon i zis en fars Mr Speaker, ki sa pe al fini lanmenm sa zafer.

Nou'n anmenn sa zis pou detourn en pti pe dimoun, tir konsantrasyon lo lezot keksoz ki vreman bokou pli enportan, e fer dimoun krwar pou dir la wi, nou pe al pran, nou annan pouvwar, nou pe al pran. Zot pa pe kapab vin pran nanryen! Mersi Mr Speaker.

(APPLAUSE)

MR SPEAKER

Onorab Henrie, ou annan laparol.

HON GERVAIS HENRIE

Mersi Mr Speaker. Bonn apre midi tou dimoun, partikilyerman bann dimoun dan distrik Mont Buxton. Mr Speaker, si annan en Manm ki mon ti pe esper son lentervansyon lo sa lot kote latab lo sa Mosyon se Onorab Lemiel.

E mon kontan in koz avan mwan. Aköz Onorab Lemiel, i annan en keksoz ki fodre nou realize en pe letan mon pe swiv sa dan Lasanble, letan i annan en keksoz kontrovers konsernan son parti souvan i reste trankil i pa tro koze.

Pou rezon ki mon pa konnen, kekfwa i pa le asosye li lo rikord listwar pe dir en keksoz ki i konnen demen i kapab *compromise* son pozisyon.

E la in dir en keksoz enterese pour mwan, ki *depart from* tou pozisyon ki zot in pran depi bomaten, i pe dir sa zafer anmenn Ankour.

Ler en dimoun pou mwan i fer sa konmsi i pe avoue ki wi si annan en *ground*, be fer. So lye ki vini dir “non pa pou pran” parey son *Leader* bomaten in fer “zanmen pou arive” in dir.

Onorab Lemiel, in dir annou al Ankour, *and this is*

the position ki mwan mon *welcome*, akòz si *US* i persyade i pa'n fer nanryen mal parey Mosyon in etabli, e dayer felisitasyon Onorab Georges, pou sa prezantasyon, akòz mon ti dir ek li ler mon'n ekout sa prezantasyon konpletman diferan avek bann lezot prezantasyon ki nou'n tande dan Lasanble avan.

It was exactly konmsi i ti pe fer en *case* Ankour, i pe met en *case* avek pep Seselwa, e in prouve pou dir *there is a case to be answered*.

E Onorab Lemiel, in anvoy in dir "*ok*, annou al Ankour". Tandis ki li Onorab *Leader* Lopoziyon, in dir "zanmen sa pou arive" e pour mwan sa i demontre ki koman en dirizan ki pe aspire pou li vin Vis-Prezidan nou pei i pa demontre fleksibilite, son lespri pa ase ouver pou konpran e aksepte ki tou sityasyon lavi Mr Speaker, i enprevi.

E ki ou bezwen touzour reste ouver avek tou bann posibilite, parski nou imen apre tou nou annan limitasyon, me pouvwar e abilite i avek Bondye pou fer mirak. Alor nou pa zanmen dir zanmen.

Mr Speaker, sa lentervansyon ki mon le fer lo Mosyon table par Onorab Georges, ozordi mon oule

adres spesifikman avek lazenes Seselwa.

Ozordi dan nou pei i annan plizyer batiman ki'n konstri an gran parti par kouraz, lasyer, e transpirasyon bann zonm avek fanm Seselwa ordiner.

Zot in fer li volonterman avek zot leker dan zot letan, me pli enportan atraver zot lanmour pou zot kominote, e pei. Wi, dan serten ka bokou dimoun ti napa swa, anfet enn mon zanmi solda Frank Kilindo, in anvoy mwan en mesaz i dir mon "be sa letan dan larme nou ti ganny forse pou al travay lo *Proze Maison du Peuple*, menm avan nou ti pe al pass nou ti bezwen al travay lo *Proze Maison du Peuple*."

E pou en kantite dimoun zot ti ganny menase, ti leta Parti Inik si ou pa ale ou ganny vwar konmkwa ou kont sistenm, ou pou ganny pouse dan ou travay, ou pou ganny forse egzile zot pou al deteni ou Union Vale.

So ki ou fer? Ou ale ou anmenn 2 tok makadanm zis pou ou la zot in war ou, alor zit ti ava les ou trankil, koumsa ti arive. Alor, si nou get en pe otour nou pei depi biro avek Sant Kominoter Mont Buxton, *Happy Youth Club* ki lo semen Olivier Maradan, *Library* Nasyonal, dan Victoria parmi bokou lezot lenfrastriktir

ankor i bann batiman ki'n ganny konstri an gran parti par sa lespri volontarya.

Ozordi ou ki dan ou zenn tan, sirman ou okouran ki annan en mouvman, e kanpanny nasyonal ki pe deroule pou anmas larzan pou konstri en nouvo Lopital Sesel, ki a reste debout pou sa prosen 100an.

Mon envit ou, fer ou kontribisyon dan sa proze, e ler ou'n ava ariv mon laz ou ava koz lo ou 5 sou ki ou'n kontribye dan sa proze parey mwan ansanm avek mon zenerasyon, nou koz avek lafyerte pou nou pti kontribisyon dan konstriksyon *Library* Nasyonal.

Mon anvi pran sa letan Mr Speaker, pou eksprim gratitud nou parti pou partisipasyon nou pep dan sa tel linisyativ, me pa zanmen krwar ki en zour nou parti pou vire, e akizisyon sa nouvo Lopital Sesel fer gro lebra, e dir sa pou nou e nou pou priv atir sa lopital, non nou pa pou fer sa.

Se egzakteman sa ki *United Seychelles* in fer avek batiman *Maison du Peuple*, sa batiman i pou Lepep Seselwa, e tou Seselwa i annan drwa reklanm sa dan parol defen Prezidan Rene, li menm parey Onorab Bistoquet, bomaten ti dir i ti dekrir *Maison Du Peuple*

koman sa “tredinyon ant Lepep avek Gouvernman”. En parol profon ki dir ou poudir pou lepep Seselwa.

Sesel antye dan en fason ouswa en lot ti kontribye dan konstriksyon sa batiman ki ozordi sitye ant semen *Latanier* avek *Lavenir Bois de Rose*.

Depi zanzan lekol ziska *businessman* in partisip dan travay volonter, e zefor anmas larzan pou sa proze. Mr Speaker, rikord arshiv i dir en sonm R3,000,000 ti ganny ranmase par Komite *Fund Raising* dirize par defen Philibert Loizeau, e ki ti form parti sa sonm 10,000,000 an total pou konstri sa batiman ki lo kare later V93 ki mezir 6,044 met kare.

Alor egzakteman 46 an pase tou dimoun ti antouzyazme pou ede konstri *Maison du Peuple*, pyer fondasyon ti ganny mete le 5 Zen 1979, e le 5 Avril 1981, batiman ti ofisyelman ouver koman parti bann levennman pou mark vizit ofisyel Prezidan *Algerien*, isi Mr *Chadli Bendjedid*.

Fast forward 15 an pli tar pli prezizeman le 29 Fevriye 1996, lo en dokiman sinyen ant Sekreter Prensipal dan Minister Devlopman Kominoter, avek Mr Danny Faure, ki li ti Kordinater Egzekitiv Prensipal Fron

progresif pep Sesel, *SPPF*, ki ozordi i apel *United Seychelles* ouswa *US*, sa parti i aste sa propriyete ki ti'n kout R10,000,000 pou konstri pour R900,000 ouswa selman 9poursan vre valer sa propriyete.

E la Mr Speaker, largiman Onorab Gabriel, pa fer sans, si Chadli Bendjedid ti donn Albert Rene, koman sef *SPUP* sa batiman, aköz an 1996 zot in sipoze pey Gouvernman R900,000 pou sa menm propriyete?

Si pou ou aköz ou pey Gouvernman? Koman en dimoun finans i kapab fer sa kalite refleksyon, *mmm* fodre nou sanze sa. Sa propriyete i mezir 6044 met kare *prime land* Mr Speaker, *prime land* dan *Victoria* - ou pey R900,00?

E prezan i annan ki'n argimant propriyete *Maison du Peuple*, ek *ICCS*, pou ou ki pe ekoute zis sezi, i de propriyete diferan sa. *Maison du Peuple*, li i lo *parcel V80(13) ICCS* li lo *V72(66)* e li pli gran ki *Maison du Peuple*, aköz li i 10,987 met kare i en *complete separate property* sa.

Lo sa propriyete *Maison du Peuple*, i annan en batiman 9, ler zot ti aste an 96, en batiman ki'n fer pandan zis pandan 15an, ti ankor nef ki kout R10,000,000 pou konstri e zot pe selman R900,000.

Prezan konpar sa avek sa ki Onorab Loze, ti dir nou semenn pase ler i ti pe esey zistifye relasyon biznes parti *US* avek *NISA* lo mon Mosyon ki ti dir zot ti pe lwe later avek en batiman lo la.

Alor pou li i normal ki *US* pe pey Gouvernman lo propriyeter *NISA* R49,890 par ran. *NISA* li pey *US* R763,848 dan menm letan, e ki i 15 fwa plis sa sonm ouswa 1,431 poursan plis.

Alor Mr Speaker, ler nou regard detay tranzaksyon ant Gouvernman *SPPF* konsernan propriyete kot *Maison du Peuple*, i ete i konpletman lanver. Alor ki mannyer Onorab Loze, avek lakonpanni pou eksplik sa? Nou pe esper zot zistifikasyon.

E Mr Speaker, ler ou war sa bann kalite tranzaksyon la, atraver ou mon ava dir Onorab Gill, sa in en labi, en labi finansyel ki'n kree par son parti.

E ki an gran parti in met retar zil Praslin dan son devlopman, e pa'n fer pei kapab adres size pri lavi sa Onorab, ki refleksyon ou merit pe fer.

(APPLAUSE)

HON GERVAIS HENRIE

E si nou regard dan Bidze pei ozordi, an 2024 lannen pase zis kestyon *rent* ki

Gouvernman i met dan Bidze pou li peye R189,915,648. 48 sou; pou sa lannen 2025 Gouvernman in Bidze R194,389,048. 76 sou.

I vre ki tou biro pa ti pou kapab al dan *Maison du Peuple*, me i ti a ede tir en songo lo la. E se sa zistifikasyon sa Mosyon, pou US zot pa ankor konpran.

Nou koman en parti politik, e nou la anndan koman bann politisyen nou, nou anvi zot disparet lo lasenn politik, e *of course* nou bezwen *build a case against* zot, nou pe montre pep Seselwa poudir zot en move swa pou sa pei.

E zot pa merit zanmen ganny konfyé responsabilite ankor. Akoz? Zot pa krwar dan bon gouvèrnans nou, nou pe promouvwar bon gouvèrnans depi ler nou pe lalit 32 an, dan lalit politik ou sepa menm plis.

Akoz nou krwar dan bon gouvèrnans, nou krwar poudir ler nou pou promouvwar bonn gouvèrnans i pou enpakte lo bann size parey kou lavi, i pou enfliyans dan en fason pozitiv stabilite ekonomik, zesyon resours leta, e byennet sosyal nou pep, i redwi koripsyon, i tir kontrol, e i zer servis piblik dan en fason pli efikas.

Alor lazenes Seselwa zis mazine ler ou annan en parti ki pe run pei dan en fason normal koumsa so *cool*, so *cool*, e pou ou sa zenn ki pe

ekout mwan, eski ou santi ki US in azir dan en fason zis pou fer en tel keksoz pre propriyete lavalèr 10,000,000, sa zis *building* sa en?

10,000,000, pou li aste 900,000, san oubliy son kare later 6,044 met kare dan *prime land Victoria*. Eski i zis dan sa ki zot in fer? Eski ou ki krwar koman en zenn Seselwa dan legalite loportinite, ou pa santi poudir zot in abiz zot pouvwar pou azir dan en tel fason?

Eski ou santi poudir ou lavenir pou dan bon lanmen avek en parti politik ki pa krwar dan *fairness*, me plito legoizm? Ou avek mwan, nou anvi kit sa monn en meyer landrwa ki nou ti vin zwenn yer.

Se pou sa rezon ki nou pe adres ou koman en zenn ozordi, akoz nou bezwen asire ki nou pei Sesel i en landrwa pli zis pou fitir zenerasyon. E nou bezwen ou akote nou pou donn nou koudmen dan sa lalit.

Sa pa pou vin dan 4 an depi apre ki nou'n ganny pouvwar 2020, i en sanzman profon, e se sa ki mon ankoler avek bann LDS ki ti vot pou nou an 2020, ki pe azite ozordi.

Zot pa'n konpran ki nou pe fer. Sanzman pa vini 10 zour ou lannmen, nou bezwen pran letan. E wi, mon pe dir avek i pa pou vini dan 2 an

COVID nou pa'n kapab fer nanryen dan sa pei. Apartir 2022 ki nou komans vreman travay pour Sesel. Alor ki ou ekspekte nou fer, mirak dan 2 an? I enposib. Alor re kalkil, re kalkil sa ki ou pe panse.

Mr Speaker, nou pa kapab kontinyen, nou pa kapab kontinyen anmenn bagaz lepase avek nou dan lavenir, zis aköz vorasite parti US, e zot lantetman pou kontinyen zwe gro lebra kan tou levidans dan larsiv i montre poudir zot napa rezon pou fer bann keksoz ki zot in fer.

Koman bann zenn Seselwa ki krwar dan legalite devan Lalwa, nou pe demann zot pou tonm dakor avek nou lo sa size, si mon dir zot ki lo sa tranzaksyon SPPF le 26 Avril 1996, okenn *Stamp Duty* pa'n peye, okenn *Registration Fee* pa'n peye, napa laprev evalyasyon sa propriyete avan ki ti ganny transfer dan non SPPF.

E pli enportan ankor napa laprev ki sa R900,000 in aktyelman antre dan kof Gouvernman. Ser lazenes Seselwa mon konfyans dinamizm ki ou egzibite toulezour.

E kekfw a ou pe dir "ar wi, sa zans dan Lasanble ankor pe koz lo lepase, lo 5 Zen 77, lo 43 n." Wi, nou pe koze nou pou kontinyen koze, aköz nou pe

rapel ou senpleman ki fason fer US i danzere, e i en danze kontinyel ki pou menas progres nou pei, partikilyerman nou demokrasi si nou pa asire ki zanmen zot retourn o pouvwar.

E la zis o bor *Maison du Peuple*, i annan en lot propriyete kot ansyen *discotheque Flamboyant* ti ete, zot le vann pou R74,000,000. Be non, be ziska kan konmsi sa zans pa pou konmsi kan pou ase? Kan pou ase?

MR SPEAKER

15 minit Onorab.

HON GERVAIS HENRIE

Mr Speaker.

MR SPEAKER

15 minit.

HON GERVAIS HENRIE

15 minit, mon ava termin lo la, mon pou met 2 paz akote. Dan plas vin avek levidans pou montre nou ki zot in fer tou zot tranzaksyon an konformite avek Lalwa montre zot levidans ki zot in peye, Sef Parti Mazoriter plito Sef Parti Minoriter in deside zis bawawa.

Bite vre, Dirizan Lopoziyon montre nou levidans poudir ki Gouvernman in ekrir Alzeri. Oli laprev ki Gouvernman Alzeri in ekrir Gouvernman

Sesel poudir ki zot napa levidans.

Anmenn la montre nou levidans, koz ou napa en sou levidans. Fer ou devwar koman Dirizan pou annenn levidans pou montre nou ki zot ti ganny *Maison du Peuple*, legalman.

E Mr Speaker, sa bann rimer ki zot fannen la tipik. Onorab Lemiel dan komansman son prezantasyon li i vini i dir avek nou koumsa, “Prezidan Ramkalawan, ti al *Behar* e promet Lenn Lasonpsyon.” Be kan? Non seryezman kan?

Si pa le 23 Zanvye 2018, zot *Cabinet* zot parti dirize par Prezidan Faure, ti aprouv lagreman antre piblik Sesel avek Lenn lo devlopman zesyon loperasyon avek *maintenance* fasilite defans lo Zil Lasonpsyon.

E i ti al fer en vizit Lenn le 25 Zen 2018, en laliny kredi 100,000,000 ki Lenn ti pe sey aste nou, pou zot kapab pran Assumption, e se gras a, gras a Lasanble 15 lo 10 ler nou ti annan sa mazorite ki ti dir zot zanmen nou pou blok sa lagreman, aköz ti bezwen ganny ratifye par Lasanble.

(APPLAUSE)

MR SPEAKER

Alor Mr Speaker, i mal, i mal, mon ti annan en kantite, mon

ti annan en kantite, en kantite mon ti estim Onorab Lemiel, byen be la sa ki ou’n fer konpletman pa vre, e ou estimasyon dan mon regar in tonm en pti pe. Mersi Mr Speaker.

(APPLAUSE)

MR SPEAKER

Onorab Samynadin, wi.

HON KELLY SAMYNADIN

Mersi Mr Speaker. Mr Speaker, mon annan en *matter of privilege under Order 40(2)* ki fek *arise* la. Mon fek ganny en mesaz sorti kot Madanm Soundy, Miss Madanm Vivienne Soundy, ki en zabitan Au Cap.

E in anvoy mwan en mesaz ki al dan sa laliny, “*i refute such allegations that was just aired publicly in the National Assembly by Honourable Lemiel. There was never any letter that I requested any funding. I will take legal actions for my name to be mentioned in such a way. Do her politics to gain her milage but not through lies which are unfounded. I will seriously take legal actions.*

From Madanm Vivienne Soundy. Mersi.

MR SPEAKER

Eski, eski Manm i kapab ekout mon konsey? Mon pli vye ki

zot, permet mwan donn zot konsey. Evite mansyonn non manm piblik dan zot entervansyon. Mersi, onorab Loze, ou annan laparol.

HON JOHAN LOZE

Mersi Mr Speaker, deba in enteresan. Mr Speaker, dan son liv “*Sunshine & Shadows*” en de domenn Doctor Maxim Ferrari, ti dir “*a week after the Coup d’etat all the five permanent members of the United Nation Security Council, the organization of African Unity and the Commonwealth had recognized the new Government of Mr Rene.*” Dokter Maxim Ferrari.

Now ti annan en lot keksoz ki ti sorti devan TRNUC. E Onorab Georges, li i swazir pou rapel TRNUC dan son fason ki dan son faver, be i pa rapel egzakteman tou keksoz ki'n sorti.

Be ti annan en keksoz ki ti sorti kon kwa ki ti annan en case ki ti al devan Lakour kot en serten Mr Valabhji, ti refize pey *tax*. I ti refize pey *tax*, aköz i ti deklare konmkwa sa Gouvernman ki'n vin o pouvwar atraver *Coup d’etat* i en rezim ilegal.

Gouvernman dezyenm repiblik, e *findings* Lakour sete konmkwa ki Gouvernman in vin o pouvwar in ganny aksepte, e i dan en *legal*

standing, e ou bezwen pey ou *tax* parey ki tou dimoun i peye.

So, mon lev sa aköz nou’n ganny eksplike par Onorab Henrie, kon kwa ki sel motivasyon ki sa travay i devan nou Lasanble ozordi set aköz li Onorab Georges, zot le ki nou, nou disparet, sa rezon.

Napa okenn lot rezon ki ou war nou, nou’n pri dan sa *fouteuse* ozordi, set aköz zot le nou disparet, napa en bon *fouteuse* en mo *Français* Onorab Woodcock, mon kapab enstri ou byen.

I napa okenn bon rezon ki Lasanble Nasyonal in pri la apart ki zot anvi nou disparet. Mr Speaker, disparet i disparet de fwa sa? Sa zans depi 2021, pe dir nou, nou’n disparet nou’n fini disparet nou’n mor, nou’n fini mor.

La eleksyon mwen senk zot admet ki zot pe itiliz resours Lasanble Nasyonal Sesel zis aköz ki zot anvi nou disparet. Be konpar travay Mr Speaker, konpar travay.

Onorab Flory Larue, 6enm Lasanble, i ti gather tou son dokimantasyon tou son levidans i ti al raport parti *United Seychelles* avek ACCS ale raporte met case kot ACCS.

ACCS li in fer sa ki ACCS i fer, in flank lasezi lo tou nou popoyote, e *boff*. Alor zot vreman krwar mon pa kapab pronons propriyete zot en.

Be ou konnen kwa ki enteresan si zot krwar mwan mon pa kapab pronons propriyete mon'n aktyelman en bonnonm *Guinness* debout lo en sez dir popoyote, ler *Guinness* in mont dan latet mon'n fer boufon *Guinness* dir popoyote mwan Johan Loze.

Now Mr Speaker. Onorab Flor Larue, ti fer en travay ki tou dimoun i kapab konpran i al kot Komisyon Anti-Koripsyon in raport en tranzaksyon ki li i ti krwar ti annan koripsyon ladan ti *frauduleux*.

Be la ki nou pe fer ozordi? Sey eksplik mwan, kwa sa, sa? En Mosyon ki par ladmisyon sa dimoun ki deryer rido i ankor Sekreter Zeneral parti *LDS* dan plas sa dekorasyon ki fer krwar i Sekreter Zeneral, i admet ki sa i la zis aköz zot, zot anvi war nou disparet.

Sel rezon, en gaspiyaz resours gaspiyaz letan Lasanble, e zot pe pran Seselwa pou bet. En keksoz ki'n deza ganny investigated par ACCS, e tou sa propriyete ki zot pe dir parti *United Seychelles* pe vann, ti anba lasezi, ti'n met lasezi lo la, ti'n take ti'n kadnante.

In met lasezi lo la ziska in nepli kapab aköz Lalwa pa permet li, met plis letan ki'n mete, e sa pa'n al pli lwen ki sa. Prezan mon demann mon

lekor en lot kestyon, eski i annan en problem ant zot avek Madanm De Silva.

Akoz la i fer dezyenm lenterferans direk ki zot, zot sey fer pou *foutre la merde* dan louvraz Madanm De Silva dezyenm Mosyon, e sa enn admet par Sekreter Zeneral ki *frivolous*, e *vexatious* i zis aköz zot anvi war nou disparet napa okenn lentansyon serye ladan.

E de kestyon in ganny poze, R900,000 pou en batiman R10,000,000 ti R 900,000 pou sa later batiman ti deza pou nou Onorab Henrie, ou pa'n konpran sa bout ou? Tou sa malen ki ou malen.

2 enm kestyon in poze “arr pa'n al Bihar i pa'n dir sa.” Be ou konnen kot nou konnen poudir ler i ti Bihar, i ti dir i pou akseler sa vin devan Lasanble, sa lagreman vin devan Lasanble?

Mon a dir ou kot nou ti konnen, sa *interview* ti ganny poste lo paz *Facebook* Onorab Sathya Naidu, la kot nou ti ganny sa lenformasyon nou, lo son paz *Facebook* ki ti met sa *interview* kot Onorab Ramkalawan sa lepok ti pe dir poudir ler i retourn Sesel i pou akseler demars pou sa lagreman vin devan Lasanble Nasyonal, la kot nou ti gannyen.

Mr Speaker, sa bann dimoun laba lot kote la zot pa

serye. Zot asize zot pou dir ou tou le mal ki'n arive dan lepace, mon dakor, mon dakor sa bann menm dimoun zot al selebre 14 *Juillet* bwar diven manz sepa kisisa ti en revolisyon i osi 14 *Juillet*.

Ou le dir mwan Sesel in touy plis dimoun ki Robers Pierre? Sesel in touy plis dimoun ki Robers Pierre? Sesel i annan plis atosite ki Robers Pierre in fer La France swivan lazournen la *bastille*? Seryezman zot latet i bon zot?

Selman zot selebre revolisyon *francais*. Le 4 *Juillet* ti merit ganny envit zot, zot ale menm zot selebre revolisyon Ameriken. Bon, in annan le mal ki'n arive Sesel dakor, nou'n annan en prosesis *TRNUC*, in annan preskripsyon ki'n ganny mete dan *TRNUC* kot in dir Gouvernman pey konpansasyon.

Ziska prezan ni en negosyasyon zot pa ankor kapab fer, *let alone* pey konpansasyon zot rod tou kalite leskiz. Me zot kontinyen zwe dan sa boubou, zot kontinyen zwe dan boubou sa bann viktim.

Sa zot seval batay sa, be zot pe re abiz viktim la zot ki'n vin abizer la, ni koz ek sa bann dimoun zot pa kapab, be asiz ek zot koz avek zot. Ou pa le koz ek sa bann dimoun? Zot in met en poupet kot *Attorney*

Zeneral anvoy zot kot sa poupet, anvoy zot laba zot a fer zot negosyasyon.

Ni sa zot pa pou fer? zot seryezman pa serye dan nanryen ki zot dir. Mr Speaker, swivan 77, i peryod kot la mazorite lakaz in ganny fer dan sa pei, i annan en zefor ki ti ganny fer pa par aksidan. Be i ti aköz ti en *policy* parti *SPPF*.

Nou ti annan nou en *policy Socialized Housing*, zis parey nou'n annan nou en *policy* Lasante Iniversel, *Socialized Health*, zis parey nou'n annan nou en *policy* Ledikasyon Iniversel, *Socialized Education* dan sa pei ki ankor baz ki nou pei i fonksyonn lo la ziska ozordi.

Nou'n evre pou fer dibyen pou sa pep. E nou'n fer li par desizyon par nou bann *policy*, zot pe gele nou ki ti anvoy manrmay etidye 2020. Be konbyen etidyan Seselwa profesyonnel nou'n formen atraver *policy* kler, e konkret depi 77 an montan?

La mazorite zot la anndan ki bann profesyonnel in ganny formen anba Gouvernman *SPPF*, Parti Lepep. Nou'n fer pou benefisye, e anmenn byennet pour sa pep pti koman gran ziska stov petrol nou ti annan nou en *policy* ki mannyer pou eliminen dan lavi nou pep, aköz ti en danze.

Subsidize ti pas avek stov gas dan tou distrik, ale ou a gannyen at a *subsidize rate*. Nou pa'n fer keksoz par aksidan nou, kabinen trou ti elimin par en *grant* ki ti donnen kot Biro Brans, ale *apply* zot vini zot vizite zot war ou sityasyon ou ganny ou *grant*, pa ni ti en *loan* ti en *grant*.

Mr Speaker, dibyen pour sa pep in ganny fer par sa parti *SPPF*, son bann dirizan, son bann manm, e senpatizer. Dimal en ditor ki'n ganny fer olye rezourd zot kontinyen zwe dan ladan, zwe ladan, zwe ladan.

E aköz zot pe zwe ladan? Aköz Sekreter Zeneral, le vre Sekreter Zeneral in admet ki zot anvi war nou disparet, zot pou fer dimoun soufer, zot pou fer dimoun matir zis aköz zot laba sa ta sez vid zot anvi war nou sa pti git nou ki annan la anndan disparet.

Zot pa pou fer sa ki byen pou sa bann viktim *TRNUC* ki zot in abize depi 2020. Non, zot pou kontinyen abiz viktim *TRNUC*. Mr Speaker, mon i annan de keksoz ki mon'n war ozordi dan sa Lasanble mwan.

Enn, i annan en zalouzi enorm vizavi Onorab Sebastien Pillay.

(laughter)

HON JOHAN LOZE

E sa, sa in sorti kler ler Onorab Henrie in koze. In kadre son prezantasyon antye lo Onorab Pillay, setou pirman zalouzi. Zot la sofa Rosita, Mr Speaker.

Lot zot in dir ki zot pe demann en lanket ki pou sorti an piblik, tou dimoun pou tandé sa Onorab Georges, ki ti dir yer. Mr Speaker, be lanket lo Cascade zot pa oule? Lanket lo move zesyon *COVID* ki ziska ozordi nou pa konnen konbyen nou frer in mor. Zot pa oule fer lanket lo move zesyon *COVID*?

Mr Speaker, i annan 12 pti baba ki'n mor dan Lopital Sesel; 12 pti baba ki'n mor dan Lopital Sesel san en rezon kler personn pa koz lo la zot pa *deserve* en lanket zot? Konmsi zot pa *deserve* en lanket sa 12 baba zot? Nou pou al lanket 40 an pase?

Prezan nou pou al lanket en keksoz ki pa ni nou *purview* pou nou lanket isi anndan, i *purview* *ACCS*, e *ACCS* in fini lanket sa li la nou, nou pran i reste 16 zour travay, 16 zour travay. Dan 16 zour travay nou pou fer en lanket ki *span over* 40 an, ou vwar mann timer lespri i marse?

MR SPEAKER

15 minit Onorab.

HON JOHAN LOZE

Mersi Mr Speaker, mon ava terminen. Mr Speaker, ou'n tir en *ruling* ki mon pa pou kase ou'n dir pa nonm non dimoun deor, e i annan bann lensidan ki pe leve.

Selman mon pou dir ou, mon annan en lalis devan mwan la 13 non, i annan ladan i pa non dimoun i annan legliz Advantis, i annan travayer konpansasyon travayer *Mahe Beach*, i ladan.

I annan mon 13 non, en lalis 13. Sa lalis 13, sa lalis 13 i annan en keksoz an komen, e sa ki sa ti annan an komen, se ki tou sa bann dimoun zot in ganny vole propriyete par en Avoka, zot tou zot in ganny vole par zot propriyete par en Avoka, 13, 13 pa enn 13 dimoun.

Frod, trik, vol later, vol larzan son kliyan, e nou tou nou konnen lekel, e mon'n bliye azout *One Coin* lo - fo *affidavit one coin* ti a fer 14 lo sa lalis.

Mr Speaker, pou vin donn nou leson ozordi en triker, en voler sa nivo pou vin donn nou leson? Zanmen, mersi Mr Speaker.

MR SPEAKER

Onorab, eskiz mwan si ou pe dir Onorab Georges, mon krwar i en lakizasyon grav, ou pa'n nonm son non, me selman an menm tan ou pe dir tou dimoun i konnen.

E se akoz Onorab Georges, in anmenn sa Mosyon. Mon krwar dan sa ka mon ti a envit ou pou rezerv okenn ka ki ou annan pou Lakour, e pa kontinyen avek alegasyon dan sa Lasanble.

HON JOHAN LOZE

Premye ka mon pou anmenn *heirs* Mr Chamery Chetty.

MR SPEAKER

Onorab, ou a kapab kontinyen ou a kapab konklir *please*, terminen.

HON JOHAN LOZE

Mersi, mersi Mr Speaker. Mr Speaker, an termin an mon pou zis dir sa, yer nou ti ganny dir len propriyete kot larme Mont Fleuri. Mon zis anvi met en lord ladan Mr Speaker.

Sa propriyete la ti orizinalman propriyete bann *heirs De Saint Jorre*, avan i ti vin layter larme sepa kisisa. E tou bann zabitan ki ti lo sa later zot ti ganny lakaz dan *Housing Estate* an parti ti zefor bann *heirs De Saint Jorre*, Madanm D'Offay, ek Madanm Aishler.

E an parti ti Gouvernman SPPF ki ti *provide* zot. So Mr Speaker, Onorab, pa konn Mont Fleuri li i en zans vini sorti Port Glaud koz keksoz ki konnen pa vin koz Mont Fleuri konmsi i konn Mont Fleuri. Mersi Mr Speaker.

MR SPEAKER

Mersi Onorab, *ok* mersi silvouple, silvouple evite, evite bann kriye atraver lasal. Laparol pou Onorab Arissol, Sandy.

HON GERVAIS HENRIE

Dir li, dir li.

HON SANDY ARISSOL

Mersi Mr Speaker.

(laughter)

HON SANDY ARISSOL

Bonn apre midi tou dimoun ki a lekout. Mr Speaker, mwan lo sa Mosyon mwan anvi fer serten refleksyon, e mon anvi ki dimoun i ekout byen, e nou konpran, e nou analize akòz sa Mosyon in monte.

Ou konnen i annan en keksoz ki Onorab Georges, in komans avek se le 5 Zen 1977, letan en group dimoun i vol en pei zot vol en pei, e sa letan sa pei i annan en paviyon, i annan en lim nasyonal, i annan dimoun ki reste, e nou pei sa letan ti annan anviron 115 zil.

E letan en group dimoun i vol en pei par fizi, versman disan, laenn touy son frer ek son ser fer disparet, fer ou sove dan ou pei pran ou propriyete pardfors, dir ou ki pou fer. Ki mannyer nou apel sa group dimoun?

Nou apel zot bann zanfan fann Marie, nou apel zot bann zanfan *Coeur de Marie* oubyen Bon Secours, oubyen nou apel zot bann group *Rosaire*. Mr Speaker, si ou demann granmoun i pou dir ek ou sa group ki'n vol nou pei napa lot mo pou apel zot, set en group bandi, e en group move dimoun, se sa ki zot devret ganny apele. Me zot pran nou pei alor mon pa pou war drol si *Maison du Peuple* in pas an manboulouk, e ozordi *Maison du Peuple* in vin pou zot.

Zot in kapab pran en pei i annan plizyer keksoz dan nou pei ki zot in pran, e Mosyon i lo *Maison du Peuple* Mr Speaker. Me avek *Maison du Peuple* la nou'n aprann poudir *Flamboyant* zot pe rod vann ki o bor lanmenm o bor *Maison du Peuple* R74,000,000.

I enportan pou dimoun not byen sa R74,000,000 pe rod vann. Prezan kestyon ki nou bezwen demande dan R74,000,000 lekel ki benefisye Mr Speaker, avek R74,000,000? Lo ki kont i ale R74,000,000 avek plizyer lezot milyon ki nou'n tande; Larivyer Anglez, St Louis, Beau Vallon, kote i ale sa 74,000,000? Lo ki kont i ale 74,000,000?

Eski bann siporter *SPPF* ki pe ganny ankouraze pou desann pou vin lo en *Mini*

Stadium Dimans aköz zot in deklar zot lekör en gro parti selman zot pe fer lo en *Mini Stadium* en *rally* - eski zot konnen Mr Speaker, kote pe ale 74,000,000 avek lezot milyon ki nou tann koz lo la? Lekel ki pe benefisye atraver sa bann larzan ki nou tande? Lekel ki benefisye avek bann rent kot ICCS laba ki anba kot US ilwe?

Mr Speaker, tou bann later ki'n ganny vann lo ki kont pe ale? Eski letan zot fer zot, letan zot fer zot kongre, eski zot prezant en kont finansman devan lo *board* avek zot bann manm? Eski zot eksplik ek zot bann manm "lala depans nou lofis, lala depans nou travayer, lala bann saler ki nou pe peye, e lala larzan ki nou'n anmase atraver lavant bann later Lepep Seselwa ki nou pe vann malapropo, lala sa kont ki al lo la? E lala bann depans ki nou'n fer."

Mr Speaker, eski sa ki part US bann siporter zot ganny dir ler zot al zot bann kongre? Eski sa? Sa i bann refleksyon ki nou bezwen fer ansanm Mr Speaker.

Letan zot vini zot dir ek nou "dimoun pe mor lafen, zanfan pe mor" Onorab Audrey, in dir nou dimoun bann zenn pe rod travay, napa ase larzan ki antre dan lakour.

Be la zis la *Flamboyant* 74,000,000. Eski bann Manm US, bann MNA US zot konnen lo ki kont pe ale? Lekel ki pe zer sa larzan? Konbyen *long service allowance* nou ti a'n gannnen atraver sa larzan peye? Konbyen logmantasyon nou ti a donn travayer atraver sa bann milyon?

Me mon aprann Mr Speaker, kantmenm zot vin dan Lasanble kot nou zot tap lanmen lo latab an relasyon avek trezyenm mwan saler, donn tou travayer kantmenm napa performans, bann *staff* kot zot *Maison du Peuple* pe konplent, parski zot pa pe gannnen zot trezyenm mwan saler zot. Selman zot vin dan Lasanble zot tap lanmen lo latab donn tou travayer son trezyenm mwan saler, travay pa travay.

Be *Maison du Peuple*, i annan en problem, bann *staff* ler zot ganny *phone call* nou osi nou ganny *phone call*, "nou trezyenm mwan saler zot pa pe donn nou sa mwan zot in sant nou zistwar.

Be letan ou pe anmas 74,000,000. 12,000,000. 20,000,000. 18,000,000. 8,000,000. Be aköz sa bann travayer pa ganny zot trezyenm mwan saler parey zot vin evoke dan Lasanble Nasyonal kot zot ganny medya nasyonal? Me laba dan kasyet

bann travayer i ganny pini Mr Speaker.

Letan zot vini zot dir ek nou pe lager *bonus* pou *STC* la nou'n aprann avek *VP*, konbyen larzan zot in fer sa menm parti li pe anmas milyon, e milyon avek *STC*.

Nou'n tann 245,000,000. 40,000,000. 810,000. 10,000,000 par an. Mr Speaker, se zans zot konn kont zis dan milyon zot, apre zot monte zot dir ek nou i annan zis R5 dan mon pos.

Mr Speaker - Mr Speaker, sanmenm sa refleksyon ki mwan ler mon pe koz lo sa Mosyon Onorab Georges, an relasyon ek *Maison du Peuple* mon anvi Lepep Seselwa i fer sa refleksyon avek nou.

Akoz mwan anvi donn ankor legzanp? Si sa Gouvernman, sa Gouvernman oparavan ki son bann Manm la anndan zot deklare zot dir nou pa form parti vol, nou pa'n touy personn, nou pa'n al okenn par.

Mr Speaker, dan lazournen letan nou travay en dimoun i dir ek ou, get sa mwan mon pa en kretyen mwan, mon pa al lanmes mwan. Selman dan Dimans ou vwar li i rantre dan en legliz *Catholic* parey mwan ki en kretyen, i fer sinydekrwa, i fer zenifleksyon, i al konminyen apre mon *Père* i dir ek li ale

dan lape *du Christ* i retournen dan lape *du Christ*.

Me selman Mardi ek Merkredi letan i zwenn ou i dir ek ou i pa en kretyen li. Alor *US* bann Manm ki la anndan, zot pa'n form parti krim, zot pa'n vol later personn, zot pa'n fer nanryen, selman sa menm group dimoun ki la anndan zot *meeting* zot al fer *Maison du Peuple*.

Laba sa landrwa ki zot in pran avek Lepep Seselwa, laba kot zot ale pou zot glorifye sa dimoun ki'n fer atosite avek Lepep Seselwa, e ler zot sorti lo sa 12 mars peron zot tonm lo semen *Bois de Rose* zot dir zot pa form parti sa parti politik.

Mr Speaker, kot konfizyon i vini, mon pa konnen. Selman dernyen fwa mon ti dir kot *US* i met lanmen zafer pa bon. Mon a donn detrwa legzanp.

Maison du Peuple i enn, annou get zot annan 40 morso later zot menm. Mr Speaker, zot in pran avek lepep Seselwa, e apre zot vini zot dir ek nou, “ i annan dimoun en bon pe lannen pe esper later, pa pe ganny later.”

Mon rapel proze Roche Caiman mwan. Proze Roche Caiman nou ti ganny dir pou dir en proze ki Gouvernman Sinwan in donner, e ler sipoze donner sipoze donn avek *aircon*, avek *tiles* anndan ladan.

Mon rapel byen, parskiler Prezidan Sinwan, ti vin Sesel pou vin vizit son proze ki ti'n donn Gouvernman *SPPF* pou fer pou Lepep Seselwa, ou konnen ki zot ti fer? Tou dimoun Roche Caiman i rapel.

Zot ti tay kot en flat, enn zot gran siporter, met *tiles* dan son lakaz, degaze met *aircon* pou Prezidan Lasin, vini dir “arr, la wi, Gouvernman *SPPF* in travay e in rekonpans sa dimoun.”

HON GERVAIS HENRIE

Apre ki zot ti fer?

HON SANDY ARISSOL

Mr Speaker, koman Gouvernman Sinwar i ale, *aircon* i ganny tire kot sa madanm.

(laughter)

HON SANDY ARISSOL

Remet dan lofis kot ti pran. Onorab Audrey, i konnen Mr Speaker, li. I konn byen li, i riye tou. Sanmenm sa mon dir ek zot, nou pa kapab *trust* Gouvernman sa Gouvernman avan ki deklare zot lekò koman en Gouvernman ki pe travay pour lepep Seselwa. Ozordi zot en parti minorite.

Mon a donn en lot legzanp, get *L'union Estate*. *L'union Estate*, ti ganny deklare li pou en lakour prive en sel fanmir. Annou get nou

bann zil, nou bann zil ki nou ti kapab devlope ozordi zot ti pe sey lager pou fer baz militer lo la, e lezot nou bann zil zot ti pran pou zot donn zot bal personnel. Pran bato dan *weekend* monte, vir kare, zwe *tennis* apre zot ti desann.

(laughter)

HON SANDY ARISSOL

Ok? Aprezan zot retournen zot dir ek nou, non zot pa'n fer sa bann zafer. Annou get Kan Larme zot fer Kan Larme, Kan Larme selman i vey zis en fanmir, e larme i devret lwayal avek zot tou. La letan larme ozordi dan nou pei in konpran ki son vre rol zot anvoy en *memo* atraver Onorab Audrey, ki'n koze taler;

“Ou sa solda, ou sa zofisye lapolis desann vin lo sa *Minis Stadium*, pou nou fer nou gran *rally* ki nou pou fer.”

Mr Speaker, annou get Coetivy. Coetivy i ganny kree avek bi pour Seselwa ganny 2 pake *prawns* apre ki zot, zot fer zot? Zot, zot vann aletranze, larzan zot partaz antre zot, bwat *toilet paper* i ganny degize zot met labyer ladan selman lo kartron zot met *toilet paper* pe al lo zil.

(laughter)

HON SANDY ARISSOL

Apré nou war zot pe lapés dan *Marine Park* ler ou dir ek zot, zot anmenn *case* Ankour. *Ok*, Mr Speaker? Sa menm group dimoun zot dir ek nou zot anvi retour o pouvwar.

Get nou paspor, zot vann nou paspor avek etranze pou \$25,000 Ameriken sa letan, e ozordi dimoun ki annan pli bokou later se nou se en etranze ki zot in vann zot paspor ki *wanted* partou dan tou lemond antye zis parey Marech, ki zot ti met dan en bwat kartron aswar zot ti fer li al dan son pei.

Zis parey sa enn ki ler i ti al Sid Lafrik, zot ti fer Lotorite Sid Afriken atrap li, e met li dan kaso akòz zot ti'n byen pase lo son lasyer, sa ki ti ganny *car hire*, sa ki ti ganny *take away* zot konnen lekel zot, zot. Zot *leader* i enplike ladan li, i konnen demann li.

Mr Speaker, annou get *STC*. *STC* parey *VP*, in dir ek nou zot in anmas en kantite keksoz lo la. Annou get Bidze Ladefans, sa menm parti zot fer larzan pase atraver Bidze Ladefans pour zot ganny lanvlop gri, lanvlop kaki, sorti dan baro antre 9 er diswar.

Lannmen bomaten zis pou zot donn en bal, aste vot apré ki zot fer? Dimoun ki pou peye. Get Zil *Soleil*, *Ile Soleil* Gouvernman in kree *Ile Soleil* avek bi pou asiste bann pti

antreprenè pou dimoun ganny landrwa pou li reste.

Ki nou war? Zot donn de dimoun landrwa reste, apré zot dalon ki ganny lakonpannyen sekirite, zot dalon ki vin konsiltan, e li ki ganny pli gro morso later lo Zil *Soleil*, e en *chaos* enorm.

Mr Speaker, annou get *SBFA*. *SBFA* i ganny kree avek bi pou asiste de zenn pour li fer *backyard farming* anler la Perseverance, kan zot konnen pa kapab fer *backyard farming* la.

Zot anbet li, zot anbet li pou fer *backyard farming* apré zot kriy li lo radyo tou pou li vin pey son *loan*. Ki nou war *SBFA* Mr Speaker? I ganny ouver pou lazenes li, selman bann dimoun ki ganny 50 an 55 an ki pran *loan*, e zot ganny toupe pou zot pa rann sa *loan*, e personn pa kapab dir zot.

E *SBFA* Mr Speaker, ziska dimoun mor, dimoun ki pa egziste lo lalis voter ti ganny *loan* avek *SBFA*. Non, be prezan sa group dimoun zot anvi retourn o pouvwar ankò, zot anvi Lepep Seselwa i krwar zot.

Mr Speaker, mon dernyen legzanp en legzanp enteresan. Sak fwa avan eleksyon la tou bann dimoun ki annan lakaz avek Gouvernman *PMC* zot bann peyman i ganny *reduce*

oubyen i ganny *write-off*, avan eleksyon sa.

Mon annan en dokiman la en madanm in montre mwan. Koman eleksyon i fini tou sa bann dimoun apre ou war "*interest debiting*", "*interest debiting*", "*interest debiting*" lo zot peyman PMC.

Savedir sa bann dimoun i ganny anbete sak fwa eleksyon pou fer krwar zot *loan* in ganny *write-off*, oubyen i ganny redwi apre koman eleksyon i fini zot in ganny vot sa bann dimoun "*interest debiting*", "*interest debiting*."

E li i kontinyen peye, i peye. La ler mon vizit en madanm 76an i dir mwan "Mr Arissol, mon ankor peye, mon ankor peye." E in vin en pansyoner. Konpran?

Mr Speaker, sanmenm sa bann refleksyon ki mwan mon ti anvi fer lo Mosyon Onorab Georges. Nou annan en group dimoun dan Lasanble Nasyonal ki pe deklar zot lekor zot pa konn nanryen, zot pa koupab.

Me letan ou asosye avek en group bandi, en group move dimoun granmoun, granmoun pou get ou koman ou osi ou'n vin en group bandi e ou asosye avek en group move dimoun.

Sanmenm sa group dimoun ki pe dir ek Seselwa poudir nou, nou pa pou ganny elekte an 2027. Tou sa Manm

ki zot war lo sa kote lata la le 28, nou pou kot Lorloz dan selebrasyon, son Mardi nou pe vin sermante dan Lasanble Nasyonal.

(APPLAUSE)

HON SANDY ARISSOL

Son Mardi, parski nou pou annan Bidze pei pou nou *deal* avek ziska Desanm Mr Speaker, e apre nou Prezidan i ava sermante. Nou ki pou retourn o pouvwar, zot pa zot letan bous bann gro trou deryer parey zot in dir, pas zot letan get nou lo televizyon si SBC in filmen, ouswa pa'n filmen, pas zot letan rode lekel Rosita.

Sa ki pli malere Mr Speaker, ler mon'n donn tou sa bann legzanp la tou sa bann legzanp kantite i annan ankor be selman letan ki ou'n donn mwan pe fini.

Tou sa bann letan sa bann menm dimoun zot refize deklar zot *assets*, sa osi i annan. Prezan sa ki pli enteresan ler nou get bann portre nou war nou sez ki sel landrwa ki annan sa bann sez zis kot Lasanble Nasyonal mon pe rode ti vann sa, aköz mon osi mon le enn mon pa'n trouve.

Selman mon war dan bann portre personnel pe sirkile lo rezo sosyal, pa mwan ki'n envante Mr Speaker.

Mwan mon'n vwar parey tou dimoun ki swiv rezo sosyal en sez ki en pe parey nou sez.

Alor mwan parey zot konn mwan, mon dir rann nou, nou sez si ou'n pran. Si ou'n al avek ou *file* i *ok*, be pa pran sez pou al anmenn dan lakour pou ou fer sofa avek pou *relax* ou lekor Mr Speaker.

Alor mon pwen final lo Mosyon Onorab Georges; Mr Speaker, sa group dimoun ki zot la, la ki zot apel nou bann sez vid zot byento zot pou vin bann sez vid zot.

Zot vin bann sez vid. E sa ki enteresan lot kote tou bann ki napa en distrik zot ki maltrete, zot ki vin ek anbaras zot Manm, zot ki vin avek bann mo parey min bwi, zot menm zot ki vini ki rod sepa ki lekel.

Zot napa distrik zot, selman zot ki anbaras zot Manm, e zot abes zot parti, e zot fer zot dimoun perdi detrwa vot ankor. Me par kont, bann ki'n ganny elekte zot sey zot mye pou zot *rise above* zot pou zot fer donn en reprezantasyon korek.

Parey Onorab Henrie, in dir taler Mr Speaker. me nou, nou pe dir lo sa kote latab *Maison du Peuple* pa pou ganny tire kot i ete pou al met lari bazar li, i pou reste lanmenm - pa pou al avek okenn par nou.

Nou, nou anvi dir *Maison du Peuple*, i bezwen retourn

pour lepep Seselwa, i ava annan bann landrwa dan sa lofis kot bann trwazyenm az i a kapab ganny en lofis i osi, bann dimoun *autism* pe rod en landrwa, lazenes i a kapab vin defoule.

Akoz Larivyer Anglez zot in vann, e zot in pran tou larzan pou zot, e i enportan pou sa eleksyon ki a pe vini pou dimoun pran sa eleksyon koman en *referendum* pour nou dir ler mon al vote mon ti a kontan kit tou byen lepep Seselwa i retourn pou Lepep Seselwa.

(APPLAUSE)

HON SANDY ARISSOL

Mr Speaker. Alor mon ti a kontan, mon ti a kontan dir avek Onorab Georges, poudir nou lo sa kote latab nou pou siporte si fodre kre Komite aköz nou menm ki pou tournen dan lot manda ki pe vini 8enm *cohort*.

Nou ava fer sa Komite, nou ava etabli pou ki tou dimoun ki'n donn lanmen en pti koudmen kre form parti sa *Maison du Peuple*, i ava enportan.

Mr Speaker, an relasyon avek volonter mwan anvi dir en keksoz. En lepok dan nou pei tou dimoun ti fer louvraz volonter nou ti desann, nou ti al aranz en *bus shelter*, nou ti al kre en rigol. Ler ou fini fer

sa koman en volonter i pa vedir sa ki ou'n fer i vin pou ou.

Si en group dimoun in desann in volonter pou fer *Maison du Peuple*, i pa vedir *Maison du Peuple*, in vin pou zot, se pou sa rezon-

MR SPEAKER

15 minit Onorab.

HON SANDY ARISSOL

Mwan ava fini Mr Speaker.

MR SPEAKER

Please.

HON SANDY ARISSOL

Si apel travay volonter mwan ava fini travay volonter. Ler ou fer travay volonter Mr Speaker, i pa vedir ki apel pou ou, me i retourn pou lepep Seselwa. Alor mon ava konklir Mr Speaker, san ki mon evok lartik 57(10) mwan osi, mon ava termin la pou permet Onorab Aglae, i osi kapab fer son entervansyon.

Be selman mon pe *dir Maison di Peuple*, pou bezwen retourn pour lepep Seselwa sote, pile zot, e sa eleksyon ki a pe vini nou pou al *shower* zot bokou plis fermal ki sa enn avan. Mersi bokou.

(APPLAUSE)

MR SPEAKER

Wi Onorab Lemiel, ki ou pwen?

HON SYLVANNE LEMIEL

Mersi Mr Speaker, mon ti a kontan *raise en matter of privilege* letan Onorab Samynadin in lir mesaz ki Madanm Soundy in anvoy li.

Mr Speaker, devan mwan la mon annan Soundy *versus* Ramkalawan Desann le 16 Desann 2016, kot i ti ekrir ou koman *Leader* parti *SNP* mon panse sa letan.

Akoz i ti ekrir ou, kot i ti pe dir ou i pe *resign* koman *Treasurer*, e *Chairperson SNP Women's Association*. E son *resignation* ti konsernan larzan ki zot ti pe *raise* pou zot fer serten proze. Sa ki mon ti pe re fer lo la lo mon *speech* mwan. E mon pa pou lir li antye-

(Interruptions)

MR SPEAKER

Order! Wi. Ok Onorab.

HON SYLVANNE LEMIEL

Mon pa pou lir li antye ki parey in mete, me selman ladan i annan sa bout kot i ti pe nonmen poudir "*Although Wavel stated in that particular office bearer meeting, that R100,000 was received by him and Jean-Francois, from other donors. Wavel further stated that amount received will not*

be disclosed and does not have to go through the account because SPPF has created such a precedence, and therefore we should do the same."

So ti en kankan lo zafer larzan sa, so si Madanm Soundy i le anmenn Ankour i ava vin en dezyenm zafer ki si i le anmenn Ankour. Mersi pou ed mwan klarifye. *Thank you.*

MR SPEAKER

Bon.

(APPLAUSE)

MR SPEAKER

Well, ou'n, ou'n state en ka mon vreman pa kapab rule lo si annan en privez ki'n ganny afekte oubyen non. Mon zis konsidere ki ou'n met ou statement lo rikord Lasanble, that's it. Onorab William, mon a donn ou laparol.

HON WAVEN WILLIAM

Mersi Mr Speaker. Mr Speaker, pour komanse permet mwan lo lapar sa gran fanmir aktivis sipoter LDS e zabitan ki vwar LDS koman sa sel opsyon pour Sesel o dela 2025, pou ralye Dimans, Grand Anse Mahe mon le dir zot en gro mersi, e felisitasyon.

(APPLAUSE)

HON WAVEN WILLIAM

Mr Speaker, mon remersi tou bann manm fanmir LDS dan lezot distrik ki ti ranpli distrik Grande Anse Mahe, pa zis lo laplenn, lo lans parti semen Beoliere ziska kon trou Kannal Lanmor, e bout semen o bor Vilaz Troyan Barbarons.

Alor koz lo trou vid pa efas realite solidarite fanmir LDS ki pe ouver lebra ek sipoter US ki pe vire toulezour. Mr Speaker, me lzenes, lzenes ti form 50poursan *turn out*.

Si sa manman pa kapab gete pou vini get manman lo laplenn baze lo lakantite dimoun ki ti prezan Mr Speaker. Isi lo sa kote latab nou konpran tourman, e traka US ek sa *motorcade* ek sa *rally* ki pe pas en mesaz konvenkan ver 25, 26, e 27 Septanm.

E Sesel pe dir le 27 anvoy le 27 mon poz sa la pou dizere Mr Speaker, zot bann riye depi bomaten i bann riye zonn isi dan sa Lasanble, ek lakanmizri ek realite ki US pa pe kapab distorte Mr Speaker, parey sa mansonz lo lapartenans *Maison du Peuple* ki size Mosyon *Leader* Zafer Gouvernman in anmenn.

Nenport ki moman ki Mosyon dan manda 7enm Lasanble ti pou vini lo *Order Paper*, ti pou dir se malis vanzans, e ki sa size pa dan lentere Seselwa aköz i annan

sitan size enportan pou diskrit lo la parey in ganny dir bomaten.

Mr Speaker, Mosyon i li konm swivan; Mon remerci Bondye ki'n kre sa moman pou nou Lasanble abond sa deba Mr Speaker,

Lasanble i konstitye en Komite Lasanble pou antreprann en lanket dan rezon aköz *Maison du Peuple*, in vin propriyete parti *United Seychelles*.

E an partikilye sours finansman piu aste sa later, e pou konstri sa batiman. Mr Speaker, mon pa pou repet sa ki'n ganny dir lo la. Aköz Onorab *Leader* Lopozisyon, e lezot Manm in ankadre rezon aköz pe demann sours finansman.

Dezyenmman, Mosyon i pe dir lanrezistremman sa later, e sa batiman lo non predeser parti *United Seychelles*.

Mr Speaker, Onorab Henrie, in anmenn, in anmenn dan son entervansyon ki *Stamp Duty* pa'n peye napa levidans Mr Speaker, lo plizyer keksoz ki ti'n devret ganny fer.

E trwazyenmman, aköz sa batiman pa devret retourn parey son non i dir pour Lepep Seselwa Mr Speaker? Mr Speaker, e Mosyon i osi dir e pou fer okenn rekomandasyon neser avok Gouvènmman lo fitir sa later, e sa batiman.

Mr Speaker, sa Mosyon i en Mosyon ki annan son merit. Mr Speaker, sa Mosyon tou le de kote latab ti devret si nou anvi - me nou, nou anvi, me lot kote pa anvi pou kapab fer sa resers an menm tan ki pep Seselwa osi i kapab konpran egzaktman ki'n arive.

Mr Speaker, mon pou vot an faver sa Mosyon pour plizyer rezon, baze lo mon leksperyans sa ki mon'n tandè, trouve, aksyon ki mon'n bezwen fer anba direktiv letan mon ti lo zot kote.

Ozordi Mr Speaker, menm apre 30an mon lavi ek zot depi en bout lepok *SPPF*, Parti Lepep, e *US* mon leksperyans in fer mwan pli byen konpran zot fason fer, e mazinè Mr Speaker.

E ankore mon pe repete ki mon napa regre pou kit zot kote pou bon rezon Mr Speaker.

(APPLAUSE)

HON WAVEN WILLIAM

Ozordi mon pli byen konpran aköz sa liv "*Animal Farm*" dan sesyon *History* Kolez ti ganny *ban* Mr Speaker. Mr Speaker, sa liv ti ganny *ban* dapre lotorite sa letan konteni sa liv ti pe tro ouver lespri, e lizye bann etidyan *Seychelles College* Mr Speaker.

Mr Speaker, rezilta Eleksyon 2016, ziska Eleksyon 2020, Seselwa in konn bokou laverite. E i klersi serten doutans lo sa vre realite ki pei in pas atraver.

Dan Labib Mr Speaker, sa liv ki nou ganny tou lesan lavi, en keksoz ki kler se ki trou ki ou fouy pou ou kanmarad, ou prop i vin lavi i vin an *risk*.

Ler ou met lakord pou ou pann ou kanmarad, se ou prop likou ki lakord i ganny mete. Mr Speaker, Bondye i dir sa ki pas anba lili pou ganny mete lo twa lakaz Mr Speaker.

Onorab Georges, ou Mosyon i annan son merit, aköz ou Mosyon napa en lentansyon malis, ouswa vanzans. Me pe rod laverite, e pe rod drwa Seselwa lo son patrimwann Mr Speaker, latak personnel lo mwan pa pou fer mon desann dan rigol avek zot Mr Speaker, zabitan Grande Anse Mahe, i konnen ki koman en Seselwa parey bann *leaders* Seselwa dan zot kan i annan drwa fer biznes.

Si ti annan problem ek mon fason fer, aköz zot pa ti sezi later *then* Mr Speaker, letan mon ti avek zot? Si mon ti ankor an defo ek Lalwa, ozordi ler mon debarke dan sa pirog nanm konmdir enn zot gran siporter zot ankoler, zot anvi zis sali mon non konmkwa mon'n pran later

malapropo Mr Speaker, sa in ganny dir plizyer fwa.

Mon anvi dir ek Manm dan parti minoriter, sa Mosyon pe senpleman pe rode si prosesis pou annan *Maison du Peuple*, i pou le nouvo *United Seychelles* ouswa pour pep Seselwa?

Mr Speaker, zenes Seselwa i bezwen konn laverite pou efas doutans, e anpes rimer. Nou konnen ki parti minoriter ki ankor fer mal ek rezilta e swa pep Seselwa Eleksyon 2020.

Mon remersi Bondye pour gidans ek lasazes pou konn laverite atraver sa Mosyon. En keksoz ki *United Seychelles* i bezwen konpran, fer sir zot tande, e met dan zot lespri - sa ta milyon ki zot in ankese zot ti kapab pey viktim *TRNUC*. Mr Speaker, konmsi Seselwa pa'n koup lonbri ek zot, konmsi san zot Seselwa pa pou viv Mr Speaker.

Mr Speaker, an termin an isi lo sa kote latav nou pe dir, "*No turning back*, kit li lanmenm *LDS* 2025. E nou pa pou zanmen les tonbe Mr Speaker!"

(APPLAUSE)

MR SPEAKER

Nou pa ankor terminen. I reste mon ankor 3 Manm pou koze, e sa se Onorab Sultan, Onorab Loizeau, e Onorab Monthy, e

apre i annan repons lo deba.
Onorab Aglae ...

(Interruptions)

MR SPEAKER

Order! Onorab, mon pou pran ou parol, mon pou pran ou parol mon pou met ou non lo lalis. Bon nou a pran en *pause*, e nou a re pran 4 er. Mersi.

(BREAK)

MR SPEAKER

Mon a donn laparol Onorab Sultan.

HON VALDANA SULTAN

Mersi Mr Speaker. Bonn apre midi Mr Speaker, bonn apre midi mon bann koleg Onorab. Tou bann dimoun a lekout, sirtou zabitan Port Glaud.

Mr Speaker, dabor avan mon komanse permet mwan koman en ansyen Administrater Distrik Grand Anse Mahe. Mon anvi demann bann zabitan Grand Anse Mahe en leskiz. Ki ozordi zot in ganny trete koman zot dan bwa, par bann Manm Lopoziyon.

E mon leskiz i menm al anver enn mon ansyen koleg ansennyan, zot kandida. I fer lapenn ki zot kandida pe rod vot ek zot. E ozordi zot pe ganny trete dan bwa.

Mr Speaker, ozordi nou rasanble, nou pe koz lo Mosyon ki pe demann nou pour antreprann en lanket dan rezon aköz *Maison Du Peuple* in vin en propriyete Parti *United Seychelles*.

Mr Speaker mon komans koumsa. Mwan koman en zanfann monn form par Mouvman *Young Pioneers*. Ki mon krwar, apre ki mon'n grandi. Mon'n war ou a krwar ti pe prepar nou pour vin bann Solda Rene.

Annefe Mr Speaker, lekel ki ti pour oze refize zwenn sa mouvman, ler ou'n ganny dir ou'n ganny met ladan? Mon mazine menm mon paran ti annan, bezwen annan rezon aköz zot ti ankouraz mwan zwenn sa mouvman.

I tre probab ki si mon pa ti'n zwenn sa mouvman, zanmen mon a ti a war semen *Polytechnic*, menm mon ti merite.

An grandisan mon'n menm realize, ki mon ti pe ganny andoktrinen pour krwar ki Mr Albert Rene sa letan. Ti en pli gran sover ki Bondye li menm. Si mon paran pa ti'n fer mwan grandi dan en lafwa byen fonde, Mr Speaker, manke mon ti pour krwar sa.

Mr Speaker, mon pour menm ale pour mwan dir poudir mon'n form par en groupman manrmay, en group

zanfan ki nou, nou apel nou, “Manrmay Reform”.

Akoz nou apel nou sa non? Akoz tou sanzman in fer lo nou. Nou ti bann premye pour aprann Kreol dan P1. Premye group pour fer Kreol depi P1 ziska P7, sa letan ki ozordi i S1, premye group pour fer S4, premye group lan NYS. Sa ti an 1992. Premye group pour komans fer IGCSE NYS. E si mon menm a pli lwen. bann parey mwan ki ti zwenn Lekol Ledikasyon pour vin *teacher*, nou ti premye group pour fer 3 mwan probasyon akoz bann avan nou ti fer lan.

Mr Speaker, ler mon ti ariv S4, mon ki ti annan en lanmour pour lasyans. Mon ti realize ki mwan ansanm ek mon bann kanmarad menm laz ek mwan, nou sa *constant element* dan *experiment* Mr Rene.

Akoz nou konnen ler zot fer *experiment* i bezwen annan keksoz ki pe al sanze. E nou group i sa group ki pa ti sanze. Tou sa sanzman ti fer lo nou.

Mr Speaker, mon'n fer sa pti letour lepase akoz nou pe koz lo en size, ki dan mon pase mon ti ganny andoktrinen lo la dan lesan politik.

Mr Speaker, a sa pwen mon anvi enform bann Manm lo lot kote latab. Ki mwan Valdana Sultan, degre mon ti'n ganny byen ganny andoktrinen mon ti menm

ranport premye pri dan Konpetisyon Poenm lo Liberasyon le 5 Zen 1977.

Si zot pa krwar mwan al verifie parmi zot bann relik akoz ti dan zot mize. Anba la i pour annan non ‘Valdana Beaudoin’ sa letan. Si mon pa tronpe ti an 1987.

E si mon rapel byen mon krwar mon ti ganny kado en liv “*Portrait of a Struggle*”.

(laughter)

HON VALDANA SULTAN

Anfen Mr Speaker, si politik mon pei ozordi i enteres mwan, pa blanm mwan, Mon'n senpleman annan en bon ansennyan politik, ki avek son lafason lansennyan i ti ankouraz mwan pour toultan al lir lo bann size ki ganny diskite dan laklas. Al aprofondir.

Se la ki mon ti dekouver larealite mon pei. E mon ti osi konpran a en tre zenn az, ki ou napa drwa koz lo laverite. Akoz ou kapab disparet.

Mr Speaker, parey loter Mosyon in byen eksplike *Maison Du Peuple* ti sipoze parey son non i dir - en lakaz oubyen en landrwa pour Lepep. Me pa zis pour en group dimoun.

Alor i a tre byen ki ava annan en diskisyon lo sa size. Akoz ozordi i enn zot aki. Senpleman i pour en fason

rann kont, parey loter Mosyon in dir.

Mr Speaker, letan dimoun in tann koz lo sa Mosyon en zanmi in dir mwan li i rapel tre byen son manmi i desann tou le Sanmdi bomaten pour al fer travay volonter lo *Maison Du Peuple*.

En lot madanm, menm dan distrik Port Glaud menm i dir - dan mon pe fer mon resers, i dir mwan li osi i ti desann pour al fer en travay volonter laba. I dir mwan zot ti ganny enn pti limonnad ek enn pti gato.

E mon asire dan mon distrik si mon ti'n al fer plis resers. I annan bokou plis dimoun ki'n partisip ladan. Mr Speaker si *Maison Du Peuple* in ganny fer par transpirasyon nou pep Seselwa, aköz zot ti krwar i pour vin en batiman pour Lepep, me non pa pour en parti politik en zour, eski i pa zis ki i retourn pour Lepep Seselwa?

Mr Speaker, mon mazine la ki letan mon pe koze petet i annan menm dimoun ki deza pe fer diferan rezon ki mannyer sa landrwa i kapab ganny servi.

Ozordi Mr Speaker, *Maison Du Peuple* i ganny servi eksklizivman par Parti US. En sant ki ti devret o servis lanasyon, in vin en sant propagann politik. Eski i

normal dan en demokrasi sa? Sirman non.

Mr Speaker mon pa la pour atak personn me laverite i reste ki Parti *SPUP*, *SPPF*, Lepep, *US* in monopoliz resours nasyonal pour benefis politik.

Sa batiman *Maison Du Peuple* ti sipoze pour Lepep in vin en lotel pour en sel parti. Lekel? *US*.

Mr Speaker la letan ki nou pe koz lo *Maison Du Peuple*, mon mazin later kot batiman ki ozordi Biro *US* dan mon distrik Port Glaud i ete. Mr Speaker, dapre bann dimoun pli aze ki mwan. Sa landrwa en lepok se Kordgard ki ti la.

E zot biro i kot Kordgard i ete ozordi. Pli tar sa batiman ti ganny rekonstrir, vin sa ki i ete ozordi e se bann zabitan ankor ki ti partisip dan travay volonter pour savoy disab sorti lot kote semen. Aköz sa letan ti napa sa miray ki egziste ozordi - pour vin anmennen pour konstrir sa. Mr Speaker en madanm i menm dir mwan seo ti kas lo mon latet, degre mon ti pe savoy disab. E dan louvertir degre serten ti fer voras, en limonnad nou ti bwar de nou.

Mr Speaker, sa batiman a en serten moman, sa mwan mon rapel byen - ti annan en lasanm, enn sa lasanm ladan ki ti ganny servi kot bann zenn

ti vin aprann koud. La mon pe mazin tou sa bann sanzman ki'n arive ek sa. Mon pa pe akize, mon pa pe dir i vre.

Selman i zis fer ou poz kestyon. Eski vre sa later pour zot menm? Oubyen li osi i en byen Malaki? Mr Speaker, bann pli vye zabitan Port Glaud, in menm fer plis travay volonter. Zot in menm al konstri basen anler dan bwa *Casse Dent*, Morne Blanc kot ozordi bokou dimoun in vin ranpli zot delo kot sa pti sours.

Mr Speaker, en Manm isi kot nou – Onorab Arissol in koz lo la li osi. Parti minoriter parfwa pe akiz nou voler, mon osi mon anvi demann ek zot bann siporter - dan ki kongre - zot fer kongre zot - dan ki kongre zot in deza tann ganny detay bann balans kont zot parti? *LDS* nou fer dan Konvansyon.

Bann siporter *US* eski zot konnen ki mannyer sa bann larzan later, ki pe ganny vann ankor pe ganny vann i ganny depanse, i ganny zere?

Anfen Mr Speaker, an retournan o size en Manm lot kote in dir nou ki sa batiman ti ganny fer par travay volonter siporter *SPUP*. Mr Speaker, in pa'n koz manti li.

Me selman se pour sa rezon ki nou bezwen retourn *Maison Du Peuple* avek Seselwa. Akoz laplipar sa bann siporter *SPUP* in nepli

siport zot. Rann sa batiman avek Lepep, Koumsa sa bann ansyen siporter *SPUP* parey zot dir, i ava kapab rezouir transpirasyon zot volonter, zot travay volonter.

Mr Speaker, an terminan mon a dir avek *LGB* ki i garanti mon sipor lo sa Mosyon. Nou pa pe demann privez, nou pe demann lazistis.

Nou pa pe vin rod divizyon, nou pe rod linyon. *Maison Du Peuple* retourn li avek Lepep. Pep Seselwa i merit latransparans, i merit linite. Ankor mon dir nou pa pe rod konfli, me nou pe rod koreksyon. Mersi Mr Speaker.

(APPLAUSE)

MR SPEAKER

Onorab Aglae, mon donn ou laparol.

HON EGBERT AGLAE

Mersi Mr Speaker. Mon a dir bonn apre midi tou Manm Onorab e tou dimoun ki a lekout e osi byensir tou zabitan Port Glaud ki a lekout.

Mr Speaker Mosyon ki devan nou pe demande ki en propriyete – pa en - parti en batiman ki lo non *US* i ganny retournen, ouswa ganny pran par Gouvernman.

E zot le fer sa atraver kreasyon en Komite Lasanble Nasyonal, ki dayer pour mwan i enkonstitisyonnel. I annan

de fason mon kapab dir, Mr Speaker. Size ki devan nou si *LDS* ti vreman serye lo pran *Maison Du Peuple* parey zot pe dir, byensir i annan bann prosedir legal, kot zot ti kapab met *case*. E ale dir poudir *US*, in ganny sa propriyete dan tel ou tel fason. Eski sa pe ganny fer? Non.

I en Lakour ki kapab deside lo sor e lavenir sa landrwa. Si ti en bout later ki ti ankor vid. Zot ti kapab al rod rekour anba *Land Acquisition Act*.

E la zot ti a fer le neseler prosedir legal. E parti sa Mosyon pe rod sours finansman. E ki zot menm zot bann Manm Onorab lot kote in sit tou sa bann sours finansman, depi Alzeri, *Moscow*, laba Larisi, *Belgique*, kantite ki ti ganny donner depi feray Nor Kore.

Zot konnen sa zot, solman zot oule reetabli sa. En lot kont pwen Mr Speaker, sa Mosyon get son *timing* li menm. *Timing* i vin lavey en eleksyon. E nou'n war poudir dan sa 4an edmi ki mwan mon'n la dan sa Lasanble depi 2020, *LDS* pa'n enterese ek sor sa pep li. Se *US* ki'n lager e ler nou'n koz sor pa pep, nou'n ganny ridikilize a diferan repriz, dan sa Lasanble.

E la ver eleksyon pour sey *start* en masin, ki *start* i tennyen tou. E nou'n war sa

kalite atraver sa *rally* ki zot in fer Dimans, lo sa *court* Grand Anse Mahe, kot santer i bezwen kriye, "bous trou laba deryer, bous trou!"

Mr Speaker, i montre ou poudir *LDS* i dezespere. *LDS* i dan dezespwar atraver ou Mr Speaker, ziskan Onorab Henrie i pe vin gel ek lazenes ozordi. Pe gele.

Me pa zot menm zot ki'n kas tou striktir, sipor dan zot fame transformasyon pour kapab donn lepanouisman nou bann lazenes?

Pa zot ki'n kas striktir *SNYC*, pa zot ki'n kas sa bann *scheme* ki ti pe siport lazenes? La ozordi lavey eleksyon ou vin gel lazenes ek nou. Be zot fot sa.

Mr Speaker, atraver ou, Onorab Sultan in koze, e in dir poudir in epanouir, progrese anba sa sistenm, in ganny bann pri. Mon pa'n tann li a okenn moman poudir sistenm in opres li. Ouswa sistenm in viktimiz li.

Mon pa'n tande sa bout. E loter Mosyon, dan son lentervansyon, in dir en parol li. In dir malgre, wi, ti annan sa sanzman Gouvernman '77. Me sa Gouvernman in devlop sa pei e in ed son dimoun.

Onorab Georges lo verbatim sa ki pa ti pe ekout zot *Leader* al rod verbatim, al gete. Pour mwan i tradwir en keksoz ladan, sa Mosyon pa

senser e pa pe neserman al lwen. I en manev politik, pour ganny *traction* pour *convince* voter la deor. Apre ki zot in fer sa depi 2018 dan kreasyon *TRNUC*, zot anmennen, anmennen. Zot in ganny eleksyon 2020.

Apre zot in kit sa bann pov viktim *TRNUC* lo en *bus stop* ki bis pa pase. Zot pa ni anvi koz ek zot, ni zot lasosyasyon ki zot in formen Prezidan pa enterese ek zot. La zot vin avek en lot kalite seval batay la.

Pran *Maison Du Peuple*. Be eski pran *Maison Du Peuple* pour amelyor lavi pep Seselwa? E prezan sa ki zot pa dir, Onorab Henrie in koz 10milyon valer sa *building*.

Me sa *building*, kot *Maison Du Peuple* i ete, i annan en lot bout ki atase, *the whole value i 10 million*. Sa ki *Headquarters US* i ete. Zot pa'n fer enn pti *QS* fer evalyasyon apepre konbyen pour dir nou?

Ou vin *misleading* nou poudir nou'n pran en batiman 10milyon kan i pa korek. En Mr Speaker, i annan bann Avoka la ater. La anndan ki'n fer bann tranzaksyon later, i konn byen, zot konn byen.

Poudir valer later, an 1977-80 e sa valer ozordi. Akoz later i pa *depreciate* kontrer i *appreciate* i vin pli ser. I pour pli ser ozordi

byensir. Si ou ti aste en bout later avek Gouvernman sepa letan R15mil, R25mil, ou kapab vann li 3,4,5 milyon, menm 8milyon ozordi. Wi, ou kapab fer li aköz valer i monte. Sa i en komodite ki vreman monte. Be annou aret *mislead* sa pep.

43an pase pri pa kapab parey ek ozordi. Mr Speaker, *Maison Du Peuple* ti ganny donnen avek en relasyon ant Prezidan Alzeri, Prezidan *Chaldi* ki ti annan en bon relasyon ek Prezidan Rene sa letan.

Akoz zot ti pe partaz menm filozofi sosyalis. E mon asir ou, si prensip ideoloji Prezidan Rene sa letan pa ti sosyalis zanmen ti pour ganny sa kalite led. Se sa rezon.

E letan nou konn byen poudir e zot in koz lo la zot, *SPUP* sa letan, zot in dir poudir ti annan en biro kot Mr Hassan Ali ti ete laba e ki'n ganny rann ozordi. I parti sa prosesis rekonsilyasyon. E taler mon pour koz lo rekonsilyasyon. I form parti sa prosesis rekonsilyasyon, ki rann.

E byensir, nou ti napa en landrwa. *Maison Du Peuple* in vin sa landrwa. E personn pa'n ganny pouse letan nou al laba. En kantite pep Seselwa in mont sa peron ki ou apel *Maison Du Peuple* ozordi.

En kantite Seselwa in ganny ede atraver mont dan sa peron, ziskan la ozordi. Siporter *SNP* ti vini laba. Parti Seselwa ti vini laba e zot ankor pe vini. I montre mwan poudir i annan en lipokrizi malis. Zot in dir, Onorab Henrie in dir e Mr Speaker ou'n les li ou.

I dir nou anvi nou disparet. Be mon ti krwar sa mo disparet in sorti dan zot vokabiler mwan. Mon ti krwar sa mo disparet in nou'n kit li deryer apre *TRNUC*. Be la i vin koz mwan disparisyon.

Be Lepep Seselwa, be si zot vot *LDS* i paret mwan pour annan dimoun ki *LDS* pour fer disparet sa bann – i pour fer tou *US* disparet.

Wi. Prezan mon demann mon lekor en kestyon. Akoz bann zenn i dir mwan koumsa zot, zot pa enterese ek sa ki'n arive lepase zot. Zot, zot konsern zot lavenir. Mon kestyon, kote *LDS* ou pour fini ou?

2020 ou'n servi *TRNUC*, 2025 ou pe servi *Maison Du Peuple*, kot ou seval batay. 2030 ki ou pour servi la ou? 2030. 2030 koman en parti. Si zot ankor la, si zot ankor la en. 2030 savedir zot pour vin, i annan posibilite zot pour vin deryer tou sa bann *leaders* dan *US* pour vin pran zot bann *assets* savedir.

Akoz zot pou'n fini avek sa bann seval batay ki la, la.

Pou'n napa ankor pour zot troun deryer. I malere Mr Speaker, en Gouvernman e en dirizan ki maltret son pep dan en *rally* e dan bann *meeting* politik, pour mwan Mr Speaker i sagrinan.

Sa ki nou bezwen war de lavan koman en pep, ki mannyer nou bezwen geri. E zot in mete dan zot manifesto sa Mr Speaker. Dan zot manifesto zot in koz lo *national unity*.

Wi. Mon pour sit en laliny dan zot '*National Unity*' ki zot in mete. I dir, "*the commitment of the national unity is part of what we are, as we face the bravest crisis, since the return of multi democracy party.*"

For during national unity is one paramount importance" lenportans zot ti dir. "*This means consultations and combining resources and efforts. An LDS government will bring all parties and groups together for a united national response.*"

Be zot sipoze pe pres linite zot. Zot sipoze anmenn tou dimoun ansanm. Zot ti dir Sesel i pour tou son zanfan.

MR SPEAKER

Eskiz mwan. Onorab Woodcock, mon pe demann ou vey ou labous. Kontinyen.

HON EGBERT AGLAE

Mr Speaker. Sanmenm sa bann mantalite ki apre nou le koudpye nou paran, nou le zour nou paran. Fodre nou konn respe. Mr Speaker be oli sa linite ki zot ti pe prese tou sa letan ki zot sipoze anmennen.

O kontrer zot in senm plis divizyon. Zot in ganny en *super majority* dan Lasanble e dan Legzekitiv. E zot in servi li byen parey sa pep. E se sa, sa pep i dir ozordi, donn en mazorite ankor zot pa pour fer li.

In fini dir, "*LDS no way*". Nou sa ki nou ti a kontan vwar, e sa ki dezir koman en pei. Se nou bezwen geri e bouz de lavan. Prezidan Faure ti fer bann premye pa, pour demande, pour demann leskiz avek serten fanmir.

E nou koman en parti sa Nouvo *United Seychelles* nou'n pronons nou lekor ki sa zafer *TRNUC* pour bezwen annan en lafen. E i ava annan bann repatriasyon ki ava ganny fer, e konpansasyon i ava ganny donner.

Nou'n pronons nou lekor dan Kongre atraver. Zot *LDS* zot pa ankor kapab ni, en rapor i kot zot laba, rapor pe asize lo en *shelf*. Lalis *perpetrators* zot pe kasyet. Akoz zot bann dalon i lo la.

Be eski nou pour kapab geri koman en pep atraver sa kalite fason fer? Atraver sa

kalite lapres pour vin fer zot kanmarad zot opanan disparet?

Eski dan en la demokrasi i akseptab sa? Be zanmen nou'n koz lo *LDS* fodre i disparet nou pa'n zanmen dir sa nou. Non. Nou pa'n zanmen dir sa nou.

Mr Speaker, i annan en kantite keksoz ki nou ti devret pe fer avek sa letan ozordi, pour nou koz lo lavansman nou pei. Mon pour sit enn de. Akoz zot in fer detour lorizon zot. Letan nou, dan sa kote lataab.

Nou demann avek Gouvernman pour donn nou bann lenformasyon atraver nou bann kestyon. Zot rod tou fason pour nou pa konn laverite. *West Coast Project* mon'n anvoy kestyon, zot in taye zot in dir.

Sa pa en peyman ki ganny fer Sesel, be selman ouver zot liv Bidze. I dan en laliny liv Bidze, savedir i annan en Minister ki responsab se Minister Finans. E zot ti promet nou pour donn bann detay resi *LOTO* ti demande, nou pa war nanryen.

E nou pa konnen pep Seselwa ti a kontan konnen ki mannyer peyman pe fer. E si demen i ariv en *dispute*, kote pour al fer sa *dispute*?

MR SPEAKER

15 minit Onorab.

HON EGBERT AGLAE

Laba avek sa bann Arab. Mr Speaker lot size e mon pe terminen la. *STC*, letan zot in anvoy zot *right of reply* la anndan. I enteresan sa. 1an apre *COVID*, zot in dir 2022. 1an apre *COVID* *STC* i fer R66milyon profi.

1an apre *COVID* ki pep pe soufer, zot devret onte. E si zot pe fer profi ozordi, i annan en keksoz ki zot in fer. Letan zot in ferm tou sa bann *outlet*, byensir *cost cutting exercise* kot Finans ki'n ede. Pa sa larzan ki zot ti pe *rent* avek Parti Lepep ki zot dir sa 900mil.

Non. Alors Mr Speaker sa Mosyon i en Mosyon ki mon pour kategoriz li koumsa, en Mosyon retarde sa. En Mosyon retarde. I parey en zanfann retarde mon kapab dir sa Mosyon.

E ozordi, *LDS* i annan 4an edmi pe al lo 5an, si i ti anvi pran aksyon. I ti kapab vin pran son bann aksyon e bann rekour legal atraver zot *super majority* ki zot annan.

Pa vin servi sa Mosyon pour fer zot seval batay politik. Mersi.

MR SPEAKER

Onorab Loizeau. 15minit.

HON NORBERT LOIZEAU

Mersi Mr Speaker. Bonzour tou dimoun a lekout. Bonn apre midi tou dimoun a lekout. Mr Speaker avan komanse mon anvi remersi tou zabitan Bel Air, ki ti desann an gran nonm, pour zot mont ek mwan dan bwa Grand Anse. Pour nou fer, pour asiste nou gran *rally* ki ti deroul byen.

Mr Speaker, ler zot ti pe koze mon pa ti *disturb* personn, ou'n war depi bomaten. Mr Speaker mon - ler mon pe koz lo sa Mosyon, mon anvi felisit Onorab Georges, pour son prezantasyon lo sa Mosyon.

Mon anvi felisit Onorab Georges aköz Onorab Georges in fer sorti en pwen ki mwan mon ti'n fer sorti lo Mosyon ler nou ti pe koz lo *NISA*.

Onorab Georges in konfirman ki Parti Lepep, *SPUP*, *SPPF* ki ozordi i *US*. Zot in abiz pouvwar, pour zot pran ouswa vol tou byen Lepep Seselwa. E *Maison Du Peuple* Mr Speaker, i enn parmi.

Zot in abiz pouvwar pour zot anrisir zot lekor Mr Speaker ek zot parti. Si zot fran lo sa kote latab e onnet. Mon krwar zot pour dakor avek mwan.

E si zot fran e onnet, ek zot lekor zot pour dakor avek mwan ki zot in en parti ki vreman in ganny fonde lo mansonz.

Parey Onorab Georges in rakont nou. Sa bann mansonz ki ti komanse depi le 5 Zen 1977. Me en Manm lo lot kote latab Mr Speaker, in fer resorti byen kler, ki en ta keksoz in ganny fer apre '77.

Wi, Mr Speaker, i annan en ta keksoz byen. Mon admet mwan akòz mon fanmir ti *SPUP* sa letan. I annan serten keksoz ki'n fer. In fer resorti ki zot in fer lakaz. Napa ki zot in fer. Tou sa keksoz zot ki'n fer.

Tou bann profesyonnel ki'n ganny labours pour ale. Se zot ki'n donner. Solman Mr Speaker, ozordi zot pe *threatened* nou bann profesyonnel.

Zot pe dir ek nou bann profesyonnel, zot pe menas zot ki atansyon zot perdi tou sa ki zot in gannye. Solman zot in donn sa bann profesyonnel labours.

I en keksoz bann profesyonnel, en profesyonnel dan mon distrik i dir mwan dir zot. Se larzan *tax* ki zot fanmir in kontribye ki'n fer zot al labours.

Mr Speaker, ler ou tann bann keksoz koumsa eski i ankourazan pour bann profesyonnel? E sa pour fer bann profesyonnel sipòrt zot? Non, Mr Speaker, bann profesyonnel in dir, *No turning back!* Kot zot ete zot *happy*.

Mr Speaker me en lot keksoz ankor. Akòz zot in fer

tou sa bann keksoz ki byen. Eski i *ok*? Alors akòz ou'n donn lakaz, ou'n donn ledikasyon, lasante bann profesyonnel in ale.

Alors ou koman en parti, i *ok* pour ou pran nou later, vol nou larzan, elimin nou bann oponan politik Mr Speaker. Eski sa akòz ou'n fer sa bann keksoz ki byen, i *ok* pour ou fer alors? E ou annan rezon pour ou fer sa bann keksoz?

Mr Speaker, eski sa menm sa bann dimoun ki anvi vin ansar nou pei ozordi? Mr Speaker, Lepep Seselwa in montre, dan bwa Grand Anse *no turning back*. Zot pa anvi retourn an aryer.

Mr Speaker, Mr Rene, lo son lili lanmor i dir avek Onorab Simon Gill. Sel regre, mon pour repete lezot Manm in dir. E mwan mon annan en keksoz mon pour al azout avek.

'Sel regre ki i annan se akòz se akòz zot in mazin zis zot lekor'. Mr Speaker Mr Rene ti annan rezon dir sa. Li parfwa son parol ler i dir, fodre ou konpran byen ki i pe dir. Me zot, zot pa'n konpran. Omwen Mr Speaker, Mr Rene, in realize ki sa ki'n arive ti mal.

Ler mon'n al analiz sa parol ki Mr Rene ti dir, i ti a pe dir avek zot, rann Lepep tou sa ki zot ti'n pran. Pour ki petet Mr Speaker, i ti lo son lili

lanmor pour ki son nanm petet i a repoz an pe.

Me zot pa'n konpran li akòz zot pe kontinyen rezouir tou sa bann byen malaki. E pour sa rezon Mr Speaker, ki ozordi zot ankor dan lopozisyon, zot in tonm dan lopozisyon e ki zot pour reste dan lopozisyon tan ki sa bann keksoz pa ganny fer.

Onorab Georges in fer resorti klerman akòz ki *Maison Du Peuple* i bezwen retourn pour Lepep Seselwa. In fer kler akòz ki Gouvènmman ti finans parti ki o pouvwar. Zot ki ti o pouvwar Mr Speaker, e sa letan zot ki ti dan Gouvènmman.

Sa bann letan i ti zis parey Gouvènmman zot ti pe fer biznes avek Gouvènmman. E pa bliye e sete larzan *tax*, ki nou bann frer ek ser Seselwa ti kontribye ki zot ti pe donn bal ladan Mr Speaker.

Mr Speaker, sa bann letan ti napa zis larzan ki ti sorti kot Gouvènmman ki ti antre kot *Maison Du Peuple* pour fer sa travay pour konstrir sa batiman.

Zot rapel lontan Mr Speaker, ti napa *DA*, sa bann letan ti annan *Chairman Brans*. E la Mr Speaker, avan mon kontiny mon lentervansyon mon anvi felisit bann dimoun, ki'n fer sa louvraz *Chairman Brans* dan distrik Bel Air. Madanm

Andre, Madanm Colette Payet, zot ti fer li byen Mr Speaker.

E mazine madanm Colette Payet, menm ki si son frer Guy Agathe de Bel Air, nou dir li, i ti ganny anprizonnen, bate, akòz i pa ti sipòrt sa sistenm. Me madanm Payet son ser, i ti bezwen fer sa travay e i ti fer li onnet Mr Speaker, pour ki son fanmir i viv byen anba sa sistenm.

E la mon rapel madanm Savy, Rita Savy Mr Speaker. Premye Manm Parلمانter dan Sesel, in *passed away* enn mon zanmi. I ti rakont mwan plizyer keksoz. Zis avan i ti mor tanzantan avan i ti *passed away*, tanzantan nou ti ganny sans ganny en konversasyon.

Li osi i ti en gran demokratik Mr Speaker. Sa bann letan pour ou kapab sirviv Sesel, si ou ti demokratik, apre koudeta ou ti bezwen partisip dan kominote distrik, partisip dan brans parey zot ti apele.

E fer bann keksoz pour ou fanmir kapab sirviv anba sa sistenm sa letan e ti en gran zanmi mon manman. E la mon pour vin lo mon pwen. Nou ti annan sa bann letan ti annan trezorye Mr Speaker. E la mon rapel Madanm Bastille Madanm Isha Bastille, ki ti osi fer en travay serye byen. E apre ti annan mon manman. Graziella Loizeau.

Ozordi mon tann zot pe koz *SPUP*, *SPPF*. I annan *SPUP*, *SPPF* laba lo kote latab? Les mwan koz lo *SPUP*, *SPPF* Mr Speaker. Mon ava rakont zot. Mr Speaker, mon manman ti trezorye, mon manman ti trezorye. Sa bann letan ti annan bann *fundraising* ki ti ganny fer dan distrik.

E tou ti al anver *Maison Du Peuple*. E pa bliye Mr Speaker, dan sa bann *fundraising* ki ti fer bann travay volonter, ti annan bann dimoun dan bwa sorti Grand Anse osi ki Onorab Gill in dir.

Ki ti partisip dan sa bann travay pour zot konstri *Maison Du Peuple*. Me en keksoz Mr Speaker, ki mon anvi abord lo la, mon ti dir lot fwa - e pandan sa bann letan ler sa bann dimoun, bann trezorye distrik ti pe travay onnet, ti pe anmas larzan - mon rapel, mon manman ti annan en gro liv en *gro logbook*. Tou le swar i ti *log* konbyen larzan in fer, note apre i ti anmenn *Maison Du Peuple*.

E en zour en serten Minis, i dir avek li - mon ti ankor zenn garson Mr Speaker. Ti dir avek li, “be Graziella ki ou fer avek sa larzan?”

Manmi i dir li be mon pran mon anmenn *Maison Du Peuple* aköz i annan bann travay pour fer. Ou konnen ki

sa serten Minis ti dir li? “Be ou pa pran en pe pour ou?”

(laughter)

Prezan mon manman i dir, “be non be sa pa mon larzan sa. Sa larzan in fer *fundraising* pour nou konstir *Maison Du Peuple*. Ki mannyer mon kapab pran?”

Mr Speaker, tousala ti arive. Ler serten ti pe travay onnet, i annan ti pe pran. E ozordi mwan koman son zanfan. Mon napa drwa reklaanmen ki *Maison Du Peuple* i retourn pour Lepep Seselwa?

Mr Speaker, be mon manman in travay dir. Si ou al dan mize ou pour war li, tou sa portre. Mon papa ek son latet kler, i ti sov li Mr Speaker, ou pour war li.

Se sa bann dimoun ki'n travay. I annan en bon pe in kit nou Mr Speaker. Anba *Maison Du Peuple* Mr Speaker, mon rapel ti annan en restoran. Ti apel ‘*Harbor Light*’.

Building i *Maison Du Peuple* pour Lepep, selman *Harbor Light* anba zis bann sef, laplipar ditan ki ti vin manze la anba. E mon rapel, mon pa konnen, mon manman ki ti ansarz Mr Speaker.

Parfwa i vini i annan ki'n manze pa'n peye, i annan ki'n bwar pa'n peye, li ler i demann zot, zot dir li zis pa fatig ou

latet lo la – *write-off* Mr Speaker.

Mr Speaker parey Onorab Arissol pe demande, tou sa bann larzan ki kont in al ladan?

Menm sa bann larzan later ki zot pe vann 72milyon - (konbyen 78 Onorab Arissol?) -78milyon, 12milyon laba, STC 18milyon zot in vann. Dan ki kont i ale Mr Speaker?

Petet dan sa gran *rally* lo sa pti *mini stadium*, petet bann la ava donn en kontrandi lo ki arive. E la Mr Speaker, mwan mon anvi koz lo Philibert Loizeau defen, ki mon tonton Mr Speaker.

Mon tonton Philibert Loizeau akòz i ti dir zot rann *Maison Du Peuple* ek Lepep. I ti ganny pouse dan sa *SPUP*, *SPPF* Mr Speaker, i ti ganny pouse e i ti menm dir ki i regrete sa travay ki in fer pour anmas larzan.

E sa larzan Mr Speaker, mon tonton Philibert Loizeau pa ti anmas zis avek bann, bann siporter. I ti en dimoun ki'n viv e grandi Lafrik. I ti al partou Lafrik pour li kapab ganny larzan, pour li kapab fer sa.

E Mr Speaker, e ozordi bokou sa bann dimoun, sa bann dimoun ki ti la ti pe donn koudmen. Mazorite zot nepi siport *US*. Be pa i byen alor ki zot bezwen demande pour zot rann sa landrwa?

E mwan Mr Speaker, mon rapel. Bann letan *Chadli Bendjedid* mon osi mon ti desann ek paviyon pe kriye, “Viv Prezidan *Chadli Bendjedid!*” Pour nou ganny sa larzan Mr Speaker.

Mon osi mon ti donn mon sipor. Akòz ozordi mon dan *LDS*, mon napa drwa dir rann sa landrwa?

Mr Speaker, en keksoz ler nou, nou pe demande pour ki *Maison Du Peuple* i retourn pour Lepep Seselwa. Mr Speaker, ozordi, nou ki mazorite. Nou ki en parti mazorite. Ozordi mazorite sa bann volonter, oubyen bann ki ti Manm Parti *SPUP*, i siport *LDS*. Rezilta Eleksyon 2020, in montre. Alors be i mal pour nou dir rann, rann *Maison Du Peuple* avek Lepep Seselwa? Akòz se zot ki'n travay Mr Speaker.

E sa letan, e sa letan Mr Speaker, ti annan zis en parti politik ek en Gouvernman. Si Prezidan Alzeri in donn en larzan, ti annan zis en parti politik ki en Gouvernman, me pa in donn nou. Pa in donn sa pei. In donn zis zot?

Ti annan zis zot, si ti annan milti – parey la ozordi Mr Speaker tou larzan ki nou pe gannyen parey zot dir ek Arab. Wi. I pa sorti al lo en kont *Baroda* lo segonn li. I reste dan kof Leta pour Lepep

Seselwa, pour nou fer lakaz parey zot ti dir.

MR SPEAKER

15minit Onorab.

HON NORBERT LOIZEAU

Wi, Mr Speaker mon pe al terminen. Pour nou fer lakaz, pour nou anvoy nou bann profesyonnel deor, pour nou fer tou sa bann keksoz. E Mr Speaker, odit i ganny fer. E bann ki dir i annan en larzan ki'n perdi, ale al gete si vre zot ava dir nou.

Mr Speaker, an terminan mon anvi dir avek Onorab Georges. Ki mon pour siport son Mosyon. Mon pour siport son Mosyon Mr Speaker, aköz mon santi ki atraver sa Mosyon nou pour koriz en lenzistis ki'n arive. Mersi Mr Speaker.

MR SPEAKER

Onorab Monthy, ou annan laparol.

HON PHILIP MONTHY

Mersi Mr Speaker. Mr Speaker, en parazit se en lespes ki viv e benefisye par averti en lot lespes. Ler lannen i ale, lannen i vini ou asize la dan sa Lasanble pour bawawa, gras a travay ki lezot ki'n ganny kouraz pour met zot portre lo poto elektrik in fer. Me ou sitan en kapon, kouraz ou napa pour debout dan en

eleksyon, pour mwan ou zis en dekorasyon dan en gro kannson kaki! Mr Speaker.

(APPLAUSE)

(Interruptions)

MR SPEAKER

Onorab! Onorab evit, evit bann latak personnel.

HON PHILIP MONTHY

Mr Speaker - Mr Speaker, sa parti politik ki'n sanz son non a plizyer repriz, e ki la konmela i apel son lekor *United Seychelles*. In en parti ki'n toultan asosye li avek en prensip sosyalis.

E mon mazine ki zot ankor en parti sosyalis, aköz zot in sitan sanz non. Me an menm tan dapre zot, zot in sitan nouvo me an menm tan zot, zot selebre zot 60an sepa konbyen - i en pe konfizan pour kapab dir ki zot vreman ete konmela. E mon sipoze zot ankor sa parti sosyalis ki zot ti ete. E mon'n tann Onorab Audrey Vidot konfirm sa taler dan son lentervansyon Mr Speaker.

E Mr Speaker, ler mwan mon'n fer zis enn pti resers lo ki si sa sosyalis? Ki si sa *socialism*? Mon'n ganny dir ki sosyalis i fer referans avek en sistenm politik oubyen ekonomik, kot tou resours

lendistri e propriyete en pei i normalman ganny kontrole par Leta.

E filozofi par deryer en tel prensip, se ki ler i annan zis en propriyeter, ki i annan monopoli lo tou resours en pei.

E ki dan en tel lenstans e Leta oubyen a dot mo en Gouvernman. Lide par deryer se ki i kree en sosyete pli egal, i kree en sosyete kot larises i sipoze ganny partaze egalman avek Lepep.

An dot mo, pep antye i benefisye dan en sosyete egal kot tou sitwayen i egal. Mr Speaker, sa i prensip sosyalis ki sa parti *US* depi son kreasyon in dir zot ete. E zot krwar fermeman ladan. Me eski sa in vreman le ka Mr Speaker? Eski sa parti ki'n konsider li koman defanser Lepep in vreman gard son promes?

Parey Onorab Georges in dir dan prezantasyon son Mosyon e mon pour fer parey. Mon pa la poudir ki zot pa'n fer keksoz ki byen.

Me eski aköz ou'n fer serten keksoz ki byen, sa i donn ou kart *blanche* pour abiz pouvwar? Eski aköz ou sipoze fer serten keksoz ki byen sa i donn ou lezitimite pour pran resours pei e sa pep e apel li ou propriyete?

Eski aköz ou'n swadizan fer serten keksoz ki byen, sa i donn ou drwa pour donn

Lepep 1 Roupie avek lanmen drwat e an menm tan ou pe retir milyon avek sa menm pep. Zis pour anrisir ou parti avek lanmen gos?

Mr Speaker, konmela ler ou koz lo sa parti ki apel *US*. Se pa zot prensip sosyalis kot zot mazin Lepep Seselwa avan zot lekor, ki vin dan ou latet an premye.

Me plito sa lalis propriyete Leta, sa lalis propriyete Lepep Seselwa ki zot in vole pandan tou sa bann lannen anba zot sistenm diktatir. Kot Leta Sesel i se parti politik ti zis enn ki vin dan ou lespri an premye. Sa pa mwan ki pe dir Mr Speaker, laprev i la.

Nou konn tou sa propriyete Leta ki zot in met zot lanmen sal lo la partou dan sa pei.

Laprev i la sa lakantite milyon ki zot in fer lo ledò sa pep kot pandan ki zot ti pe donn 5poursan logmantasyon travayer. Me zot, zot ti pe anmas milyon atraver propriyete Leta ki zot ti pe fer biznes avek.

Mr Speaker, zis yer menm ler Vis-Prezidan in vin reponn *PNQ*, in fer resorti ki kantite milyon sa parti in fer lo ledò *STC*, oubyen lo ledò Lepep Seselwa.

Laprev i la Mr Speaker, parey Onorab Bistoquet in fer nou mazin. E plizyer lezot in

koz lo la, Onorab Loizeau fek koz lo la, sete zot per fondater li menm, per fondater France Albert Rene. Sa pli gran sosyalis ki li ek son parti ki ti sipoze ete.

E mon repete Mr Speaker, ki ti sipoze annan Lepep Seselwa a ker, i ti admet avek en gran regre ler i ti war ki mannyer zot ti mal anmenn sa pep apre tou zot bann gran promes.

Kot i ti dir avek Mr Simon Gill, ki zot in get zot lekor avan e zot in abandonn Lepep Seselwa. Par mwan ki'n dir sa Mr Speaker, per fondater li menm li ki ti dir sa.

Eski zot pe dir nou ki Onorab Simon Gill ti vin koz mansonz la dan sa Lasanble Mr Speaker. Eski zot pe dir nou ki zot Bondye France Albert Rene ti pe koz mansonz? Larepons i mon krwar pa Mr Speaker.

Me mon asir ou ki enn bann legzanp ki Mr Rene ti pe fer referans avek ler i ti pronons sa bann parol. Sete zisteman sa ki Mosyon ozordi i lo la. *Maison Du Peuple*.

'*Don du peuple Algérien au Peuple Seychellois.*' Avek mon pti konesans dan lalang Franse ki mon'n pas plizyer lannen etidye, i anmenn pour dir ki sa i laprev ki sa kado ti pour Lepep Seselwa sorti kot pep Alzeryen.

Mon'n war serten pe sey vin zistifye poudir, ki sa kado ti pour Mr Rene avek Parti SPPF. Akoz sa mo '*peuple*' oubyen '*people*' an Angle, i en term sosyalis ki ti ganny servi. Mansonz Mr Speaker.

Si sa ti leka lo sa plak, ti ava ekrir, '*Don du President Chadli Bendjedid au President France Albert Rene*'. Me pa sa ki ti ekrir lo sa plak Mr Speaker. Nou pa'n lekol ek Mer Koulev, Mr Speaker. Alor pa sey vin fer nou krwar lizour pour aswar.

Si sa ti en kado ki pep Alzeryen ti'n fer Prezidan Rene ek son parti. Akoz Mr Speaker? Akoz - e sa mon ti a kontan si zot bann siporter partou lo *Facebook* i reponn mwan. Akoz ki *Maison Du Peuple* ti ganny konstrir lo later Leta?

Akoz ki sa ti ou kado, ou pa ti konstrir li lo ou propriyete? Ou pa ti konstrir li lo propriyete ou parti. Me ou ti'n vin konstrir li lo later Lepep Seselwa, lo later Leta? Ki mannyer ozordi ou vin dir nou sa i pour ou?

Me ou fer li lo propriyete sa pep e sete nek an 1996 Mr Speaker, parey Onorab Georges in fer resorti, Onorab Henrie in fer resorti, ki zot, zot ti transfer sa propriyete lo zot parey zot in fer avek plizyer propriyete Leta.

Ki mannyer alors ou kapab vin dir nou ki sa ti en kado ki Mr Rene ek son parti ti'n gannyen? Mansonz Mr Speaker.

Ki'n arive? Se ki zot in war sa direksyon kot pei ti pe ale. Zot in war sa matirite politik ki sa pep in gannyen. E zot ti konnen ki zot lafen ti pe aprobe Mr Speaker.

Alor zot in degaze e fer sir zot anrisir zot lekor e zot parti avan Seselwa i zet zot dan bin listwar. Se sa ki'n arive avek *Maison Du Peuple* Mr Speaker. E Onorab Georges i annan antyerman rezon akoz se nou dan sa parti *LDS* ki'n touzour lager pour byennet sa pep. Mon parti pa'n zanmen vol nanryen pour sa pep Mr Speaker, nou ankor dan nou pti biro anler *Arpent Vert* nou.

E non Onorab Gill, atraver ou Mr Speaker. nou pa pour apel li *Maison Arpent Vert*, akoz tou dabor *LDS* pa en parti sosyalis. Nou en parti liberal. E *Arpent Vert* pa pour Lepep Seselwa, parey zot, zot in vol byen sa pep. E rezon akoz ozordi zot ki ti, alors en zour en gran parti. Pe bezwen organiz *mini rally* dan en *mini stadium*.

Mr Speaker, Cascade in ganny antrennen dan sa deba kot mon'n tann dir zabitan Cascade in ganny kit ater. Atraver ou Mr Speaker, mon le fer Onorab Gill ek Onorab

Pillay konnen, ki *LDS* in la lo teren Cascade depi premye zour dan sa 3er bomaten, ziska prezan.

Zis fer letour Petite Paris, e ou pour kanmi pour vin fer bann tel lakizasyon. Kaskadyen pa'n ganny kit ater Mr Speaker. Sel dimoun Cascade ki pour ganny kit ater se zot kandida pour Lasanble Nasyonal ki mazorite dimoun Cascade pour fer li retourn o bor semen ek son plak.

I kapab pa vin Lasanble al fer kanpanny dan letan Lasanble Mr Speaker, me selman nou konnen ki pour arive.

Mr Speaker, plizyer mon bann koleg in koz lo temwannnyaz ki plizyer dimoun in donner ki ti partisip dan konstriksyon *Maison Du Peuple*.

Mon annan en msye ki'n *text* mwan, i dir mwan Onorab, lir sa. 'Hi bonzour, mwan mon ti enn sa dimoun pour anmas ros sorti Praslin pour fer *Maison Du Peuple*.

Mon ti ganny 2 zour *off* me mon ti bezwen donn en zour pour savoy ros. Si ou pa ti fer li, ou bezwen fer *statement* sa letan mon ti *fireman airport*. Osi ti annan kontribisyon par bann sitwayen ki ti pas partou pour anmas larzan. "

E Mr Speaker mon konnen ou'n dir pa nonm non

personn. Me mwan Mr Jersen Barallon Cascade, in dir mwan nonm son non. I ti dan biznes fer blok, i ti fer kado en masin pour fer blok pour ede konstrir *Maison Du Peuple*.

Mr Speaker, *LDS* atraver prezan Ramkalawan in touzour lager pour byennet e dinyite sa pep. Laprev i la akòz sa pep in war an 2020 lekel ki bon dimoun e lekel ki bann move dimoun.

E ler mon pe get sa demaraz ki nou'n fer avek zis sa *motorcade* ek sa *rally* Dimans, *US* i dan en manman, manman problem Mr Speaker. Akòz le 27 Septanm sa pep pour kit li lanmenm, pour nou kontinyen defann zentere sa pep e anmenn prosperite pour nou pei byeneme Sesel.

Se sa ki onorab Georges pe fer atraver son Mosyon ozordi, Mr Speaker. Retourn pour Seselwa sa ki pour Seselwa. E *Maison Du Peuple* pour retourn pour sa pep!

Sa menm pep ki ti donn lanmen konstrir sa batiman e lo sa later ki ti pour zot. Rann zot, rann zot pour rann Mr Speaker, kontan pa kontan. Mersi Mr Speaker.

(APPLAUSE)

MR SPEAKER

Mon a donn Onorab Georges laparol pour son repons.

HON BERNARD GEORGES

Mersi Mr Speaker. Mr Speaker, mon pran laparol an konklizyon sa Mosyon dan en Lasanble ki fer mwan mazine, ki ler nou retournen an Oktob. Lo lot kote latab pour annan apepre menm kantite dimoun ki la nou war.

Setadir enn ki'n ganny elekte direktteman kekfwa ek 3 Manm proporsyonnel. Se sa, se sa Lasanble ki nou kapab ekspekte war ler nou retournen.

Mr Speaker, mon le remersye tou dimoun ki'n anrisir sa Mosyon avek zot lentervansyon. Lo tou le de kote latab nou'n annan en deba fran, en deba kot nou'n met nou largiman devan. Serten pli korek ki lezot. Serten pli *pointue* parey Franse i dir ki lezot.

Me in en deba *riche* lo en topik ki pa fasil. Ou ti'n dir ou menm Mr Speaker e nou tou nou ti konnen ki sa size *Maison Du Peuple*, i en size sansib e i ti pour anmenn en deba politik.

Nou pa'n sirprann e mon le remersye tou dimoun ki'n annan kouraz pour pran laparol lo en kote, oubyen lo lot kote latab.

Mon komans Mr Speaker, avek en mo remersiman pour 3 dimoun an

partikilye - apard tou bann dimoun ki'n koze.

Mon premye remersiman i pour Onorab Gill. Mersi Onorab pour konfirman ki sa lasistans ki bann pei etranze in donner pour konstrir *Maison Du Peuple*, se pei zanmi ki'n ed Sesel koman en lot pei zanmi.

Parmi tou sa bann Manm Onorab lo ou kote latap ki'n koze, zis ou ki'n konpran kalite sa lasistans. Mersi osi Onorab Vidot, mersi ki ou'n retourn dan Lasanble. Mersi Onorab Vidot, pour konfirm sa ki mon ti dir yer. Sa se ki zot en parti sosyalis. Ler ou pran laparol Dimans alor dan *mini stadium*, fer sa detrwa sipoter dan laplenn rapel ki zot bann sosyalis.

E mersi Onorab Pillay, pour ou komanter lo sa Avoka, li osi Onorab Pillay ki in retournen pour ekout mon konklizyon. Mersi pour ou komanter lo sa avoka e sa bon boug ki ti anter ansanm.

Mon sir ki nou zanmi avoka Basil Hoareau pour byen apresye lafason ki ou'n dekrir li e ou santiman lo li. An ka i pa pe ekout nou la apre midi, mon ava koz avek li demen e mon ava dir li sa ki ou'n dir lo son profesyon.

Mr Speaker, mon le souliny dan mon repons parol detrwa Manm ki'n frap mwan

e ki'n sezi serten lide dan sa Mosyon.

Onorab Bistoquet, in dir nou dan en fason kler ki sa Mosyon set en Mosyon rann *César* sa ki pour *César*. E annefe i annan parfetman rezon.

Onorab Romain in dir, ki nou devwar koman en pep, koman en Lasanble se pour asire ki okenn parti politik pa kapab pran byen Leta pour zot ankor dan nou pei.

Onorab Philip Arissol in dir, ki nou pe ekrir en morso – pardon – nou pe ekrir en nouvo paz dan listwar nou pei. Nou merit fer sir ki okenn lenzistis pa ganny perpetye. Ki okenn move pratik dan transfer propriyete piblik pa ariv ankor. Sa batiman *Maison Du Peuple* i devret reste en senbol kontribisyon Lepep.

Onorab Samynadin, in dir ki en tel vizyon a transform sa lespas sorti koman en senbol partizan, a en Moniman Linite Nasyonal.

En lespas kot tou lavwa, a ganny akeyir e kot lavenir nou pei a ganny diskite avek fransiz e respe mityel. E la apre midi Onorab Sultan in dir ki *Maison Du Peuple* i devret vin en sant o servis lanasyon.

Mr Speaker, tousala se bann eleman ki montre nou egzaktaman ki swe, ki swe ki nou nasyon i annan pour sa moniman *Maison Du Peuple*. E

sa se menm swe ki zot per fondater Mr Rene parey plizyer nou, nou'n fer zot rapel ti dir ki sa batiman i en tredinyon ant Gouvernman e Lepep.

Mr Speaker, kantmenm sa msye in fer plizyer keksoz, nou napa drwa trair son vizyon pour ki sa ki *Maison Du Peuple* ti devret ete. Tousala Mr Speaker, i al dan en sel direksyon.

Maison Du Peuple fodre i reganny son lidantite depar. Sa se napa en *Maison Du Peuple*, en ICCS ek en *Harbor Lights*. Me sa i vin en batiman entegral e zot a vwar ki son larsitektir sa batiman an antye i entegre.

Sa premye bout kot *Maison Du Peuple*, i egzakteman parey sa dezyenm bout kot i annan ICCS avek *Harbor Lights*.

I pa devret ganny kas an de parey i ete la ozordi. Sa batman apele *Maison Du Peuple*, pa devret annan – pour napa politik me kot nou tou enkli Parti US. Akoz zot osi zot pour annan en par ladan.

Akoz zot osi zot form par sa nasyon Sesel pour vin enn en batiman ki reflekte konsepe e travay plizyer zenerasyon. E vin en vre lakaz pour lepanouisman e detant nou pep an antye.

E mwan mon propoze ki an premye lye, tou benefis ki sa batiman i prodwir enkli

ICCS avek *Harbor Lights*, i a vin koman en konpansasyon pour bann viktim Dezyenm Repiblik, bann viktim parti inik anba lekel sa batiman in ganny konsevwar.

A labaz mon deba, a labaz deba lo mon Mosyon i annan en sel difil Mr Speaker, sa se sistenm parti inik. Enn fwa ki nou konpran sa fenomenn, tou kekyon otour *Maison Du Peuple* i rezourd en sel kou.

Parti SPPF ti pran pouvwar an 1977. I ti sanz son non apre pour vin 'SPPF'. Le 5 Zen 1979, nouvo Konstitisyon in vin an fors. Sa Konstitisyon Dezyenm Repiblik. Sa Konstitisyon in deklar Sesel koman en *one party state*. E mon retourn lo la. Lartik 5 Konstitisyon 1979, '*Seychelles is a one-party state. And all political activity shall be conducted under the auspices of the Seychelles Peoples Progressive Front, SPPF*'.

Seychelles shall be a one-party state. Pa en one party government, ki i ti ete. Pa en one-party government me en one-party state.

Zot ki'n deside apel li koumsa. Zot ti'n kapab dir, *Seychelles will have a one-party government*. Zot ti kapab dir, me zot pa'n dir. Zot in dir, '*Seychelles will be a one-party state*. E se la kot tou sa kankan i komanse. Savedir Mr

Speaker ki Leta Sesel e Parti *SPPF* le 5 Zen 1979 in vin en sel *unit* en sel antite.

Alor ler zot ganny led, avek lezot pei ouswa lezot parti, ouswa avek zot siporter i pa enportan si sa led i pour *SPPF* ouswa pour Sesel, aköz sa de antite in fini *merged*. In vin en sel.

Ler ou deside vin ansarz en pep atraver en *one party state*, tou sa ki ou fer i vin pour Lepep. Aköz ou parti in vin en sel avek Lepep. Se sa ki fodre zot konpran aköz se sa ki a la baz sa Mosyon.

Zot in swiv sa prensip parey Onorab Monthy fek dir. Zot in konstrir, *Maison Du Peuple* lo later Leta. Zot in kapab met sa morso later lo *SPPF* avan. Ki zot fer sa batiman, zot in kapab fer li. E ozordi nou pa ti pour annan en diskisyon, oubyen nou diskisyon ti ava al dan en lot direksyon.

Me zot pa'n fer sa Mr Speaker. Zot in konstrir sa later lo – zot in konstrir sa batiman lo later Leta. E zot in fer sa aköz zot ti konnen, ki sa ki zot ti pe fer zot ti pe fer pour Leta e non pa pour zot.

Zot in swiv lide *Maison Du Peuple* atraver lemonn parey mon ti dekrir yer. E kantmenm zot in fer li bout par bout, zot in konstrir tou bann bout entegre dan en *Maison Du Peuple*. Biro, lasal

legzibisyon, lasal rankont ki ozordi nou apel *ICCS*, restoran, ki ozordi nou apel *Harbor Light* dan menm stil e tousala zot in fer lo later Leta. Zot in kit tousala lo later Leta ziska 1996. 1979 premye pyer 1996 tou sa konstriksyon i lo later Leta. Se selman an 1996, ki zot transfer en bout *Maison Du Peuple*. E zot bezwen fer en *subdivision* pour zot fer sa. Aköz?

Ki si sa ki'n sanze an 1976 – '96 pour fer en byen Leta lo later Leta pandan 18an en sel kou ganny transfer lo Parti *SPPF*. Se sa kestyon, ki sa Mosyon pe al rode atraver sa Komite Lasanble.

Si tou sa batiman ti'n ganny konstrir avek donasyon pei zanmi, e lasyer siporter *SPPF*, atraver fon zot parti, aköz alor ki zot *subdivide* sa bout *ICCS* e *Harbor Lights* e transfer sa bout kot zot biro lo *SPPF*. Swa zot ti'n devret transfer tou lo *SPPF*, sa ki zot, zot dir, lo zot kote lataab.

Aköz dapre zot, se zot ki'n konstrir - swa zot ti'n devret kit tou lo later Leta, pour Leta, parey nou, nou pe dir. Pa zot ki devret deside Mr Speaker, ki si sa ki zot pour pran e ki si sa ki zot pour rann.

Lepep ki pour desid sa. E i pour desid sa atraver sa Mosyon ler temwen sa letan i a vin isi devan sa Komite

Lasanble e i ava temwannen lo ki si sa ki ti dan zot lespri.

Pa zot ki pour dir, ki prosedir legal ki nou pour pran. Mon bann zanmi, madanm Onorab Lemiel an partikilye. Zot in kay lo lefet ki sa later in anrezistre lo *SPPF*, e zot pe rod ki mannyer legal ki sa later pour ganny pran.

Mon ti dir zot yer. E mon repete ozordi - pa komans lo sa staz, silvouple. Pa sa ki sa Mosyon pe rode. Sa ki nou pe demande se ki mannyer, se pa ki sa later in ganny anrezistre lo *SPPF* ozordi.

Sa ki nou pe demande se aköz ki sa later in ariv lo *SPPF* a en serten moman? Se sa kestyon ki zot devret demann zot lekor. Pa kay lo lefet ki, *ah* later i lo nou non.

Alor zot bezwen al rod konpansasyon al rod isi, al demann Lakour, al fer tou sord kalite lanket. Pa sa ki nou pe demande. Nou pe demande ki mannyer sa ariv kot zot dan premye ka. *Why is it in your name?*

Mon repete, Mr Speaker, ler ou deside vin ansarz en pep atraver *one party state* tou sa ki ou fer i pour Lepep. Aköz ou parti avek Lepep in vin en sel *unit*.

En mo lo volontarya. Onorab Pillay in dir ki son manmi ek li in fer bokou travay volonter parey bokou dimoun dan nou pei. Sa Mr

Speaker i byen. E mon felisit Onorab, e tou sa bann lezot dimoun ki'n donn zot letan e zot kouraz pour fer travay volonter atraver nou pei.

E mon felisit tou sa bann volonter, ki'n travay lo *Maison Du Peuple*. Sa parol Onorab Pillay in fer nou war kote zot repons e zot stratezi lo sa Mosyon in fel. Aköz sa bann miray ek sa bann klinik ki ti ganny fer atraver travay volonter *SPPF* pa'n gard pour zot.

Zot in fer li pour Leta, zot in fer li pour Lepep Seselwa. Tou sa bann travay i reste pour Leta, e i reste pour Lepep ozordi. *Maison Du Peuple* i devret parey.

Tou sa bann, tou sa bann *Maison Du Peuple* ki bann mouvman sosyalis in fer partou dan lemonn, pa'n reste pour sa bann mouvman sosyalis. Me in reste pour Leta sa bann pei, e pour lepanouisman e detant travayer dan sa bann pei.

Se zis Sesel, e se zis *Maison Du Peuple* Victoria, ki'n ganny pran par en parti ki ti o pouvwar e ki'n anvi gard li.

Alor Mr Speaker, annou dir en keksoz kler. Parti *SPPF* in anbet Seselwa e dan gran kler in pran en gro batiman Leta dan milye lavil pour zot menm.

Zot in anbet tou sa bann pei ki'n fer kontribisyon. Zot

in anbet sa bann volonter ki'n donn zot kouraz pour kree en batiman ki ti pour zot. Atraver sa deba, Lepep Seselwa mon sir in arive konpran en keksoz kler - sa se ki sa Parti *United Seychelles* pa devret annan en par dan politik Sesel ankor zanmen. Onorab Lemiel i dir, ki dan 16 zour ki reste sa Lasanble, nou pa pour ganny letan pour sa Komite travay.

Onorab Larsen e Onorab Lemiel, i dir ki ti annan bokou lezot size ki sa Lasanble ti devret pe travay lo la. Mon annan de repons pour zot Mr Speaker.

Premye, mwan, mon'n anmenn en Mosyon mwan. Be zot Onorab Lemiel avek Onorab Larsen aköz zot pa'n anmenn sa bann Mosyon ki zot dir Lasanble i devret travay lo la?

(Interruptions)

HON SANDY ARISSOL

(Off-Mic)

(Al fer kanpanny dan letan Lasanble)

HON BERNARD GEORGES

Koze – koze-

(Interruptions)

MR SPEAKER

Onorab Pillay, ou fek antre! Ok, bon annou termin sa deba

silvouple. Onorab Georges, silvouple.

HON BERNARD GEORGES

Mersi Mr Speaker. Koze i bon marse Onorab. Annou war – (non pa i) – Mr Speaker, nou'n pas en apre midi trankil. La Onorab Pillay, zis in antre in komans fer dezord.

MR SPEAKER

Ok. Onorab Pillay, si ou pa kapab ekoute ou annan zis pour sorti. Ah! Onorab Georges?

HON BERNARD GEORGES

Mersi Mr Speaker. Dezyenm pwen. An parlan aksyon, 16 zour Onorab i en kantite zour pour travay. Ler Mosyon i pase ozordi e i pour pase. Semenn prosenn nou ava nonm bann Manm lo sa Komite. E travay a komanse imedyatman.

Si nou travay dir nou a fini byen avan *recess*, si nou pa fini nou a anmenn en lot Mosyon an Oktob ouswa an Novanm e nou a kontinyen sa travay.

(APPLAUSE)

HON BERNARD GEORGES

Pa krwar mon bann zanmi dan Lopoizasyon ki *Recess* Lasanble pour sov zot *Maison Du Peuple*. Mon'n dir e mon repete, ki sa Komite pour zwenn. I pour fer rekomandasyon avek

Gouvernman. E si en prosedir legal pour bezwen ganny pas ladan. Nou a pas ladan aköz nou, nou krwar dan *rule of law*.

Me sa ki kler, parey lizour i swiv lannwit, *Maison Du Peuple* kontan pa kontan pour retourn pour Lepep Seselwa! Mersi Mr Speaker.

MR SPEAKER

Bon, apre repons lo deba. Mon apel Manm pour vot lo Mosyon. Manm ki vot an faver lev lanmen silvouple? Manm ki vot kont? Byen. Lo Mosyon dan non Onorab Bernard Georges. 19 Manm in vot pour, 6 Manm in vot kont, 0 Manm in *abstain*. Mosyon in aprouve par Lasanble.

(APPLAUSE)

MR SPEAKER

Donk, swivan desizyon lo Mosyon, mon pour demann bann Manm pour soumet Manm ki zot kapab annan lo Komite. Mon ava enform bann Manm par ekrir, ki nou pour demann bann Manm pour nomin zot bann Manm. Demann bann *Caucus* pour nomin zot bann Manm Mardi prosen.

E swivan sa, parey nou'n deza etabli Madanm Clerk i ava apel premye *meeting* Komite. Mersi.

Bon, avan nou terminen lo sa travay mon pour lir en *right of reply* ki mon'n ganny demande pour lir par Madanm Vivienne Soundy. E i lir koumsa;

(Interruptions)

MR SPEAKER

Order!

“Onorab Sylvanne Lemiel, *the National Assembly Member of United Seychelles* mentioned my name in an interview she made within the hour. She made reference to a letter that she publicly mentioned that I personally circulated, requesting Mr Wavel Ramkalawan to return funds that was given to him. I totally refute such allegations where she particularly made reference in my name. I want to ask Honorable Lemiel if she personally witnesses me physically distributing such a letter. If not, how can she make such a statement which is totally unfounded.

To mention when this letter was being circulated the then Speaker Patrick Herminie summoned me to his office to show me this letter to confirm it was written by me.

I categorically refused and blatantly told him that this so-called letter did not even have my signature”. This is the *right of reply*.

Bon, nou'n terminen lo
sa size, Lasanble i ava *adjourn*
e nou a repran travay Mardi
prosen.

(ADJOURNMENT)